

Raham

Sindelila

Bi. Mandawa

KING wamillazo

RIWAYA..

MREMBO KIPOFU

VISIT...

LANZAROTE
Caliente.COM

Riwaya: MREMBO KIPOFU.

Mtunzi: Alexis Wamillazo KING

Sehemu ya 01.

"Maisha yangu na mwanangu yamekuwa ya shida sana,kila kukicha heri ya jana. Tazama hata mume wangu niliyedhani atanikingia kifua pindi mawifi waniandanapo,naye kakaa kimya wakati mwingine hudiliki kunidhihaki mbele ya dada zake. Najiuliza nimekukosea nini Mungu wangu? Niliomba na kufunga ili unipatie mtoto baada kuandamwa na ndugu wa mume kuwa mimi tasa, hatimaye umenipa mtoto. Lakini bado watu hao hao wanaendelea kuniandama kwamba nimewazalia mtoto kipofu,wakidiliki kusahau kabisa kuwa kazi yako haina makosa. Ni fanye nini mimi Mungu wangu?.." Alijiuliza Pendo. Mwanamke ambaye alijikuta akiishi maisha ya manyanyaso baada kujifungua mtoto kipofu. Mawifi zake walimwandama kila kukicha huku wakizidi kumshinikiza kaka yao aweze kuachana naye. Mambo hayo yalimumiza sana Pendo,ndio maana siku hiyo jioni alipokuwa amekaa chini ya mwembe akimuogesha mtoto wake alijiuliza maswali hayo ambayo yalimfanya kutoa machozi. Mwisho wa yote alimuomba Mungu amkuze mwanaye japo ni kipofu. Lakini wakati Pendo alipokuwa akiwaza hayo maswahibu yanayo mkabili,alifika mumewe akitokea shamba. Mwanaume huyo aliitwa Maduhu,Maduhu alipitiliza moja kwa moja ndani bila hata kumsalimu mkewe ingawa alimuona. Pendo alishangaa sana huku akiukodolea macho mlango wa nyumba yao,ila mwishowe aliishia kusikitika tu na hata asiseme jambo lolote. Pindi akiwa katika hali hiyo ya kusikitika, Maduhu alitoka ndani kwa hasira akasikika akisima "Pendo, mbona hujanipikia chakula. Au unaona huyo kilema wako ni bora kuliko mimi? Eeh nakuuliza wewe mwanahidhaya nataka unijibu" maneno hayo Maduhu aliyasema kwa sauti ya jazba huku akimsogelea Pendo na kisha kumpiga makofi. Pendo alilia sana kwa uchungu,akamnyanyua mwanaye kutoka kwenye beseni lanje maji akazipiga hatua kuingia ndani ili akalilie hiko kwani hali hiyo tayari ilikuwa kawaida kwake, hata angeomba msamaha katu usingefaa kwa Maduhu. Aliona njia pekee stahiki ni kwenda kulilia ndani na sio vinginevyo, lakini kabla Pendo hajafika ndani,Maduhu alimuita tena.

"Pendo hebu njoo hapa,.. " kwa unyonge Pendo alitii wito wa mumewe.
"kwanini hujapika chakula?.." Aliongezea kusema Maduhu huku akimtazama Pendo kwa jicho pembe, moyo wake nao ukiwa umefurika hasira zisizo na haiba.

Pendo hakujibu ingawa jibu alikuwa nalo,zaidi aliendelea kudondosha machozi akiumizwa na maneno ya mume wake juu ya kumwambia kumtuakania mwanaye aliyemzaa kwa uchungu. Pendo kama mzazi aliumizwa sana na maneno hayo ya mzazi mwenzie, akajiuliza.

"Kwanini mume wangu anafikia hatua hii ya kukufuru? Kwanini asingeniuliza kistaarabu kuhusu chakula, kuliko kufika na kuanza kunitusi?.." Alijiuliza Pendo wakati huo chozi likimtoka huku moyoni akiamini kuwa yote hayo ni kwa sababu amemzalia mtoto mlemavu.

Hivyo basi Wakati yupo katika hali hiyo ya simanzi,upande wa pili mumuwe alionekana akizipiga hatua kuelekea dukani kwa Titto. duka kubwa kuliko yote kijijini hapo. Lakini kabla Maduhu hajafika huko aliko kuwa anaelekea, alikutana na dada yake njiani. Dada huyo alifahamika kwa jina Suzan. Suzan alishtuka kumuona kaka yake akiwa katika hali ya kughadhibishwa na jambo fulani,hivyo ikabidi amuulize "kulikoni kaka mbona unaonekana hauko sawa,vipi umegombana na mkeo?.." Muduhu kabla hajamjibu dada yake, alishusha pumzi ndefu kisha akajibu "Dada yangu we acha tu,kweli nimeamini misemo ile ya wahenga isemayo bora ukosee kunyoa kuliko ukosee kuoa"

Alijibu Maduhu huku mikono yake ikiwa kwenye kiuno chake ilihali macho yake yakionekana kuwa chap kutazama huku na kule kana kwamba amejawa na hofu,Suzan aliposikia maneno hayo alicheka kidogo kisha akarudia kuuliza "Unaama gani kaka!?"

Maduhu alimtazama dada yake usoni huku akionekana kutafakari jibu la kumpa. Mwishowe Maduhu alisema

"Namaanisha kwamba kama kuoa basi kaka yako nimekosea,yani mimi nakwenda shamba kufanya kazi kutwa nzima. Narudi nyumbani nakuta Pendo hajanipikia chakula,kwahiyo anategemea nile mawe? Muda wote yupo bize na mtoto wake kipofu asiye kuwa na faida kwangu.."

"Mh! Pole sana"Alisema Suzan, na punde si punde akamuuliza.

"Sawa na huko unakwenda wapi sasa?.."

"Naenda kununua vibumunda kwa Mduo ili nipoze njaa kali niliyonayo"
Alijibu Maduhu.

"Daah pole sana kaka yangu,lakini nadhani haya ndio malipo yako. Kumbuka ulichaguliwa mwanamke wa kuoa ila ukakataa,ona sasa malipo yake..."

"Ni kweli dada najutia mamuzi yangu,lakini mimi nitajua kipi cha kumfanya. Kama sio yeye basi hata mwanaye"

"Ikiwezekana uende naye shamba..nyumbani anabaki anafanya nini. Au ndio anamlea mwanaye?.."

"Mtoto mwenyewe kipofu atanisaidia nini mimi?..nadhani wazo lako nzuri dada yangu acha nikalifanyie kazi majibu yake mtayaona" alihitimisha Maduhu kisha akaagana na dada yake,yeye alikwenda dukani huku dada yake naye akaelekea nyumbani kwa kaka yake ili akasema jambo na wifi yake.

Suzan alipo fika nyumbani hapo alimkuta Pendo yupo ndani akimbembeleza mwanaye kipofu ili alale, Suzan kwa sauti kali alisikika akisema. "Pendo kama upo ndani njoo haraka sana mwanahidhaya mkubwa wewe"

Sauti hiyo ya Suzan ilimshtua sana Pendo,haraka aliamka akasimama kando ya kitanda na kisha kujiuliza kuna nini tena? Ama mume wangu kaenda kumwambia dada yake kuwa nimemnyima chakula? Alijiuliza Pendo wakati huo akijongea kutoka ndani,alipo fika nje..Suzan alisema "Pendo, kwanini unamnyanyasa kaka yangu? Anatoka shamba hakuti chakula au ndivyo ulivyofunzwa kwenu?.."Ni maneno ambayo Suzani aliyaongea kwa sauti kali. Pendo hakujibu aliishia tu kumtazama wifi yake jinsi anavyoongea kwa nyodo huku mkono akiwa ameshika kiuononi. Suzan aliendelea kusema "Tambua wewe hukuwa chaguo la familia yetu,katika ukoo wetu hajawahi kutokea mtu kipofu. Ndio kwanza tunamuona kwako,tayari umetuletea uchuro kwenye kizazi chetu,bora afe huyo mtoto kuliko kuendelea kuishia naye. Hatokuwa na masaada,kipofu atakusaidia nini?.." Maneno hayo yalimchoma Pendo ndani moyo wake, uchungu wa mwana ukampata akajikuta machozi yakimtiririka katika macho yake. Ila mwishowe aliyafuta machozi hayo na kisha kusema ukweli ili kuondoa utata wa kudhaniwa kuwa amemnyima mumewe chakula. Hivyo alifungua kinywa chake na kisha kusema "Wifi,usinihukumu moja kwa

moja ukidhania kwamba nimemnyima kaka yako chakula. Siwezi kufanya hivyo nampenda sana kaka yako ila haya mengine ni mipango ya Mungu tu. Kumbuka hii ni kazi ya Muumba " Pendo alikomea hapo kwanza, kwa mara aliyafuta machozi yaliyoendelea kumtoka kwa uchungu. Punde aliendelea kusema "Tangu jana mchana hatuna unga humu ndani, usiku tulilala njaa. Leo asubuhi nilimwambia suala hilo ili anipe pesa nikasage mahindi mashineni,lakini hakunijibu zaidi aliondoka zake. Na mimi sina chochote wafi yangu,nitafanyaje sasa? Au nikaibe?... " Pendo alilia sana baada kusema maneno hayo. Na mwishowe alihitimisha kwa kusema "Najua mnanichukia sana,lakini mimi ni binadamu ipo siku nitakufa mioyo yenu itakuwa na furaha..." kwisha kusema hayo Pendo alirudi ndani kuendelea kumbembeleza mwanaye ili apate lepe la usingizi.

Hayo ndio maisha aliyokuwa akiishi Pendo na ndugu wa mume wake akiwemo na mumewe mwenyewe,yalikuwa maisha ya manyanyaso sana. Yote hayo kwa sababu Pendo hakuwa chaguo la familia yakina Maduhu,kibaya zaidi alipoonekana miezi inasonga bila kupata mtoto..Ndugu wa mume hasa mawifi zake walimsimanga,lakini Pendo hakukata tamaa alizidi kumuomba Mungu bila kukoma. Hatimaye Mungu akajibu hitaji lake, Pendo akabahatika kupata mimba na kisha kujifungua mtoto ambaye alizaliwa na ulemavu wa macho. Hapo sasa matatizo yalizidi maradufu,kuanzia hapo Pendo alijikuta akiwa mkiwa, kila kukicha afadhali ya jana. Hadi ikafikia hatua Pendo akatamani bora afe kuliko kunyanyasika,lakini ajabu siku hiyo alishtuka baada wafi yake kumwambia kuwa bora mwanaye afe kwani hatokuwa na msaada kwa kaka yao pia ujumla familia yao yote,kipofu atafanya kipi kwa manufaa ya familia? Maneno hayo yalimkosesha amani Pendo, akajikuta kila siku yeye mtu wa kulia. Hata mara moja uso wake haukuonyesha tabasamu.

Siku moja Pendo aliamua kufunga safari kwenda kumtembelea mama yake kijiji cha pili,alipo fika alimuelezea mama yake matatizo yote anayokumbana nayo kule alipoolewa. Lakini mama yake alimpa moyo mwanaye huku akimsisitiza kuwa kwa mila na tamaduni zao,mwiko kumkimbia mwaume aliyekuo mpaka pale atakapo kupa taraka kwa hiari yake.

"Mwanangu, hustahili kumkimbia mumeo, mwiko. Subiri hadi akupe taraka mwenyewe. Ukisikia kuwa kujenga mji wako ni kazi, basi kazi yenyewe ndio

hiyo. Kinacho takiwa ni wewe kuvumilia huku ukiomba bila kukoma, nina imani ipo siku utaifurahia nyumba yako"

Alisema mama Pendo akimuasa mwanaye aliyeonekana kuchoshwa na masimango kutoka kwa ndugu wa mume wake akiwemo na mumewe mwenyewe.

Maneno hayo yalimnyong'onyesha Pendo. Akajiuliza kwa kilio

"Hivi nilini nitakimaliza kikombe hiki cha manyanyaso mimi, Pendo nimezaliwa na mkosi gani?"

Jibu alikosa Pendo ndipo aliposimama akamnyanyua mwanaye kisha akapitisha kiganja mbele yake, mwanaye huyo akawa hapepesi mboni kuashiria kuwa haoni kitu kilichopo mbele yake. Pendo alisikitika sana ambapo kwa sauti iliyojaa huzuni alimwambia mama yake" Mama leo na kesho nikifa, naomba unilelee mwanangu. Mtunze vizuri mjukuu wako kwani naye anahaki ya kuishi japo dunia haioni ila najua Mungu anamakusudio yake..kwaheri mama yangu" Alisema hivyo Pendo kisha akaondoka zake akirejea nyumbani kwake huku nyuma akimuacha mama yake akiwa na sintofahamu kuhusu maneno hayo makali aliyoyasema.

Sehemu ya 02.

Alipo fika nyumbani kwake Pendo alizama moja kwa moja ndani, huko alimlaza mwanae kitandani kisha akaenda polini kutafuta kuni. Wakati anarejea nyumbani njiani alikutana na mama yake mkwe, Pendo alimsalimu mama huyo lakini hakuitikiwa salamu yake zaidi aliishia kufyonywa huku akisema "Unamwamkia nani kenge wewe, umemlaghai mwanangu mpaka kakuo bila ridhaa yetu. Una nini wewe mwanamke? Mpaka umemfanya mwanangu asisikilize matakwa yangu..eeh..sasa nakwambia hivi, mimi ni mzazi wake Maduhu nataka uachane na mwanangu, tofauti na hivyo utakuja kujuta maishani mwako " alisema mama yake mkwe Pendo tena kwa jazba ya hali ya juu. Pendo aliumizwa sana na maneno hayo ya mama yake mkwe, ukweli alidondosha machozi wakati huo akitafakari jibu la kumpa mama huyo. Lakini kabla hajamjibu ghafla Suzani alifika hapo ambapo kwa dhara na nyodo Suzani alisema "We mjawalaana mzima na kipofu wako?.."

Pendo hakujibu salamu ile ya Wifi yake zaidi aliendelea kudondosha machozi huku akililia moyoni kwa uchungu. Wakati Pendo analia Suzani alimtizama mama yake na kisha kusema Mama unajua kama huyu mkweo siku hizi kaota mapembe?...huwezi amini, kaka anakwenda shamba analima kutwa nzima lakini akirudi nyumbani hakuti chakula. Inamaana huyo mwanamke koo au kaolewa? Alisema Suzani akimwambia mama yake. Mama Suzani nae alipoyasikia hayo maneno alijifanya kushtuka, na kwa hamaki kubwa akasema "sasa hivi kabla hujafika nilikuwa namwambia kuwa yeye sio chaguo letu, nikiamini kabisa mwanangu kakosea koo. Siku zote mabinti wanaotoka kijiji kile cha Mazinge hawajui kuishi na waume zao..sasa ndio haya yanaanza kutokea" Alisema mama Suzani akimwambia mwanae, ilihali muda huo Pendo alikuwa ameamka uso wake chini huku mzigo wa kuni zake ukiwa pembeni yake. Ambapo baada kusema hayo, mama huyo alimgeukia Pendo kisha akasema "mwali, sasa umefika muda wa kuondoka katika familia hii" Alisema hivyo, hapo sasa Pendo aliinua uso wake ambao kimwonekano tayali ulikuwa umechakaa kwa machozi.. kwa huzuni kubwa moyoni Pendo alisema "nitaenda wapi mimi? Na vipi kuhusu hii damu yenu? Mkotayali nitaabiki na damu yenu haliyakuwa baba yake yupo hai? .." Pendo alipo sema hivyo, mama yake mkwe alimkunja uso halafu akamsonya na kisha kumjibu "utajua mwenyewe, kwani huna kwenu? Na ninani aliyekwambia kwamba katika ukoo wetu aliwahi kuzaliwa kipofu? Ondoka zako hapa usituletee uchuro sisi" Alijibiwa namna hiyo Pendo, maneno ambayo yalizidi kuuchoma moyo wake hadi akajikuta analia kwa sauti kama mtoto mdogo ilihali muda huo mama yake mkwe pamoja na Wifi yake waliondoka zao huku wakigongeeana mikono, vicheko navyo vya husda vikidiki kuwatawala.

Pendo alilia sana, hapo aliamua kukaa chini ili atulize kidogo munkali aliyokuwa nayo moyoni mwake. Lakini alipokuwa amekaa chini mara ghafla alihisi maziwa kujaa katika matiti yake, hivyo aliamini kuwa mwanae ameamka na atakuwa analia kwa njaa aliyokuwa nayo. Kwahiyo haraka sana Pendo alijitwika mzigo wake wa kuni safari ikawa imeanza ya kurudi nyumba huku akilini akiwa na mawazo mengi juu ya maisha yake na mwanae ambao ni mlemavu. Mwanae huyo alitwa Sindelela. Hivyo Pendo alizipiga hatua za haraka haraka ili amuwahi Sindelela wake wakati huo katika mawazo yake aliyokuwa akiwaza aliona ni bora amwachishe ziwa Sindelela kwani umri wa kuacha kunyonya ulikuwa unakaribia, kwahiyo aliona bora amzoeshia ugali

mapema ili hata siku ambayo itatokea hayupo duniani,basi asimsumbue bibi yake. Wazo hilo Pendo alikubaliana nalo huku akizidi kutembea kwa kasi kumuwahi mwanae,kwani kadri muda ulivyozidi kwenda maziwa yake yalijaa ambapo Pendo alijiaminisha kuwa mwanae atakuwa anahisi njaa sana hivyo hanabudi kukazana mwendo. Lakini kabla Pendo hajafika nyumbani,mumewe alifika akiwa ametoka shamba ambapo alikuta sauti ya mtoto ndani akilia kwa sauti ya juu. Maduhu baada kusikia sauti hiyo aliegesha jembe kando ya mlango wa nyumba yake kisha akataka kuingia ndani ila alisita ambapo aliamua kupasa sauti kumwita mkewe "Pendo... Pendo...Pendo " Maduhu hakuitikiwa hivyo akajua huwenda Pendo atakuwa ametoka mbali na nyumbani. Hapo sasa Maduhu akaona hiyo ndio nafasi pekee ya kumuua mtoto Sindelela ambaye pia ni damu yake kwa kuwa mtoto huyo alizaliwa akiwa kipofu..plani hiyo haikumjia kwa muda huo bali kwa kipindi kirefu sana alilifikiria wazo hilo,zaidi alikuwa amengojea siku apate nafasi ndipo aweze kutimiza azma yake. Sasa siku hiyo nafasi ikapatikana,Maduhu hakutaka kuipoteza kwani aliamini kuwa endapo mtoto huyo akiondolewa basi atakaa vema na mkewe wayajenge ili Mungu awape mtoto asiye na kasoro,akidhani kuwa huwenda hata wazazi wake watampenda pindi Pendo atakapo jifungua mtoto aliyekamilika kwa maana chanzo chote cha mzozo ni kipofu Sindelela. Naam! Maduhu alipiga moyo konde kisha akachukuwa panga lake akazama ndani kutimiza azma yake kwa damu yake ambayo Mungu alimtunuku ijapo ni kipofu. Aliamua kufanya hivyo akitegemea kuwa pindi atakapo muua kipofu Sindelela atakwenda kumtupa mbali ili kufuta ushahidi. Maduhu alisimama kando ya kitanda alicholalia Sindelela akamtazama mara mbili mbili kisha akanyanyua panga huku akihesabu namba kimoyomoyo ili akifika tatu ashushe panga kwenye mwili wa mtoto huyo kipofu. Moja..mbili..ta..." kabla hajaitaja tatu vizuri ambayo ingemfanya auwe ghafla alisikia sauti ikisema "Hapanaaa usifanye hivyo mume wangu,usifanye hivyo tafadhali. Niue mimi basi kuliko kiumbe hicho cha Mungu ambacho hakina makosa..niue mimi basi niueee uniache hai Sindelela wangu" Alisema Pendo huku machozi yakimtoka akalia kwa uchungu.

Sehemu ya 03.

Maduhu alipo sikia sauti hiyo alishusha chini upanga wake,akamtazama mkewe kwa jicho la haibu,akatoka ndani kichwa chini. Lakini kabla hajafika nje alisikia sauti ya dada yake ikisema

"Pendo na mume wako tukoni humo ndani.." Ni sauti ya Suzani aliyesikika akisema kwa ukali.

wakati Suzani anasema hivyo,Maduhu tayari alikuwa ameshaukaribia mlango, kwahiyo yeye ndio alikuwa wa kwanza kutoka ndani akimuacha ndani Pendo akilia bila kukoma. "Karibu dada.." Alisema Maduhu akiwa ameegemea mlango, mwili wake nao ukionyesha kuchoka maradufu, kufumaniwa kwake kulimfanya kujiona mkosefu zaidi mbele ya Pendo.

"Mkeo yuko wapi?.." Suzan Aliuliza kwa sauti ya juu,akiikacha sauti ile ya kukaribishwa.

"Yupo ndani anamnyonyesha mwanaye"

alijibu Maduhu kwa sauti ya chini sana kwani hakuwa sawa kwa wakati ule aliofumaniwa akitaka kufanya mauaji kwa Sindelela.

Suzani alipo ambiwa kuwa Pendo yupo ndani, aliingia kumfuata. Alipofika sebuleni akapasa sauti akimuita, muda huo Pendo alikuwa yupo chumbani akilia kwa uchungu huku akimnyonyesha mwanaye. Pendo hakuitika zaidi ya kuendelea kuangua kilio,Suzani baada kuona wifi yake haitiki aliamua kusema ilimradi Pendo asikie.

"Pendo kesho asubuhi unahitajika ni nyumbani kwa mama,kutakuwa na kikao cha familia..nadhani umenielewa"

Alisema Suzani kisha akatoka ndani akampasha na kaka yake kuhusu kikao hicho cha familia. Maduhu aliahidi kuhudhuria bila kukosa.

"Sawa dada nitafika" Alisema Maduhu kwa sauti ya upole kabisa.

Suzani akawa ameondoka zake. Kule ndani Pendo alifikiria mambo mengi sana katika akili yake,mambo ambayo yaliuumiza moyo wake na kujikuta akilia bila kukoma.

"Kwanini mimi Eeh Mungu wangu? Kwanini mume wangu anakuwa na roho ya kinyama namna hii. Je, kiumbe chako hiki kisicho na hatia kimemkosea nini

mpaka afikie hatua ya kuthubutu kukiua? Ama kilema hastahili kuishi?.." Alisema Pendo huku akimtaazama Sindelela pale kitandani. Akarudia tena kumtaazama, safari hiyo alimnyanyua kisha akamuweka sawa kwenye mapaja yake tayari kwa kumnyonyesha.

Nje, Maduhu alishusha pumzi mara mbili mbili.

" Mpango wangu umegonga mwamba, Pendo kanifumanika nikitaka kumuua mtoto. Ukweli sifurahishwi na uwepo wa huyu mtoto, lakini hili ni langu rohoni. Itakuaje pindi Pendo atakapo nitangazia sifa hii? Ndugu suala hili watalichukulia kawaida. Je, upande wa jamaa na marafiki zangu waniona mtu wa aina gani?.. "

Alijiseema hayo Maduhu, akashusha pumzi kwa mara nyingine tena huku akizipiga hatua kutoka pale kwenye kisingiti cha mlango, akazipiga hatua kichwa chini mkono nyuma akielekea chini ya mti ule uliokuwa mbele ya nyumba yake. Alipofika aliketi kwenye kigoda kisha akaanza upya kulifikiria jambo lile.

"Maduhu, nimekukosea nini mume wangu wewe na ndugu zako?.." Ilisikika sauti ya Pendo ikisema maneno hayo. Maduhu akatoka kwenye dimbwi la mawazo baada kuyasikia hayo maneno ambayo yalipenya vema masikioni mwake, Maduhu alibaki kukaa kimya asijue cha kuongea. Pendo akaongeza kusema "Kwanini unafika mbali sana mpaka kutaka kutoa roho ya huyu mtoto? Kakukosea nini huyu malaika! Katu siwezi kuvumilia hivi vitendo, naomba taraka nirudi nyumbani kwetu!.." Hayo maneno yalimshtua Maduhu, akasimama pale alipoketi kisha akaondoka zake, hata asiseme jambo lolote na Pendo.

Kesho palipokucha asubuhi ndugu walifika kwenye kikao cha familia, Pendo alikuwa wa mwisho kufika kwenye kikao hicho, alijikuta akiambulia matusi na maneno ya dharau kutoka kwa baadhi ya wanandugu hao, wakiambiwa kuwa Pendo kadharau kikao chao. Pendo aliweza kujitetea akisema sababu iliyomchelewesha lakini sauti yake kamwe haikuweza kufua dafu kwenye umati huo wa wanandugu, zaidi aliambiwa akae kimya huku akishindikizwa na tusi kali lililo uumiza moyo wake.

"Mwanamke usiye na maana kabisa, mjinga sana wewe. Mbona sisi tuna watoto lakini tumewahi? Tena sisi watoto wetu kila sehemu wamekamilika itakuwa wewe mwenye mlemavu?.." Alisema mama mmoja mnene, aliyaongea maneno hayo kwa hamaki kubwa sana. Pendo hakusema neno lolote, alikaa chini huku akitikisa kichwa chake kama ishara ya kukataa jambo fulani.

Baada ya hayo kupita, baba mkwe wake Pendo alifungua kinywa chake kwa kuwasalimu ndugu wote walio fika pale. Mzee huyo aliitwa Masumbuko.

"Habari zenu wanangu.." Alisema mzee Masumbuko huku akiwatazama ndugu hao waliofika, walikuwepo

watoto wake wote wa kike na wa kiume. Alikuwa jumla na watoto wanne, watatu wa kike, mmoja wa kiume ambaye ndio Maduhu. Pia walikuwepo wadogo zake wawili mmoja wa kiume na mwingine wa kike, ndio huyo aliyemtamkia Pendo maneno makali ambayo yalimpelekea Pendo kuwa mnyonge. Ndugu hao waliposikia salamu hiyo ya mzee Masumbuko, kwa heshima na taadhima waliitikia salamu hiyo na kisha kumpa heshima yake, mzee Masumbuko aliitikia salamu hizo kisha akatulia kidogo huku akipiga mwayo. Mara baada kumaliza aliingia moja kwa moja kwenye hoja ya msingi ambayo iliwafanya wakusanyike mahala hapo. Mzee huyo alisema "Maduhu na mke wako naomba msimame" Maduhu aliposikia amri hiyo haraka sana alisimama akifuatiwa na mkewe. Wawili hao wote wakawa wamesimama. Maduhu na Pendo walipo simama, mzee huyo alimtazama Pendo kisha akamuuliza "Mama mkwe ni kweli unampenda sana mumeo?.."

"Ndio baba, sijui hata nielezeje.." Alijibu Pendo, huku upande wa pili ndugu wa mume wakimtazama kwa jicho la husda kana kwamba maneno ya Pendo yaliwachefua.

Mzee Masumbuko baada kupata jibu kutoka kwa Pendo. Alimgeukia Maduhu, akakohoa kidogo kisha akasema.

"Je, na wewe Maduhu, unampenda sana mkeo?.." Maduhu alipo sikia swali hilo alimtazama mama yake kwanza pia na dada zake bila kumuacha shangazi yake..wote kwa pamoja wakaonekana kutikisa kichwa kuashiria kuwa Maduhu akatae kuwa hampendi Pendo ilihali upande mwingine Pendo naye

alibaki kujiinamia akisubiri jibu Maduhu atakalo mpa baba yake. Hofu ilimjaa Pendo, aliamini endapo Maduhu atakubali kuwa anampenda basi atazidi kunyanyaswa na mawifi zake akiwemo mama mkwe wake ilimladi aachane na Maduhu,lakini endapo kama atasema hampendi.. vipi akiulizwa kwamba unawezaje kuishi na mwanamke ambaye hujampenda? Hapo Pendo alibaki njia panda,ila ukweli moyoni mwake ulijieleza, Maduhu hana tena hata lepe la upendo kwake ingawa kwa upande wake alimpenda mno Maduhu ndio maana licha ya kunyanyaswa lakini bado alivumilia.

"Mimi simpendi " Alisema Maduhu kwa sauti ya kusitasita, Pendo alipo sikia maneno hayo alishtuka akageuka kumtazama mumewe, asiamini kama angeliweza kusema maneno hayo,wakati kwingineko mama yake mkwe pamoja na mawifi zake walionekana kufurahishwa na jibu la Maduhu, waligongeeana viganja, nyuso zao zikionyesha tabasamu bashasha. Chози lilimtoka Pendo mbele ya familia ya ndugu wa mume,hapo ndipo akaamini kuwa manyanyaso yote Maduhu anayo fanyiwa ni kwa sababu hampendi. Pendo alilia sana mbele ya wanandugu hao,uvumilivu wa kuendelea kukaa pale ulimshinda akatimua mbio kurudi nyumbani kwake huku nyuma akiacha baba yake mkwe akiwa amejiinamia akiumizwa na machozi ya mkwewe yaliyomtoka mbele yake.

Kitendo hicho kilimfanya mzee huyo kuandamwa na mkewe,mama Maduhu kwa sauti kali alisema "kwahiyo umeumizwa sana na kitendo kile cha Pendo kulia? Hivi sio wewe na mimi tuliokuwa tukimshauri Maduhu aoe mtoto wa mzee Mzingima..yule nanii yulee.. Tundo..Sasa inakuaje mbona unaonyesha unafiki? Sikia nikwambie baba Maduhu, tena naomba unielewe vizuri. Maduhu lazima aachane na yule mwanamke upende usipende utake usitake.." Alipokwisha kusema hayo mama Maduhu alisimama,akaingia ndani,mzee Masumbuko alibaki mdomo wazi akikosa la kusema. Lengo la mzee huyo kuitisha kikao hicho ni kutaka kuwaweka sawa Maduhu na mkewe ili waondoe tafauti zao, mzee huyo baada kukaa vilingeni na wazee wenzake aliambiwa kuwa kumchagulia mchumba mtoto ni jambo ambalo limeshapitwa na wakati vile vile katika dunia hii hakuna binadamu aliyependa awe mlemavu bali ni makusudio yake Mungu tu kwa maana hata wadudu nao wapo walemavu. Mlemavu anatakiwa kupendwa bila kunyasika sababu hata yule mtu aliyekamilika viungo hajui hatma ya maisha yake hapa duniani kabla hajakumbwa na umati.

"Hujafa hujaumbika mzee mwenzangu.."

Maneno hayo ndiyo yaliyomfanya mzee Masumbuko kuitisha kikao cha familia ili kujenga umoja kati ya Pendo na mawifi zake pamoja na mumewe,lakini alishindwa kufanya hivyo baada Pendo kuondoka mapema kwenye kikao hicho.

Pendo alipo fika nyumbani kwake moja kwa moja aliingia chumbani kisha akakata kamba aliyokuwa akitundikia nguo,kamba ya katani ambayo aliifunga kitanzi kisha akaifunga juu kwenye dali. Machozi yakimtoka alimtaazama mwanaye kipofu Sindelea,akasikitika sana lakini aliona kujiua ndilo suruhisho la kuepuka matatizo pia aliona ni bora aanze kufa yeye kuliko kutangulia mwanaye ambaye aliponea chupu chupu kuuliwa. Pendo kabla hajajinyonga alitoka ndani huku moyo wake ukiwa umefura hasira,akaelekea dukani kwa Mduo akanunua kalamu na daftari ndogo ambayo alichana karatasi moja kisha akaketi kitandani akandika ujumbe atakao uacha pindi atapokuwa tayari amekufa. Pendo alizamilia kweli kweli kujiua,aliandika barua kwa uchungu na hasira kali moyoni mwake. Wakati huo akikumbuka maisha ya nyuma alipokutana na Maduhu kwa mara ya kwanza enzi hizo wapo shule mpaka kufikia hatua ya kuoana baada ya masomo.

"Pendo, unajua wewe mzuri sana?.." alisema Maduhu, muda huo walikuwa nje wakila vibumunda baada ya muda wa mapumziko

Pendo alicheka kisha akasema "Asante sana mume wangu mtarajiwa,ukweli hata wewe ni mwanaume mzuri sana. Na ndio maana nakupenda"

"Kweli?.." Aliuliza Maduhu.

"Ndio, darasa nzima sijaona mwanaume kama wewe. Laiti ningekuwa naweza ningeandika jina lako angani ili kila mtu alione na afahamu ya kwamba nakupenda.." aliongeza kusema Pendo huku akimchezea mashavu Maduhu. Yalikuwa ni mapenzi ya wazi bila kificho kati baina ya Pendo na Maduhu, walimu wanakijiji wote walilitambua hilo. Yote hayo Pendo aliyakumbuka, chozi lilimdondoka. Likidondokea kwenye karatasi ila hakujali aliendelea kuandika ujumbe huo anaotegemea kuuacha pindi atakapokuwa amefariki. Hakuishia hapo Pendo,alienda mbi zaidi kukumbuka siku ile aliyofunga ndoa na Maduhu. Japo ndugu hawakufurahishwa na suala hilo lakini Maduhu

hakujali, alipenda kutimiza ndoto yake aliyopanga kwa muda mrefu na Pendo. Ilikuwa ni nderemo na vifijo.

Pendo alishusha pumzi baada ya kukumbuka tukio hilo la furaha, akainua uso wake akakitazama kitanzi kisha akajiuliza "Kwanini Maduhu kabadirika kiasi hiki? Uko wapi upendo wa dhati alioniahidi?.."

Chози lilimtoka Pendo likidondokea kwenye karatasi yake, baada kumaliza kuandika barua hiyo, aliweka mezani akamtazama mwanae kwa mara ya mwisho kisha akakivaa kitanzi huku akiwa amesimama juu ya stuli..pole pole Pendo akaisukuma hiyo stuli hiyo. Pendo akawa amejiua kwa kujinyonga ilihali muda huo anakata roho mwanae aliamka akaanza kulia akihitaji mikono ya mama yake!

Sehemu ya 04.

Lakini hakuipata ambapo mwishowe alianza kulia kwani alikuwa amelala kwa muda mrefu, hivyo Sindelela alionyesha kuchoka kitendo kilicho mpelekea kuangua kilio. Wakati huo sasa baada kikao cha familia kuharibika, Maduhu alikwenda shamba kumalizia kulima eneo ndogo alilokuwa amebakisha siku ya jana. Pindi alipokuwa analima, akilini alikuwa na maswali kibao ambayo aliyakosa majibu yake. Maduhu alijiuliza.

"Kwanini kila ninapo jaribu kumfanyia vitimbwi Pendo ili aachane na mimi hataki kunielewa? kapewa moyo gani huyu mwanamke? Na vipi alivyonifumania nikitaka kumuua Sindelela, atakuwa ananichukuliaje? Hivi hatosema kwa watu? Na kama akisema wanakijiji watanichukulia vipi Maduhu mimi!"

Yote hayo Maduhu alijiuliza akiwa shambani akiendelea kulima, mwishowe alishusha pumzi kwa kasi kisha akafuta jasho jembamba lililokuwa likibubujika usoni, akatulia kidogo huku akionekana kutafakari jambo fulani. Badaye aliendelea na kazi. Baada kumaliza aliweka jembe begani akaanza safari ya kurudi nyumbani, alipokuwa njiani alirudia kujiuliza juu ya lile suala la kufumaniwa na mkewe pindi alipotoka kumuua mwanae, Maduhu suala hilo alilifikiria mara mbili mbili, akanona ni heri akamkanye mapema mkewe ili asiye akavujisha habari ile. Ibaki kama siri Kati yake na yeye. Maduhu

hakuishia hapo, alijigamba kuwa atamtishia maisha Pendo endapo kama atathubutu kupingana naye, asijue ya kwamba kabla hajafanya hivyo tayari Pendo ameshajikatisha maisha. Maduhu aliona mawazo yake yapo sawa kabisa, haraka sana alikazana mwendo kuelekea nyumbani kwake. Lakini kabla hajaikaribia nyumba, alishtuka kusikia sauti ya mtoto akilia, alipo sogeza zaidi nyumbani kwake alipasa sauti kumuita Pendo.

Maduhu hakuitikiwa licha ya kwamba aliita mara tatu mfurulizo. Baada kuona kimya alihisi Pendo katoka, hivyo aliweka jembe lake chini kisha akatulia chini ya mti uliokuwa jirani ya nyumba yake, akakaa hapo kumgojea Pendo arudi ili amchukue mwanaye ambembeleza. Maduhu hakutaka kabisa kumgusa Sindelela.

Muda ulisogeza Pendo akiwa bado hajatokea huku Maduhu naye akionekana kukunja uso kuashilia kukerwa na kitendo hicho cha Pendo kukawia kurudi nyumbani, wakati huo baada mtoto kulia kwa muda mrefu hatimaye sauti ilitoweka. Sindelela akawa analia bila sauti kusikika. Naye Maduhu alipoona hali hiyo hima alinyanyuka kutoka mahala alipokuwa amekaa kisha akaingia ndani ili aangalie kama mtoto kanyamanza mwenyewe au kakaukiwa Sauti. Ghafla Maduhu akajikuta anapigwa na bumbuwazi baada kumuona Pendo akiwa amening'inia kwenye kamba, kajinyonga. Maduhu alipagawa akajikuta akiuliza.

"Kweli ni wewe mke wangu Pendo umeamua kuchukuwa maamuzi haya? ama macho yangu yanaongopa? .."

Alijiuliza Maduhu huku akilia..wakati huo huo akiikumbatia miguu ya Pendo iliyokuwa ikining'inia. Swali hilo Pendo hakulijibu, kwani tayari roho yake ilikuwa imeondolewa katika mwili wake. Bado Maduhu hakuamini machoni mwake, aliendelea kuangua kilio huku akipasa sauti kumuita Pendo.

Punde si punde Maduhu alipokuwa katika hiyo hali ya taharuki, ghafla macho yake yakaona karatasi juu ya meza. Hima aliiachia miguu ya Pendo kisha akaichukuwa ile karatasi ambayo alihisi itakuwa na ujumbe aliouacha marehemu Pendo, akaikunjua kwa umakini wa hali ya juu na kisha kuanza kuisoma kwa huzuni ilhali machozi yakimtiririka.

MPENDWA MADUHU,NAJUWA UTASHANGAA SANA MIMI KUAMUA KUCHUKUWA UAMUZI HUU. LAKINI ILINIBIDI NIFANYE HIVI KWANI NILIONA DUNIA IMENITENGA KWA NAMNA MOJA AMA NYINGINE. KWA KIPINDI KIREFU SANA NILIKUWA NAKINYWA KIKOMBE CHA MATESO,NIMEJITAHIDI ILI NIKIMALIZE KWA KUAMINI KUWA SIKU NIKIKIMALIZA BASI NITAPATA AHUENI. ILA SIVYO NILIVYOKUWA NIKIDHANIA,KWANI NILIONA KAMA MATESO HAYO HAYAPUNGUI KWENYE KIKOMBE CHANGU..HASA PALE NILIPO KUONA UKITAKA KUMUUA MWANANGU NILIYEMTUNZA TUMBONI MIEZI TISA HUKU NIKIMZAA KWA UCHUNGU.NILIUMIA SANA,MAUMIVU AMBAYO NISINGEWEZA KUMWELEZEA MTU YOYOTE. HIVYO NIMEONA BORA NITANGULIE MIMI KISHA ANIFUATE MWANANGU..NADHANI PIA KUCHUKUWA UMAMUZI HUU NITAIFANYA FAMILIA YAKO KUISHI KWA AMANI MAANA WASIYE MPENDA HAWAPO NAE TENA. NILIKUPENDA SANA MADUHU ILA THAMANI YA PENDO LANGU ULILONA TAKATAKA,SASA CHUKUWA YULE UNAYE MTAKA.. CHAGUO LAKO, CHAGUO LA NDUGU ZAKO. .wako Pendo nakutakia maisha MAREFU yenye amani tele kwaheri! "

Maduhu alipo maliza kuisoma barua hiyo..chozi lilimtoka kwa mara nyingine tena, uvumilivu ulimshinda mwanaume huyo akajikuta analia kwa sauti kuu huku akilitaja jina la Pendo, na bila kuchelewa alitoka ndani mbio akakimbia kuelekea nyumbani, alimkuta mama yake akitoka ndani na bakuli kubwa lililo jaa Unga akielekea kwenye kibanda ambacho ni jiko. Kabla mama huyo hajaingia ndani hicho kibanda,Maduhu alifika huku akihema kwa nguvu. Mama huyo alimshangaa sana mwanaye.

Akajiuliza

"Kakutwa na nini?"

Muda huo Maduhu alikuwa anaituliza pumzi yake ili aseme kile alichokishuhudia.

"Mama..Pendo..Pendo maama..ooh Mungu wangu mimi..Pendo mama kaka...ji.."

Alihaha Maduhu akitaka kusema alichokuta nyumbani kwake, kabla hajaeleweka alianguka chini akapoteza fahamu. Mama Maduhu alipoona

kitendo hicho aliweka chini bakuli lake la Unga, akapiga mayowe akishtusha na jambo hilo.

"Pendo?...mmh atakuwa kafanya nini"

Alijuliza mama huyo huku akisafa kumuamsha mwanaye aliyepoteza fahamu. Suzan muda huo alikuwa nyuma ya nyumba akichambua mboga ya maboga(Msusa) aliposikia mayowe ya mama yake, alisitisha kufanya kazi hiyo, alisimama haraka sana akaenda kushuhudia kipi kimetokea. Muda mfupi mzee Masumbuko naye alitoka ndani, majirani nao wakafurika vema nyumbani hapo kwa mzee Masumbuko.

Suzan kwa sauti ya taharuki akamwambia mama yake kuwa waende nyumbani kwa Maduhu ili wakaangalie kimtokea nini.

"Sawa mwanangu twende!.."

Alisema mama Maduhu kisha wakatimua mbio kuelekea huko. Walipofika hawakuamini macho yao, walipagawa baada kumuona Pendo kajinyonga. Walitazamana kila mmoja akishindwa amwambie nini mwenzake,yote kwa yote hawakuwa na budi kukubaliana na hayo,kila mmoja aliumia kwa upande wake. Taratibu za mazishi zilifanyika kesho yake. Simanzi zilitanda msibani, Maduhu aliumia sana alipoliona jeneza la Pendo.

R.i.p Pendo Mapangala.." Ndivyo jina lilivyoandikwa kwenye msaraba uliowekwa juu ya jeneza lililouhifadhi mwili wa Pendo. Maduhu aliumia sana baada kuliona jeneza hilo.

Akajikuta anakumbuka mema aliyawahi kumfanyia Pendo akiyasahau mabaya. Hivyo baada kukumbuka hayo akaona kuwa amempoteza mtu muhimu sana maishani mwake,hali hiyo alimfanya kuwaona ndugu zake ni maadui wakubwa katika maisha yake. Muda huo upande wa pili mama Pendo ambaye tayari ni bibi kizee alilia sana kwa uchungu huku akiwa amempakata mjukuu wake ambaye si mwingine Sindelela kipofu..bibu huyo alisema kwa sauti iliyoshikamana na kilio "Kwanini umeondoka mwanangu? Umeniachia mtoto mdogo sana mwanangu. Rudi umkuze Sindelela wako, umeondoka akiwa bado anakuhitaji. Rudi Pendo Rudi mwanangu" Alisema maneno hayo mama Pendo huku akilia. Mapigo ya moyo wake yalikwenda kasi, akahisi kizunguzungu, hali ambayo ilimshinda kustahimili. Tukio hilo la kusikitisha

ambapo lilimchanganya sana,akawa amepoteza fahamu ilihali muda huo huo nyimbo PARAPANDA LITALIA ilisikika huku jeneza la Pendo likiwa juu,mwili wake ukipelekwa kwenye makazi ya milele. Maduhu hakuamini alichokuwa anashuhudia, aliona kama igizo katika mboni zake.

Sehemu ya 05.

Kwa kutumia shati yake kukuu, Maduhu alijifuta machozi yake akapiga moyo konde huku akiamini kuwa ndio basi tena hatomwona Pendo machoni mwake. Hakika roho ilimuuma sana tena zaidi ya sana hadi akajikuta anajutia yale mabaya yote aliyowahi kumfanyia Pendo enzi za uhai wake,ilihali akitamani japo Pendo alirudi duniani kwa muda mchache tu ili aweze kumwomba msamaha. Lakini hilo ni jambo ambalo halikuwezekana.. Pendo alizikwa huku Maduhu akishuhudia. Kitendo hicho kilimfanyia Maduhu kusongwa na mawazo ya ghafla yaliyoweza kutawala ubongo wake ambapo mawazo hayo kwa jinsi yalivyokuwa mengi vile vile yakiwa na uzito wa aina yake yalimfanyia bwana Maduhu kugeuka kichaa. Maduhu alikuwa kichaa siku ile ile alipoona chepe ya mwisho yenye udongo wa kaburi likimfukia mke wake. Sauti ya mayowe ilisikika,wazikaji pamoja na watu waliokuwepo pale kaburini waligeuka kutazama kule ilipotokea sauti ya Maduhu. Wakastaajabu kumwona Maduhu akilia huku akimtaja Pendo, hali ambayo iliendelea mpaka mwisho wa mazishi. Na baada ya siku mbili kupita ndipo uchizi wa Maduhu ulipo jidhilisha,ndugu na jamaa pia marafiki zake walifaham hilo fika bila chenga kuwa Maduhu kawa kichaa. Kwani kuna muda mwingine hasa hasa saa za jioni,Maduhu alikuwa anaenda kulilia kwenye kaburi la Pendo huku akiomba msamaha.

Kwa hakika hali hiyo ya Maduhu kuchizika iliwasikitisha sana wazazi wake,baba Maduhu akamtwisha mzigo wa lawama mkewe kwamba yeye ndio chanzo cha hayo yote. Lakini mama Maduhu hakupenda lawama hizo alizokuwa akitupiwa na mumewe kila uchawo na ndipo siku moja aliweza kuketi na mumewe na kisha kumwambia kuwa huwenda mtoto wao karogwa,jambo ambalo lilimshtua baba Maduhu akamuuliza "unauhakika gani? .." mama Maduhu akakosa jibu la haraka la kumjibu mumewe akaishia kutazama chini huku akitafakari aseme nini. Lakini kabla hajasema

alichokuwa anakifikilia, baba Maduhu akaongeza kusema "mimi huwa siamini uchawi katika maisha yangu, mtoto huyu kaharibika kwa sababu ya mawazo ya kumfikilia mkewe. Mama Maduhu mara ngapi nimekuonya wewe na mwanao kuhusu kuingilia maisha ya Maduhu na marehem mkewe?..tazama sasa haya ndio matokeo yake, kumbuka yule mwanamke alivumilia mengi sana. Manyanyaso chungu nzima alifanyiwa lakini alipiga moyo konde akiamini ipo siku yatakwisha ila baada kuona hayana dalili ya kuisha? Hakuwa nabudi kujipumzisha.. hivyo usimtafute mchawi Bi Nzelele, mchawi ni wewe na mwanao. Pumbavu zenu" alisema baba Maduhu kwa hasira kisha akainuka kwenye kigoda akaingia ndani.

Upande wa pili, Bi Mandawa ambaye ndio mama Pendo alionekana akimbembeleza mjukuu wake Sindelele alikuwa analia sana. Bibi huyu alifanya jitihada za kumnyamanzisha Sindelele lakini hakuweza kufua dafu, mtoto huyo bado alizidi kulia kwa sauti kali..kitendo kilicho mfanya Bi Mandaw kumkumbuka mwanae ambapo alijiuliza "kwanini mwanangu umeniachia huyu maraika? Kwanini hukungojea akuwe kisha uchukue maamuzi hayo?." alijiuliza Bi Mandawa maswali ambayo yaliusononosha moyo wake akajikuta analindosha chozi huku akimtazama mjukuu wake kipofu Sindelele ambaye nae kwa wakati huo alikuwa akilia kwa sauti akitaka kunyonya.

Lakini pindi mtoto Sindelele alipokuwa analia, ghafla alikuja rafiki yake Bi Mandawa. Anaitwa Bi Kasigile. Urafiki huo wa Bi Mandawa na Bi Kasigile ulianza kitambo sana toka enzi za utotoni, hivyo siku hiyo Bi Kasigile alikuja kumtembelea rafiki yake wa kufa na kupona pia akija kumpa pole kwa msiba alio upata wa kuondokewa na mwanae pekee. Kwahiyo baada Bi Kasigile kufika nyumbani hapo alihuzunika sana kumkuta rafiki yake akidondosha machozi huku mjukuu nae akilia bila kukoma. Hakika Bi Kasigile aliumia sana wakati huo nae akifuta machozi mepesi yaliyokuwa yakimtililika mashavuni kwake. Baada ya hapo Bi Kasigile alimsogelea bibi yake Sindelele akamshika bega na kisha kusema, "pole sana rafiki, nyamanza acha kulia. Naomba ujitahidi sana kuwa mvumilivu kwa kipindi hiki kigumu, chukulia jambo hili kama jaribu kwako..hivyo hutakiwi kulia bali ni kumwomba mungu azidi kukupa maisha marefu ili uweze kulishinda jaribu hili. Mlee mjukuu wako ja..." kabla Bi Kasigile hajamalizia sentesi yake, alifuta macho kwanza kwani wakati wote huo alikuwa anayasema hayo huku akilia..hivyo baada kujifuta

machozi aliendelea kusema "Mlee mjukuu wako japo kipofu ila natumaini mungu atafanya miujiza yake" alisema Bi Kasigile kisha akamchukuwa Sindelela kutoka mkononi mwa bibi yake akampakata huku akimtaazama usoni kwa huruma. Na mara baada kumtaazama kwa muda mrefu, alimgeukia Bi Mandawa halafu akaamuuliza "tangu msiba umalizike umekuwa ukimpa chakula gani?.." pumzi alishusha Bi Mandawa kisha akajibu "nampa maziwa ya ng'ombe mepesi lakini jana usiku yameniishia ndani, na mimi pesa ya kununua mengine nimeishiwa..kwahiyo hapa nilipo sielewi nifanyeje mimi" alijibu Bi Mandawa kwa sauti ya upole iliyojaa huzuni ndani yake huku mkono akiwa ameweka shavuni.

"Usijali nipo tayari kukusaidia, nitaliua shamba langu la kule bondeni, fedha nitakayo pata yote nitaweka oda kwa wafugaji wamasai ili kila siku ukachukue maziwa. Mpaka oda itakapo malizika nadhani mtoto atakuwa amezoea kula chakula cha kawaida. Tume toka mbali sana, wewe ni kama ndugu kwangu" alisema Bi Kasigile. Hakika Bi Mandawa alishukuru sana.

Na wakati hayo yanajili kwa vikongwe hao, kwingineko mama Maduhu pamoja na Suzani walikuwa wamekaa kwenye mkeka wakijadili namna gani ya kumuokoa Maduhu ambaye amegeuka kichaa. Lakini kabla hawajapata muafaka wa jambo hilo, mara ghafla akatokea mwendawazimu Maduhu huku mkononi akiwa ameshika panga ikiwa uso wake nao ukionyesha dhahiri kuna jambo tata anataka kulifanya. Suzani na mama yake wakastuka kuona hali hiyo, hofu ikawatanda huku ukimya na utulivu nao ukichukua nafasi yake mahali hapo.

"mnaniteta si ndio?..", Maduhu aliuliza. Suzani akakanusha kwa sauti ya woga. Punde si punde Maduhu akaongeza kusema kwa hasira.

"Namtaka mke wangu, la sivyo naondoka na kichwa cha mtu hapa".

Sehemu ya 06.

Mama Maduhu alishtuka, alishangaa kumuona mwanaye ameshika upanga huku akionyesha kudhamilia kufanya alichokuwa akikisema. Woga ulimjaa Suzani, hima akajificha nyuma ya mgongo wa mama yake akihofia kujeruhiwa na Maduhu.

"Maduhu acha utani bwana,panga hilo Maduhu panga hilo". Alisema mama Maduhu huku akirudi nyuma pole pole hali yakuwa Maduhu naye akizidi kumsogelea mkono juu ulioshika panga,kitendo ambacho kilimtia hofu sana Suzani. Aliona heri akawaambie majirani kwamba Maduhu anataka kuwajeruhi,haraka sana aling'atuka nyuma ya mgongo wa mama yake akatimua mbio huku akipiga mayowe akielekea nyumbani kwa mzee Ngulo rafiki wa karibu wa baba yake, nia ni kumwambia hali harisi anayotaka kufanya Maduhu. Kumbe pindi Suzani alipokuwa katika harakati hizo za kuelekea nyumbani kwa mzee huyo,huku nyuma yake Maduhu alikuwa akimfuata kwa kasi ili amalizane naye kabla hata hajafika kule aendako.

Mama Maduhu alipoona hali hiyo akajua dhahili mwanaye yupo hatarini atakufa,hivyo alipasa sauti akimwambia Suzani aongeze kasi ya kukimbia

Naye aliposikia yowe hilo aligeuka nyuma akamuona kaka yake akiwa na panga mkononi akimkimbiza,aliogopa sana Suzani, ndipo alipoongeza kasi maradufu kumkimbia Mwendawazimu Maduhu. Lakini mwishowe alichoka kikimbia, kiwewe cha woga kilimfanya apitilize nyumba ya mzee Ngulo akajikuta anakimbia bila mpangilio,hatimaye alichoka akabaki kusubiri chochote kitakacho tokea mbele yake.

Upande wa pili katika kilinge kidogo cha kunywea kahawa na chai ya tangawizi kijijini hapo hasa hasa saa za jioni,walisikika vijana kadhaa wakipiga zogo mbili tatu. Kijana mmoja wa makamo alisikika akisema "mjue tangu Pendo afariki Maduhu haeleweki kabisa.."

"Nasikia kwanza kawa kichaa kabisaaa, sasa sijui kama ni kweli au uongo maana mimi toka msiba uishe sijamtia tena machoni", alidakia kijana mwingine ambaye ndio muuzaji wa kahawa na chai ya tangawizi. Aliitwa Onesmo huku yule aliyeanzisha mada kuhusu Maduhu,yeye aliitwa Kadiri.

Kadiri aliposikia maneno ya Onesmo alichukuwa kikombe kwanza cha kahawa kisha akasema.

"Nitilie kwanza kahawa humu halafu hayo mengine ndio yafuate.Tangu lini wazazi wako wakaingilia mahusiano yako na mkeo,halafu wewe mwanaume kabisa unabweteka unashindwa kuweka msimamo wako? ", alisema Kadiri

kwa hamaki kubwa huku moyoni akitamani japo siku moja imtokee kwa upande wake kama ilivyokuwa kwa Maduhu ili aonyeshe uanaume wake kwa nduguze pia na jamii kiujumla kijijini hapo.

Alibugia bunda ndogo kiasi la kawaha kisha akaweka kikombe chini wakati huo akionekana bado anamaneno mengine ya kuongea lakini kabla hajasema chochote alikuja kijana mwingine huku akihema kwa nguvu kana kwamba alikuwa anakimbizwa. Watu wote waliokuwepo pale kilingeni walitaharuki huku wengine wakimuuliza kipi kimemsibu,kijana huyo hakusema chochote,bado alikuwa anayatuliza pole pole mapigo ya moyo wake ambayo yalikuwa yakimuenda kasi muda huo kama saa mbovu. Na mara baada kutulia alisema", jamani nimekimbizwa na Maduhu akiwa na upanga mkononi,nilikuwa natokea shamba. Nilipokutana naye akaniuliza umemuona wapi Suzani? Nikamjibu sijui. Ghafla akaanza kunitimua mbio."

Vijana hao waliokuwepo hapo kilingeni walitazamana,kila mmoja alimtaazama mwenzake.Ghafla kimya kilitawala kidogo lakini mwishowe kimya hicho kilivunjwa na sauti ya kijana mwingine ambaye alisikika akisema "huyu jamaa tabia hii anayotuletea sio nzuri hata kidogo,sasa hapa itabidi sheria ifuate mkondo wake. Atatutia jamba jamba mpaka tukome wakati sisi wengine tunaheshima zetu bwana..akha",alisema kijana huyo huku akionekana kughazibishwa na kitendo cha Mwendawazimu Maduhu.

"Kwani hakuna jela ya vichaa?..", aliuliza kijana wa pili.

"Ipo tena kila kona ya nchi yetu" alijibu kijana wa tatu.

Punde si punde alitokea Suzani akiwa mnyonge,aliwasalimu vijana hao. Yule kijana aliyekimbizwa na Maduhu alipomuona Suzani aliamaki huku akisema "We kaka yako alitaka kunitoa roho kwa ajili yako kwani ulikuwa wapi?.."

"Jamani hata mimi nimemkimbia yeye alitaka kuniua mimi na mama,hapa nilipo siamini kama nipo hai",alijitetea Suzani.

"Kisa nini?..", aliuliza Onesmo. Suzani kabla hamjibu Onesmo, Kadiri alidakia kwa kusema.

"Hakuna kuficha jamno,nyie mlimteka mawazo Maduhu akawa hamjali mkewe. Kwahiyo baada mkewe kujiua kao...",kabla Kadiri hajamaliza kusema,

ghafla alistuka kuwaona wenzake wakikimbia, alipogeuka nyuma yake akamuona Maduhu akiwa tayari amemkaribia na panga mkononi. Aliogopa Kadiri lakini tayari alikuwa amechelewa kwani Maduhu alikwisha mkaribia. Akajikuta akijeruhiwa na mwendawazimu.

Siku iliyofuata Maduhu alitiwa hatiani, kwenye mkono wa sheria ambapo baada kesi kuunguruma kwa siku kadhaa mahakamani akakutwa na hatia ya kutishia maisha baadhi ya raia na pia kumjeruhi raia. Hivyo alijikuta akihukumiwa jela miaka kumi na mitano.

Kwingineko maisha ya Bi Mandawa na kijukuu chake Sindelela yalizidi kusonga japo kwa utepe lakini hivyo hivyo Mungu alisaidia, mtoto huyo kipofu chakula chake kilikuwa ni maziwa ya ng'ombe huku joto nalo akilipata kutoka kwenye blanketi. Hatimaye Sindelela alifikisha umri wa miaka mitano ilihali akiwa hajawahi kusikia sauti ya mama yake wala kugusa kifua cha mama yake wala kuona Dunia namna ilivyoumbika na vitu vilivyomo. Pendo alimuacha Sindelela akingali mdogo sana lakini juhudi za Bi Mandawa ambaye ndio mama Pendo zilimfanya Sindelela kukua japo kwa taabu. Bi Mandawa alimshukuru sana Mungu kwa hatua hiyo, lakini pia hakuweza kumsahau rafiki yake kipenzi Bi Kasigile. Mchakato wa kumtengezea fimbo mjukuu wake ulianza,, fimbo itakayompa mazoea ya kumuongoza pindi atembeapo. Alipoipata alimkabidhi ambapo kipofu Sindelela alipo ipokea alimuuliza bibi yake ambaye kwa upande wake alimuita mama. "Mama nikiwa mkubwa na mimi nitaona?..", maeneno hayo ya Sindelela yalimtoa machozi Bi Mandawa akakumbuka siku ile mara ya kwanza anamchukua Sindelela ilihali akiliona jeneza lililobeba mwili wa mwanaye likipelekea kwenye makazi ya milele. Akalikata chozi lake katika mboni zake, pumzi ndefu akashusha kisha akajibu.

"Ndio mwanangu wala usihofu sababu hata mimi inasemekana nilikuwa kama wewe lakini baada ya miaka kadhaa nikaona. Sawa sawa?.."

"Kweli mama yangu?..", aliuliza Sindelela kwa mara nyingine tena. Bi Mandawa akajibu "Ndio ya nini nikudanganye mwanangu kipenzi Sindelela?.."

Sindelela alifurahishwa sana na jibu hilo, furaha iliyopelekea kuongeza kusema "Natamani nikuone mama yangu, najua umefanana na mimi kila kitu", alipokwisha kusema hivyo akaachia tabasamu pana. Maneno hayo ya

Sindelela aliyokuwa akiyasema huku akitabasamu yalizidi kumchoma moyoni Bi Mandawa, ghafla alidondosha machozi kwa mara nyingine tena huku akimtazama mjukuu wake kwa jicho la tatu. Moyoni akajisemea "Pendo laiti ungekuwepo? Katu furaha hii ya mwanao isingetoweka machoni pake! Kwanini uliondoka Pendo?.."

"Natamani ungelikuwa hai ili umuone jinsi mwanao ulivyo fanana naye. Lakini hukutaka kabisa ukaona heri umuache akingali anakuhitaji", aliongeza kusema Bi Mandawa kwa sauti ya upole kabisa iliyojaa huzuni kubwa ndani yake. Moyo ulifura maumivu, katu chozi halikukatika katika mboni zake jambo ambalo lilimpelekea kulilia moyoni Bi hali ya kuwa kipofu Sindelela akionekana kuwa na wingi wa tabasamu baada kusikia kwamba pindi atakapo kua mkubwa ataona kama ilivyo kwa bibi yake ambaye upande wake alijua ni mama yake.

Sehemu ya 07.

Siku zilisonga miezi ikasogea miaka nayo ikajongea, Sindelela alifikisha miaka Kumi na mbili. Hapo sasa ndipo urembo aliobarikiwa huyo kigori ulipoanza jidhihirisha kijijini.

Kila mvulana alitamani amtokee bila kujali ulemavu alionao kwani kijiji kizima mpaka kijiji jirani hakuna binti aliyekuwa na uzuri kumzidi Sindelela, uzuri huo uliweza kuwavutia baadhi ya kina mama wa kijiji hicho cha Mzanga.

Walitamani wakati wote Sindelela akae karibu yao ili wamtazame tu maana Sindelela kwa kumtazama alivutia vyema ukimwangalia kamwe hutotamani kuangalia sehemu nyingine.

Jamii ya kabira la wasukuma baadhi walikuwa wakipishana mara kwa mara kufika nyumbani kwa Bi. Mandawa kumuuliza idadi gani ya ng'ombe atahitaji ili wawekeze mapema kwa Sindelela, lakini Bi. Mandawa hakuwa tayari kwa oda hizo alikataa katu katu kwani aliamini huwenda mjukuu wake akateseka kama ilivyokuwa kwa marehemu mwanaye.

Sio hao tu bali hata makabila mengine yaishio kijiji hicho cha Mzanga yalitamani kigori Sindelela ila bado Bi. Mandawa aliweka kikwazo hicho kuwa mjukuu wake yupo katika hali hiyo ya upofu basi ataishi naye nyumbani

kwake mpaka mwisho wa uhai wake,huku akiamini kwamba hao wanao jitia kuvutiwa naye ni sababu ya mihemko ya miili yao na sio kimapenzi kutoka moyoni.

Lakini hali hiyo ya ugeni wa mara kwa mara uliomjia kwa dhumuni la kumtaka Sindelela ulizidi kuwa endelevu, ni kitendo ambacho kilimuogopesha sana Bi. Mandawa. Hivyo aliona ni heri amkalisha kitako mjukuu wake ili aweze kusema naye kabla mambo hayajaenda kombo.

"Sindelela mwanangu,wewe bado mtoto mdogo sana. Kwahiyo nakuomba kuwa makini sana na wavulana wanao kusifia kuwa wewe ni mzuri,wengi wao huwa ni waongo wanaendeshwa na mihemko ya kimwili. Hivyo basi endapo mvulana yoyote akikwambia anakupenda na anatamani siku moja uwe mkewe,mwambie aje aongee na mimi kwanza au muulize mimi ni kipofu nitakusaidia nini katika maisha yako? "

"Akikupa jibu sahihi mwambie aje nyumbani. Sawa mwanangu!? Vile vile usipende kutembea kwenda mbali hatakama uko na marafiki zako unanitia wasi wasi mama yako. Tambua wewe huoni chochote usiwaamini sana marafiki,sawa mwanangu?.."aliendelea kusema Bi. Mandawa kwa sauti ya chini iliyojaa unyenyekevu mkubwa ndani yake.

"Sawa mama, lakini nakumbuka niliwahi kukuuliza swali. Nilikuuliza nikikua nitaona? Ukanijibu ndio. Sasa mbona nimekua na sioni? Mama natamani nikuone jinsi ulivyo fanana na mimi,watu wengi wananiambia mimi mrembo. Natamani kuuona urembo wako ili nijue huu urembo wangu nimeupata kwako au lah!",alijibu Sindelela,safari hiyo tabasamu alilokuwa akilionyesha mara kwa mara lilikuwa limetoweka. Zaidi alidondosha machozi.

Bi. Mandawa akaumizwa na kitendo hicho cha mjukuu wake kumwaga machozi, upesi akawaza kipi afanye ili hali hiyo itoweke. Angefanya nini sasa? alimtia moyo kwa kumwambia kuwa atakapo fikisha miaka ishirini na tano macho yake yataona kila kitu hapa Duniani. Ni jambo ambalo lilimstua sana Sindelela.

" Kwani nina miaka mingapi?", aliuliza kwa sauti ya upole iliyojaa huzuni ndani yake huku akipandisha kamasi jepesi.

"Kumi na miwili", Bi. Mandawa alimjibu. Jibu hilo lilimnyong'onyesha sana Sindelela kwani alitamani aione Dunia na vitu vyake, alitamani pia amuone mama yake, pasipo kujua kwamba mama yake ameshaaga Dunia miaka mingi iliyopita.

Kmya kidogo kilitanda mahali hapo walipo kuwa wameketi. Chini ya mti uliokuwa kando ya nyumba. Mwishowe baada Bi. Mandawa kumuelezea mjukuu wake juu ya waja, hatimaye alimshika mkono akamuongoza kuelekea chumbani kwake ili alale apunguze usongo wa mawazo ulio kuwa ukiushambulia ubongo wake.

Hayo ndio yakawa maisha ya kipofu Sindelela pamoja na bibi yake. Japo maisha yalikuwa ya shida ila Bi. Mandawa hakutaka hata siku moja mjukuu wake ateseke, alijitahidi kuwa mkali kwa watoto waliokuwa wakimnyanyapaa. Kamwe hakupenda kuona mjukuu wake akilia wala kujutia jambo fulani, alifanya juu chini kumuweka kipofu Sindelela katika hali ya furaha, vile vile hakuwa nyuma kumpatia darasa juu ya kuishi na walimwengu. Zaidi jambo pekee ambalo Bi. Mandawa alikuwa akijitahidi kila kukicha, ni kumuweka Sindelela katika hali ya kutofahamu ukweli juu ya mama ambaye amekwisha fariki. Ni jambo ambalo Bi. Mandawa alilifanikisha, kwani Sindelela toka utotoni hadi katika hali ya kujitambua alifahamu fika Bi. Mandawa ndio mama yake.

Kwingineko Suzani naye tayari alikuwa na mtoto. Mtoto wa kike ambaye alifahamika kwa jina Chiku. Alipewa mimba, aliyempa hiyo akaikana. Hivyo wakati Bi. Mandawa anahangaika kumlea Sindelela, Suzani naye alikuwa akimlea mtoto wake. Chiku na Sindelela wakawa wamepishana mwaka mmoja na miezi kadhaa.

Baada kupita zaidi ya miaka mitano, jioni moja Suzani alimkumbusha mama yake kuhusu mtoto aliyeachwa na marehemu Pendo. Mama Suzani alistuka na kisha kuvuta kumbukumbu, alikumbuka kuwa ni kweli Pendo alimuacha mtoto mdogo ambaye alizaa na Maduhu.

"Kabisa ile ni damu yetu, mtoto yule endapo kama tukimleta hapa nyumbani atatufariji sana ustoshe hata baba yake akimaliza kifungo chake atakapo rudi nyumbani atafurahi sana kumuona mwanaye ..", alisema Mama Maduhu huku akiachia tabasamu pana.

Suzani alikaa kimya kidogo kabla hajaongeza neno lingine, alitazama juu kwanza kisha akashusha pumzi ndefu halafu akasema. "Lakini unakumbuka kuwa yule mtoto ni kipofu? Je, utaweza kumlea jinsi ipasavyo?.."

"Ndio nitaweza, nina imani uwezo huo ninao tena kwa asilimia mia moja. Hebu fikiria mpaka sasa anamiaka mingapi? Kigori tayari kwahiyo siwezi kushindwa", alijibu mama Suzani huku akionyesha kujiamini. Punde akakumbuka maisha ya zamani kidogo. Maisha ambayo alikuwa akiishi kwa kumnyanyasa Pendo kwa madai kuwa hana uwezo wa kuzaa yaani tasa. Lakini pia hata baada kupata mtoto wakadai amewazalia mtoto kipofu zaidi wakiadini kuwa Pendo sio chaguo lao. Mwisho wa yote mama Maduhu akajikuta akijionea haibu. Hatimaye wawili hao, mama na mwana wanaona ipo haja ya kumfuata Sindelela kwa bibi yake ili ikiwezekana waishi naye.

Wakati wawili hao walipokuwa wakipanga mkakati wao, upande wa pili Chifu wa kijiji cha Angaza alikuwa yupo katika mikati ya kutaka kuandaa karamu itakayo hudhuriwa na vijiji jirani pia, nia na madhumuni ya karamu hiyo ni kuwataka vigori waje kucheza ngoma wakiwa wamependeza. Na kigori atakaye kuwa amependeza sana na kucheza ngoma vizuri basi atapata zawadi nono kutoka kwa Chifu. Karamu hiyo ilikuwa ikifanyika kila mwisho wa mwaka, licha ya kusherehekea pia iliweza kutoa mrembo wa kijiji ambaye huchaguliwa na Chifu.

Jambo hilo likapitishwa. Chifu akamuita kibaraka wake akamwambia apige mbiyu kuwataarifu wanakijiji kuhusu karamu hiyo. Habari hizo zilipo wafikia wale wakina mama wenye vigori, hakika walifurahi sana. Na moja ya watu walio furahia hiyo taarifa ni Suzani ambapo aliweza kumsihi mama yake kwamba asahau kidogo kuhusu kumtafuta Sindelela, bali washirikiane jinsi ya kumfundisha Chiku kucheza ngoma asiri pia wapange namna gani atakavyo pendeza kimavazi ili awe mshindi pande zote, kucheza ngoma na urembo mubashara utakao mvutia Chifu ili naye aweze kutoa zawadi bila upendeleo. Wazo hilo mama na mwana waliliafiki huku wakiweka nia ya dhati kwamba zitakapo malizika hizo shamra shamra ndipo waanze mikakati ya kumtafuta Sindelela...kwa madai kuwa yule ni damu yao...!

Taarifa ile kutoka kwa Chifu hatimae ilimfikia Bi. Mandawa, alitamani sana mjukuu wake akashiriki lakini aliona atatia haibu kulingana na mapungufu

aliyo nayo. Asingeweza kumfundisha jinsi ya kucheza ngoma licha ya uzuri alio jaliwa zaidi alihofia kuchekwa na kuambulia haibu. Roho ilimuuma sana lakini kikongwe huyo hakuwa na lakufanya.

Yote hayo alikuwa akiyafikiria akiwa polini akikusanya kuni mbili tatu kwa ajili ya kupikia, alipo eneza mzigo alijitwika kisha akaanza safari ya kurudi kijijini huku moyoni akiwa na shauku ya kumuona mjukuu wake kipenzi.

Lakini pindi alipokuwa njiani, mara ghafla alikutana na kundi la wavulana wasiopungua sita. Wavulana hao walikuwa wakihema juujuu kuonyesha kuwa huko walikotoka walikuwa wakikimbia kwa kasi.

"Afadhali tumekuona, kwanza shikmamoo bibi", mvulana mmoja aliongea na kusindikiza heshima yake kwa Bi. Mandawa. Na ndivyo walivyofanya hao wengine.

Baada ya salamu, mmoja wao alihoji. "Bibi umesikia mbiyu ya Chifu?.."

"Ndio nimesikia, tena vizuri tu", alijibu Bi Mandawa.

Wavulana hao wakatazamana kwanza kisha mwingine akasema

"Basi bibi, siku zote wahenga wanasema kwamba ukisikia la mgambo basi ujue kuna jambo. Chifu wa kijiji cha Angaza anataka mrembo wa kijiji kwa ngazi ya hawa vigori wanaoanza kuvunja ungo pia wale wasio na muda mrefu kuvunja ungo. Kwahiyo bibi sisi tunaimani Sindelela ataibuka kidedea tu hilo halina ubishi kabisa "

" Kweli kabisaaa ", wakaunga mkono wote kwa pamoja.

"Kila kijiji kitatoa vigori watatu. Kuna vijiji zaidi ya vinne, bila kupoteza muda jina la Sindelela lazima liwemo kwa vigori watakao kwenda kuwakilisha vijiji vyetu ". Mvulana huyo ambaye alionekana kuchangamka aliongeza kusema. Punde Bi Mandawa naye akafungua mdomo ili aseme jambo.

Lakini kabla hajasema neno lolote mmoja wao alimpokea mzigo wa kuni kichwani kisha wakaanza safari kurejea kijijini.

"Sawa wajukuu wangu nimewaelewa, lakini kumbukeni Sindelela pale alipo ni kipofu haoni ingawa macho yake ukiyatazama ni kama mtu anayeona. Hivi atachezaje ngoma? Lazima afundishwe kwanza ndipo akacheze mbele ya

Chifu jinsi alivyo fundishwa! Hamuoni kama nitakuwa nimekiponza kijiji chenu?", alisema Bi. Mandawa kwa sauti ya upole iliyojaa huzuni ndani yake. Ghafla kimya kifupi kilitanda kila mmoja akiumia kwa namna yake kwenye nafsi yake,ulemavu wa Sindelela uliwasononesha sana, zaidi maneno hayo ya Bi. Mandawa yaliwafanya wavulana hao kupoa kupoa mithili ya maji ya mtungini.

Lakini baadaye kidogo kimya hicho kilitoweka baada kukutana na mzee mmoja aliyejulikana kwa jina Sure. Mzee Sure aliwasalimu wavulana hao kisha akamsalimu na Bi. Mandawa,baada ya salamu akamwambia Bi. Mandawa kuwa muda wa kula matunda sasa umewadia. Mzee huyo hakuishia hapo bali alikwenda mbali zaidi kwa kusema. "Ama kweli baada ya dhiki faraja "

Bado maneno hayo ya mzee Sure yaliwaacha midomo wazi wavulana hao pamoja na Bi. Mandawa. Na kwa kuwa mzee huyo alitumia mithamiati? Kidogo ilimchanganya Bi. Mandawa.

"Una maana gani?..", aliuliza Bi. Mandawa.

"Ahahahah.. Hahahahahah", Mzee Sure akaangua kicheko. Alipohitimisha cheko lake akasema "Bi Mandawa, kumbuka maisha ya nyuma baada mwanao kufariki alikuachia kijikuu kikiwa bado kidogo hakijui kula ugali,zaidi ya maziwa. Ulihangaika naye ila mwishowe amekua mkubwa. Mjukuu wako ni mrembo saaana hapa kijijini sijapata kuona,naweza sema anashika namba moja japo kipofu. Chifu wa kijiji cha Angaza anataka kigori ambaye atakuwa mrembo wa kijiji chake na vijiji jirani pia,wapo warembo wengi ila sisi hapa kijijini kwetu wametoka warembo wawili. Tumemtafuta mrembo wa tatu tukakosa kumbe tulisahau kuwa unamalaika malangoni mwako"

"Hahahahah.. Ahahahahah ",akacheka kwa mara nyingine tena, cheko la madaha kisha akaendelea kusema

"Sindelela? Uzuri wake ni asiria,kamwe hautofutika abadani asilani na lazima awe mrembo wa vijiji na sio kijiji Bi. Mandawaaaa",kwisha kusema hayo akaondoka zake huku tabasamu bashasha likiupamba uso wake. Maneno ya mzee Sura yakarejesha furaha kwa wavulana hao, ndipo wote kwa pamoja

wakatazamana kisha wakapasa sauti wakaimba "Mrembo kipofu.. Mrembo kipofu lazima ashinde!!.."

Sehemu ya 08.

BAADA YA WIKI MOJA.

Mafunzo ya kucheza ngoma kwa vigori yaliendelea kwa kila nyumba ambayo ilipata mwaliko, kijiji cha pili Suzani alijitahidi sana kumfunza mwanaye.

Lakini baada siku iliyongojewa kwa shauku kubwa na watu wengi kuwadia, wakina mama waliwapamba watoto wao kwa mavazi mazuri mapya yenye kupendeza machoni pawatu. Upande wa Bi. Mandawa alizama chumbani mwake akafungua sanduku kukuu alilokuwa akihifadhia nguo zake, akachukuwa khanga aliyokuwa akiiva marehemu Pendo mama Sindelela kisha akamfunga lubega mjukuu wake akampa na fimbo ya kujiongoza.

Sindelela akatangulia mbele uda huku kundi la wale wavulana sita walikuwa nyuma yake. Safari ilikuwa ndefu kidogo kutoka kijijini Mzanga kuelekea kijiji cha Angaza. Lakini baada ya mwendo w takribani nusu saa, hatimaye walifika kwenye karamu. Watu walikuwa wengi sana, walifurika kutoka vijiji mbali mbali. Waliwakuta vigori wakiimba na kucheza ngoma kwa umahiri mkubwa. Ndelemo na vifijo vilipasa huku Chifu na akionekana kuachia tabasamu akifurahia burudani hiyo.

Ila punde hali ikawa tofauti kidogo baada ule ujio wa Sindelela, ghafla watu waliokuwa wakiwatazama wale

Hatimaye walifika kwa Chifu walikuta warembo wakiimba na kufurahi bila kusahau kucheza ngoma kwa umahiri wa hali ya juu. Ndelemo na vificho vilisikika, lakini macho ya watu wale waliokuwa wakiwatazama wale vigoli ambao walikuwa wakicheza yalitoka kule wote wakamtazama Sindelela.

Hata Suzani na mama yake walimtazama na kuvutiwa naye.

"Ama kweli Mungu anaumba, kigori kavaa khanga tu lakini anavutia sana!!?". Suzani aliongea maneno hayo pasipo kujua kuwa yule ndio mtoto wa marehemu wili yake. Muda huo huo Bi. Mandawa naye alifika mahali

hapo ambapo moja kwa moja alimshika mkono mjukuu wake kisha akampeleka mbele ya umati uliohudhulia karamu ile.

Mke wa Chifu huyo ambaye aliitwa Kangola, akatabasamu. Punde akasema "Chifu, licha ya hawa vigori kucheza vema zao lakini mimi kwa upande wangu yupo kigori mmoja tu anayefaa kuwa mrembo wa kijiji"

"Sio kijiji tu bali, vijiji vyote vya ukanda huu. Hakika sijapata kuona binti mrembo kama huyo ninaye muona mimi", aliongeza kusema mkewe Chifu.

"Mmh! Yuko wapi huyo unaye msifia?..", aliuliza Chifu huku akiangaza macho yake kutazama kila pande.

"Tazama upande wa kushoto, utamuona kigori amevaa khanga. Anaonekana hajishughulishi na ngoma, muda wote tangu afike amesimama na anaachia tabasamu mwanana"

Chifu akapigwa na bumbuwazi mara baada macho yake kutua katika uso wa Sindelela, akatikisa kichwa ishara ya kukubali jambo fulani. Punde akamgeukia mkewe na kumwambia "Ukweli nimevutiwa naye, Mungu fundi anaumba hapana mfano. Zaidi tusitishe karamu hii ili tutaje washindi"

"Hilo ndilo la muhimu", wote wakakubaliana jambo hilo.

Chifu alisimama kisha akasitisha mchezo wa ngoma. Alienda mbali akasema kuwa umewadia ule wasaa wa kutaja mchezaji bora wa ngoma pia mrembo wa vijiji.

Hapo sasa kimya kilitawala mahala pale, wale wenye mabinti wao ambao wapo mashindanoni walitulia tuli kila mmoja akisubiri kuona kama mwanaye anaweza kuibuka kidedea.

Suzani alimtazama mwanaye kisha akamtazama Sindelela, imani ya mwanaye kushinda kuwa mrembo ilimtoka akabaki kingojea upande wa uchezaji ngoma akidhania kuwa walau huko ataweza kufua dafu. Lakini napo huko tarajio lake lilienda kombo na vile alivyo tarajia, Chifu alipotaja mshindi wa ngoma hakumtaja Chiku mwanaye Suzani bali alimtaja kigori mwingine wa kijiji cha pili. Kigori ambaye aliisakata ngoma ipasavyo kwa kupanda na kushuka, akikata kiuno kama pia kitendo ambacho kiliweza kumvutia Chifu ambapo naye hakushindwa kumpa ushindi.

Chiku mara baada kukosa nafasi kwenye uchezaji bora wa ngoma, alitegemea angeibuka kidede katika urembo. Ila tumaini lake likayeyuka mara baada Chifu kumtaja Sindelela kuwa ni kigori mrembo.

Aliangua kilio huku akimkimbilia mama yake, akamkumbatia kwa kilio. Ikiwa Sindelela yeye aliposikia jina lake alizidi kutabasamu huku bibi yake naye upande wa pili akidosha kilio cha furaha.

Wavulana wale sita waliomshinikiza Bi. Mandawa kumpeleka Sindelela kwenye karamu ile, walilipuka kumkimbilia mrembo wao wakamshangilia kwa nguvu zote.

Mama Maduhu na binti yake walibaki midomo wazi wakishangaa tukio lile huku wakifanya jitihada za kumbembeleza Chiku anyamanze aache kulia.

Baada ya vifijo vya kumshangilia Sindelela kumalizika, Chifu alimuita Sindelela mbele yake ili ampe zawadi zake anazo stahili kupata mshindi.

"Sindelela wewe ndio mrembo hakuna zaidi yako hapa kijijini, pia na vijiji jirani. Hivyo basi njoo hapa mbele uchukue zawadi yako..", alisema Chifu.

Sindelela alitabasamu kwa mara nyingine tena, tabasamu ambalo liliwavutia watu wengi walio hudhuria karamu hiyo. Punde si punde kikongwe Bi. Mandawa alijitokeza kwenye uwanja huo aliosimama kidete mjukuu wake huku mkononi akiwa na fimbo ndefu kiasi, alipo mkaribia akamkabidhi fimbo kisha naye akajiongoza kuelekea mahali alipoketi Chifu.

Kitendo cha Sindelela kuongozwa na fimbo, kilizua taharuki kwa watu walio hudhuria karamu hiyo. Walistaajabu kumuona kigori Sindelela na kipofu.

Chifu akapigwa na butwaa baada kugundua kuwa mshindi wake ni kipofu, chozi la uchungu lilimtoka wakati huo huo Mama Maduhu na binti yake wakionekana kushangazwa na kile kilichokuwa kikiendelea. Awali walikuwa na mashaka juu ya Sindelela, lakini baada kugundua kuwa ni kipofu ilihali Bi. Mandawa alionekana akimkabidhi fimbo, ndipo wakajua ukweli huyo ndio yule mtoto wa marehemu Pendo.

"Huyu ndio mwanaye Pendo?..", mama Maduhu akiwa amepigwa na bumbuwazi akajiuliza swali hilo. Kwa mstuko akaanguka chini akapoteza fahamu.

Utata ukazuka mahali hapo, watu waliokuwa karibu yake walishangazwa na jambo hilo lililotokea. Kila mmoja alizungumza lake, huyi alisema hili na yule akasema lile yote hayo ni pindi mama Suzani alipopoteza fahamu.

Upande wa pili Chifu alionekana akamuangilia Sindelela kwa umakini, kamwe moyoni asiamini kuwa kigori huyo mrembo ni kipofu. Lakini punde si punde, macho na moyo wake vikaaamini baada kuona fimbo ndiyo iliyokuwa akimuongoza huku bibi yake akiwa nyuma yake.

"Laah! Ama kweli Mungu huwa hakunyimi vyote, kigori huyu ni kipofu lakini uzuri wake alio nao hakuna wa kumlinganisha naye", Chifu alijikuta akitamka maneno hayo huku macho yake yakimtazama Sindelela ikiwa muda huo mkewe alionakana akiyafuta machozi yaliyokuwa yakimtiririka. Aliumizwa sana na upofu wa Sindelela.

"Ni kwelikweli kabisa, usishangae mimi kutoa chozi. Nimeumizwa na upofu wa huyu kigori. Lakini nina imani kuumbwa kwake, Mungu anakusudia lake", alisema mkewe Chifu kwa sauti ya chini iliyojaa simanzi ndani yake.

Punde Sindelela alikuwa tayari ameshawafikia, alisubiri kitakacho jili kutoka kwa Chifu. Ambapo naye alipoona mshindi wake tayari u karibu yake alinyanyuka kwenye kiti chake kisha atoa shukrani zake za dhiti kwa watu wote waliohudhulia karamu ile ya kumtafuta mrembo kigori na kigori mashahuri wa kucheza ngoma.

Lakini pia aliwashukuru washindani huku akiwatia moyo, yote hayo yalienda sambamba na shangwe pia vigelegele vya aina yake kutoka kwa wana vijiji.

Zoezi hilo lilipomalizika, akawataka fujo ndelemo zitulie ili aanze kugawa zawadi kwa washindi husika. Hapo alimgeukia Sindelela kisha akasema.

"Unaitwa Sindelela ?.."

" Ndio mimi ni Sindelela.."

"Sawa sawa, hakika unaendana na jina lako"

Maneno hayo ya Chifu yalipelekea fujo ndelema na vifijo vyote kwa pamoja kusikika kutoka kwa wale vijana sita walioonekana kuwa bega kwa bega na Sindelela. Na si hao tu bali hata wanakijiji wasio na hiyana walishangilia huku tabasamu lisilo kifani nalo likionekana kuupendezesha vema uso wake hali ya kuwa macho yake yakitamani yaone jinsi wanavyo mshangilia.

Machozi yalimtoka na sio machozi ya kujutia ama kumkufuru muumba wake? Lahasha machozi ya furaha kwani asingeweza kumkufuru Mungu wake kwa sababu bibi yake alishamwambia kuwa akifikisha umri wa utu uzima ataona kama ilivyo kwa binadamu wengine.

Maneno hayo yalimpa faraja mno mrembo Sindelela. Choji hilo lake lilifutwa na mkewe chifu, ikiwa muda huo huo Chifu alimtaka mama yake Sindelela ajitokeze mbele yake.

Chifu hakujua kama Sindelela hana mama, anaishi na Bibi yake. Huyu ndio mama huyo ndio baba wa mrembo huyo kipofu..

Upande wa pili Suzani alikuwa akimpepea mama yake ambaye ghafla alianguka na kupoteza fahamu, lakini aliposikia Chifu anamtaka mama Sindelela ajitokeze mbele aliacha mara moja kazi aliyokuwa akiifanya. Ubongo wake ukakumbuka mambo kadhaa yaliyopita.

Alikumbuka mambo mbali kipindi cha nyuma jinsi alivyo shirikiana na mama yake kumnyanyapaa mama Pendo baada kuonekana kuwa hazai, na hata Mungu alipombariki mtoto, bado manyanyaso waliyaendeleza kwa sababu aliwaletea mtoto kipofu. Walikwenda mbali hadi kufikia hatua ya kumwambia mama Sindelela kwamba hakuwa chaguo la ndugu yao, na mara moja walimtaka aondoke.

"Utajua mwenyewe, kwani huna kwenu? Na ninani aliyekwambia kwamba katika ukoo wetu aliwahi kuzaliwa kipofu? Ondoka zako hapa usituletee uchuro sisi", maneno hayo kuntu aliyoyasema mama yake yalijirudia kichwani mwake.

Kumbukumbu hakuishia hapo, alikumbuka pia maneno yale baba yake aliyomuuliza Pendo na Maduhu siku ile ya kikao cha familia. "Mama mkwe ni kweli unampenda mumeo? Na wewe Maduhu je, unampenda mkeo?.."

"Ndio nampenda"

"Mimi simpendi".

Chozi, likamtoka Suzani na hayo ndio yalikuwa maneno ya mwisho kutoka kwa Pendo ambapo baada ya kukanwa na Maduhu aliamuwa kuchukua uamuzi wa kujiua.

Pumzi ndefu akashusha, punde si punde akayakumbuka na yale maneno ya dharau na kejeri aliyokuwa akimwambia wifu yake. "We mjawalaana mzima na kipofu wako?.."

Maneno hayo aliyakumbuka huku yakijirudia mara mbili mbili kichwani mwake, machozi yalizidi kumtaka safari hiyo akimtaazama kipofu Sindelela ambaye sasa ndio mrembo kupita vigori wote wasio na kasoro kwenye miili yao.

Nafsi ikamsuta mara baada kumbukumbu hiyo kutoweka kichwani mwake na kumuachia jereha la maumivu moyoni mwake ikiwa muda huo huo alisisitiza mama Sindelela ajitokeze mbele.

Bi. Mandawa alifahamu fika kuwa Sindelela mama yake alishafariki, yeye ndio amebaki na mjukuu wake ambaye pia alimwambia kuwa yeye ndio mama yake mzazi. Alifanya hivyo ili kuhakikisha furaha ya Sindelela inadumu daima lakini kitendo cha Chifu kumtaka mama yake Sindelela ajitokeze mbele lilimpelekea kupigwa na bumbuwazi kidogo. Punde akajiuliza "Sindelela mjukuu atajisikiaje akisikia kuwa mimi sio mama yake hali ya kuwa nimeshamwambia mimi ndio mama yake? Na je, atakuwa katika hali gani akisikia kuwa mama yake alishafariki? Nifanye nini kuinusuru furaha hii aliyonayo mjukuu wangu kipofu?.."

Sehemu ya 10.

Suala hilo lilimumiza sana kichwa Bi. Mandawa, lakini mwishowe aliona haina haja ya kuendelea kumficha Sindelela kwani aliamini kuwa siku zote uongo hauna maisha marefu, endapo kama atashindwa kumwambia ukweli yeye mwenyewe basi ipo siku atajua ukweli kupitia kwa mtu mwingine.

Kitendo ambacho kitazidi kumsononeshe Sindelela na pia kujiuliza kwanini bibi yake alishindwa kusema ukweli tangu hapo awali.

Hivyo alipoona heri nguo iliyochanika kuliko mgongo wazi, upesi mbele ya Chifu.

"Mimi hapa ndio mama yake pia ndio baba yake"

Alisema Bi. Mandawa, maneno ambayo yalimshtua Chifu na kuzua taharuki kwa watu walio hudhuria karamu ile.

"Unamaana gani?..", aliuliza Chifu huku akiwa makini kumsikiliza Bi. Mandawa.

Bi Mandawa kabla hajamjibu Chifu alishusha pumzi ndefu kwanza kisha akageuka kumtazama mjukuu wake ambaye naye alionekana kutabasamu kwa furaha ya ushindi. Roho ilimuuma sana, akasita kujibu swali akihofia kuipoteza furaha ya mjukuu wake.

Lakini akajikuta hana namna tena, kwa unyonge wa hali ya juu alifungua kinywa chake akasema mambo ya nyuma yote yaliyowahi kutokea mpaka kufikia hatua ya kumlea mjukuu wake huku akiwajibika kama baba kama mama. Ilikuwa ni simulizi ndefu ya kusisimua, kila mja aliyekuwepo pale kwenye karamu alisikitika kwa namna yake. Hata Suzani naye alijikuta akiumia moyoni, umvumili

vu ulimshinda akamshika mwanaye mkono kisha akarudi nyumbani upesi huku akiangua kilio shauri ya maumivu moyoni pamoja na haibu iliyomjaa machoni pake baada kuona kila mmoja akimtazama yeye.

Muda mchache baadaye baada Suzani kuondoka, mama yake alizinduka baada kuzimia kwa muda takribani nusu saa. Alihamki kuona utulivu wa namna yake ukitawala mahali hapo. "Mh! Kuna kuna nini tena?..", akajiuliza kwa mashaka, akistustushwa na utulivu huo. Lakini punde si punde akapata jibu la swali lake alilo jiuliza baada kutazama mbele yake ambapo alipata kumuona Bi. Mandawa akiwa amemkubatia mjukuu wake huku wote walionekana kububujikwa machozi. Taharuki ya aina yake bado iliendelea kumtawala mama Maduhu, bado hakuweza kuelewa vizuri licha ya kupata

jibu hilo. Akili yake ilipotulia alinyanyuka kisha akamgusa bega mtu aliyekuwa pembeni yake, mtu huyo alipomgeukia haraka haraka akamuuliza swali

"Kuna nini mbona badala ya kuwa sherehe imekuwa majonzi? .."

"Roho yako mbaya wewe na ndugu zako ndio chanzo cha yote badala ya kuwa furaha imekuwa huzuni. Watu wabaya sana nyie. Mna roho mbaya kama mkaanga sumu", mtu huyo alimjibu mama Maduhu kwa hasira huku akiwa amemkunja sura. Jibu hilo lilimstua sana, akainamisha uso wake chini pole pole pole akajipenya katika ya watu akaondoka zake kurudi nyumbani akikwepa haibu ya mwaka kwa kile ambacho alikifanya miaka mingi iliyopita kwa marehemu Pendo.

Vilio vilisikika, Bi. Mandawa na mjukuu wake walikuwa wakilia kwa uchungu. Sindelela hakuamini kama kweli mama yake ameshaaga Dunia kwani kipindi chote alijua fika Bi. Mandawa ndio mama yake.

Alilia sana, kilio ambacho kiliwachoma kila mmoja mwenye roho ya huruma mahala pale. Punde Bi.Mandawa akaanza zoezi la kumbembeleza, ilikuwa shughuli pevu lakini mwishowe Sindelela alinyamanza japo tabasamu lile la kufurahia ushindi lilitoweka kabisa. Kimya kile kiliendelea kutanda, Chifu na mkewe waliyafuta machozi yaliyokuwa yakiwatoka muda wote sambamba na kuivuta pumzi ndefu na kisha kuishusha. Ghafila kimya kikatoweka baada Chifu kukohoa halafu akasema akapasa "Pole sana Bi. Mandawa kwa mitihani yote iliyo kukumba. Pole pia mrembo Sindelela. Poleni sana, yote hiyo ni mipango yake Mungu. Hampaswi kukufuru, bali ni kumshukuru Muumba kwa kila jambo", akaweka kituo sambamba na kujifuta machozi mepesi yaliyokuwa yakimbubujika kisha akaendelea kusema "Sindelela wewe ni mrembo saaana,umenivutia vilivyo. Na leo ndio nimeamin kuwa siku zote Mungu hakunyima vyote, amekunyima uwezo wa kuona lakini amekupa urembo asiria kabisa. Hongera sana. Pia Bi. Mandawa, wewe ni mfano wa kuigwa umepitia magumu sana kumlea mjukuu wako mpaka kufikia umri huu, lakini tambua hapa bado haitoshi endelea kuweka ulinzi madhubuti kwa mrembo huyu kipofu mpaka pale atakapo fikia wakati muhimu wa kuolewa. Mwanaume atakaye muoa sasa, ahakikishe Sindelela hapati shida yoyote, sitopenda Sindelela ajutie kuzaliwa. Yangu ni hayo tu ", alipokwisha kusema hayo aliketi kwenye kiti chake, na mara moja akaanza zoezi la kumpatia

zawadi zake. Mrembo huyo kipofu alipewa pete na mikufu ya dhahabu, pia na viatu pamoja nguo. Zoezi hilo lilipokwisha aliwatakia kila la kheri bibi na mjukuu wake huku akisisitiza kutimiza ahadi yake ya kuwajengea nyumba ya kisasa haraka sana iwezekanavyo.

Siku zilisonga miezi ikasogea miaka nayo ikajongea, ahadi ya Chifu ilitekelezwa. Sindelela alianza kuyazoea maisha hayo mapya, ile hali ya ukiwa ilimtoka akawa amerudi katika hali ya awali kwani ukweli uliokuwa umefichika kwa muda mrefu alikuwa ameshaujua.

Hatimaye alifikisha umri wa miaka kumi na nane, urembo usio kifani ukazidi kujidhilisha. Sifa za uzuri wake ziliweza kuwafanya vijana wa kijijini hapo kujikwama kwake mara kwa mara lakini Sindelela alionekana kuwa thabiti, kamwe hakuthubutu kurubuniwa na tamaa ya aina yoyote ile kitendo ambacho kilimpelekea kuzidi kuitunza bikira yake akitekeleza agizo la bibi yake alilomwambia kuwa bikira ni zawadi kwa mwanaume atakaye muoa. Kamwe hakufanya kosa hata mara moja, japo kuna baadhi ya vijana walijaribu kumrubuni kuwa wafanye mapenzi kisha wamtafutie dawa ya kumponya macho lakini Sindelela hakuweza Kudanganyika kirahisi hivyo, moyoni aliamini kuwa ipo siku atapata mwanaume atakaye mjali kwa kila hali na mali bila kujali upofu alionao.

Raham kijana mcheshi na mpole pia, ni kijana mchangamfu na mara zote alijali na kujiamini kwa kile anacho kifanya. Na hiyo ikawa chachu ya kufanya vizuri katika masomo yake. Lakini pia tabia zake hizo zilimplekea kupendwa na watu wengi hususani vijana wenzake. Siku hiyo ilikuwa siku tofauti sana, licha ya kufurahia likizo ya muda mrefu vile vile alifurahia safari ya kuelekea kijijini kwa babu yake.

"Miaka mingi imekatika, nakumbuka mara ya mwisho kwenda nilikuwa nasoma darasa la saba. Sasa nipo chuo. Hakika siamini kama kweli narudi kumuona mzee Mabula a.k.a alwatan", yote hayo Raham alikuwa akiyawaza, akaachia tabasamu bashasha huku akizipanga vizuri nguo na zawadi ndani ya begi.

Alipokuwa tayari safari ikaanza, alifika kijijini mapema sana. Mnamo saa kumi na mbili kasoro. Furaha isiyokifani ilitanda kwa babu na bibi yake, wote wakimshangaa mjukuu wao alivyokuwa mkubwa, utani ukachukua nafasi yake

mahala hapo. Mzee Mabula babu yake Raham alimkumbusha mjukuu wake kipindi cha nyuma jinsi kijana huyo alivyopenda kula maembe na mapapai. Raham alicheka sana kisha akasema. "Dah! kweli babu zamani sana,lakini vipi ile mipapai bado ipo kweli?.."

"Iwepo wapi mjukuu wangu? Ulizuka ugonjwa fulani hivi ukaiteketeza yote!", kabla mzee Mabula hajamjibu mjukuu wake, Bi. Mwanahawa alimjibu. Raham akasikitishwa na jambo hilo, akakaa kimya kidogo punde akakivunja kimya hicho akauliza kuhusu maembe. Lakini hajajibiwa, ikasikika sauti ya kike ikibisha hodi. Aliyebisha hodi hakuwa mwingine, ni Chiku binti wa Suzani. Binti huyo ambaye miaka kadhaa iliyopita alikuwa na uhusiano wa utotoni na Raham, upesi aliamua kufika nyumbani kwa mzee Mabula ili amuone baada kupoteza kwa muda mrefu. Ujio wa Chiku ukamfanya Raham kufarahi zaidi, hima akasimama akamkumbatia.

"Nilitaka kuwauliza wazee wangu Chiku yupo? Lakini kabla sijawauliza, umetokea . Lah! Chiku umekua sasa. Tena umekuwa mrembo zaidi", alisema Raham huku akimtazama Chiku kwa jicho la huba. Maneno hayo yalimfanya Chiku kuachia tabasamu, alifurahishwa sana na maneno ya kijana wa mjini, kijana mtanashati mwenye umbile la kuwavutia wasichana wengi.

Mzee Mabula na Bi. Mwanahawa walinyanyuka ili kuwapa nafasi vijana hao wazungumze kwa kina pasi na woga wowote, kitendo hicho kikawapelekea wawili hao Raham na Chiku kuangua kicheko cha chini chini huku wakikumbatiana kwa mara nyingine tena na kuzigonganisha nyuso zao.

"Wazee wa siku hizi bwana, kwahiyo hapo ndio tuseme wamejiongeza", alisema Raham. Chiku akacheka, wakati huo huo wakaketi kwenye mkeka na kisha kuzungumza mambo mbali mbali.

Baada ya maongezi mawili kadha wa kadha, Chiku alimuaga Raham huku wakiahidiana kukutana naye tena baadaye kwa maongezi zaidi muda huo huo Bi. Mwanahawa na mzee Mabula wakatoka ndani. Raham aliwageukia kisha akasema "Nimefurahi sana kumuona Chiku,kitambo sana sijaona sura yake. Ama kweli siku hazigandi yani amekuwa mrembo sio mchezo,kijiji kizima sidhani kama kuna mrembo kama Chiku wangu. Au mnasemaje"

"Mmmh", mzee Mabula akaguna, akaketi kwenye mkeka. Akakohoa kidogo kisha akasema "Mjukuu wangu siku zote usijaji kitabu kabla hujakisoma ndani, hebu fikiria ndio kwanza umeingia hapa kijijini tangu kipindi kile mpaka sasa ni miaka mingi sana imekatika kwahiyu kijiji hiki cha wakati ule sio cha wakati huu?.."

"Unamaanisha nini?..", Raham akauliza kwa mashaka. Mzee Mabula akaangua kicheko kwanza, alipokatisha cheko lake akasema "Usiwe na shaka, wewe tulia ule ugali kwanza halafu baada ya hapo nikutajie mrembo kijiji na sio huyo unayemsifu wewe ilihali hajui hata kusugua magaga", Raham alicheka baada kuyasikia maneno hayo ya babu yake, punde akatisha cheko chake akasema "Babu hebu acha kunivunja mbavu zangu bwana, kwahiyu huyo mrembo wako unayetaka kunitajia ni mzuri kuliko Chiku wangu? Si bure labda awe jini"

Sehemu ya 11.

"Yani mimi nikikwambia mrembo, ni mrembo kweli sio wa kubahatisha. Unaweza kusema huyu binti hajazaliwa ila ameshushwa kutoka angani. Kamwe huwezi kuwalinganisha na hawa nguchiro ambao vikiamka asubuhi hata mswaki hawapigi, unapishana na binti ananuka harufu mbaya kama dume la mbuzi..! ", maneno hayo ya mzee Mabula yalizidi kumchekesha kijana Raham, alicheka sana huku akiwa ameshika mbavu zake.

"Babu unaonekana enzi za ujana wako ulikuwa moto sana wewe au sio?..", kwisha kukatisha cheko lake, akamuuliza babu yake swali la kizushi. Swali hilo likamfanya mzee Mabula kuchungulia kwanza mlango wa nyumba yake kana kwamba anataka kuzungumza siri fulani na mjukuu wake. Alipo jihakikishia kuwa hakuna mtu anayetoka wala kuingia ndani, alisema. "We acha tu mjukuu wangu, mimi nilikuwa moto sana. Nilijua hasa kutembeza bakora, kwanza kipindi hicho mimi nilikuwa sio mkaaaji sana wa eneo moja. Nilitoka mara kwa mara hali iliyonifanya kuonekana mpya kila uchwao, hicho ni kigezo ambacho kilinipelekea nikatoka na kila binti wa kijiji aliyejigonga kwangu, hata bibi yako huyu hakuwa katika mipango yangu ila baada kufumaniwa naye nililazimishwa kumuoa kwa lazima sikumpenda, mwanamke gani anapua kubwa kama mtungi? Lakini baadaye kidogo baada kuishi naye ikabidi nitulie

kwa sababu aliniambia endapo nitamtelekeza basi atajiua. Kwahiyo ndio maana mpaka sasa nipo naye, kwahiyo mjukuu wangu kaa ukijua unapita tulipo pita sisi ",alimaliza kwa kicheko Mabula. Muda huo anaweka kituo cha maneno yake, punde Bi. Mwanahawa akafika huku mkononi akiwa amebeba sahani iliyosheheni ugali,na kabla hajakaa alirudi ndani kuchukua bakuli lanye mboga pamoja na maji.

"Mmh! Raham hivi atakuwa kanisikia kweli?.." kwa sauti ya kunong'ona i mzee Mabula akamuuliza mjukuu wake.

"Ahahahah.. Hahahahahah.." ,alicheka Raham.

"Sidhani. Lakini kama amekusikia basi jiandae kupigwa, kiukweli wewe sio wa kusema kwamba anapua kama mtungi", alitania Raham samba na kukiendeleza kicheko chake.

Hali hiyo ndiyo aliyotegemea Raham pindi atakapo fika kijijini kwa babu yake, alipenda sana maneno ya babu yake vile vile maisha ya kijijini aliyaona mazuri kuliko hata mjini na ndio maana safari yake ya kwenda kijijini kuwaona babu bibi yake ilikuwa nzuri kwa upande wake.

Zabroni ni kijana mpole na mstaarabu pia, mbali na hayo lakini vile vile alijituma katika shughuli zake za kilimo na kukataa mkaa. Jioni moja wakati anatoka shamba, aliamua kupita kwa swahiba wake ili kumpa taarifa mpya aliyo kuwa nayo siku hiyo. Alitembea hatua za kichovu mithili ya jogoo aliyekimbizwa muda mrefu, alimkuta rafiki yake akiziba pancha baiskeli yake. Aliitwa Zaulo.

"Tulisa mgambo", alipasa sauti Zabroni. Zaulo alipo sikia sauti hiyo ya swahiba wake, haraka sana akatupia macho kule ilipotokea kisha naye akajibu "Tulisa magambo..hala hala halaaa ". ni msembo ambao walipenda sana kuutumia popote pale. Msembo huo waliutumia kama salamu ama kutia chumvi pindi mazunguzo yao yanapo kolea au kama kuna jambo limekwenda sawia kwa upande wao. Baada ya hayo Zaulo alimsogezea kigoda rafiki yake kisha yeye akaingia ndani,muda sio mrefu akatoka na sahani yenye viazi vilivyo na karanga zilizo chemshwa.

"Hapo mkubwa umecheza kama pele, maana nina njaa sio mchezo" Alisema Zabroni.

"Usijali wewe ni mwamba kwangu,tangu kipindi kile tunatoroka shule tunaenda kuiba nanasi kwa mwalimu Jongu mpaka sasa tupo pamoja kwahiyo shida yako naijua, lakini pia shida yangu unaijua ndio maana tunaitwa pacha tusio fanana ingawa herufi za mwanzo za majina yetu zinafanana. Hahahahahaaaaa Tulisa magambo.."

"Tulisa magambo" alijibu Zabroni kisha wakaanza kula. Kimya kidogo kilitawala, lakini mwishowe kimya hicho kilitoweka baada Zaulo kumwambia Zabroni habari za kumuhusu kijana Raham.

" Zabroni hivi unamkumbuka yule mjukuu wa mzee Mabula? .."

" Ndio namkumbuka si yule jamaa mjanja mjanja sana .."

" Ndio huyo huyo, yupo karudi. Ujue kwanza mimi nilipo sikia habari hizi nikaona tayari huyu jamaa atatuchukulia sana mademu zetu hilo wala halina ubishi ndugu yangu. Nakupa pole kwa Walemi wako sijui kama atamkosa. .." alisema Zaulo.

Zabroni akashusha pumzi ndefu kisha akajibu "Unachekesha sana,yani unanipa pole mimi badala tujipe pole sote. Kwahiyo kwa akili yako unadhani mpenzi wako Chiku atasalimika?.."

"Aah wapi,Chiku anamsimamo kama wa mama yake. Unakumbuka alivyomuwekea msimamo mama wa yule kipofu kuolewa kwenye familia yao mpaka yule mama akaamua kujiua? Kwahiyo msimamo alionao mama Chiku, ndio huo ambao anao binti yake. Hata kwa dawa yule jamaa hampati Chiku wangu.." Alijinasibu Zaulo huku akionekana kujiadini kabisa. Zabroni hakutaka kuongea maneno mengi sana,zaidi alikaa kimya huku akiendelea kula chakula.

Kwingineko,alionekana Chiku akiwa na marafiki zake wakielekea kisimani kuchota maji. Walipokuwa njiani alisikika akisema "Mumemuona kidume wangu kutoka mjini?.."

"Enhee nani tena? Yule Zaulo au mwingine", alidakia moja ya mabinti aliokuwa nao Chiku katika safari hiyo ya kuelekea kisimani.

"Sio rahisi kama mnavyo fikiria kuhusu mimi na Zaulo, tambueni mimi ni mrembo sana kwahiyo sidhani kama Zaulo mkata mkaa anaweza kuwa

mpenzi wangu", alijibu Chiku, maneno hayo aliyaongea kwa dharau kubwa huku akijitazama mbele na nyuma kulia na kushoto.

Cheko la umbea likasikika, cheko hilo lilipo koma mmoja ya mabinti hao alimtaka Chifu aseme mwanaume huyo anye muona ni sahihi kwake tofauti na Zaulo.

"Anaitwa Raham. Kijana mtanashati mtoto wa Dar es salam,huyo ndio atakuja kuwa mume halali wa mrembo Chiku", alisema Chiku kwa sauti iliyojaa dharau ndani yake. Maneno hayo yaliwafanya hao mabinti watazamani kisha kila mmoja akaguna kivyake,punde wakaendelea na safari ya kisimani.

Giza kabla halijatanda, Raham alienda kukutana na Chiku kama walivyokuwa wamepanga. Alikuwa wa kwanza kufika sehemu hiyo,alivuta subira ya kumsubiri Chiku. Lakini hatimaye Chiku alifika eneo la tukio ikiwa wakati huo giza totoro tayari lilikuwa limekivagaa kijiji cha Angaza. Kwa tabasamu walisalimiana, wakakumbatiana kisha wakaketi kando kidogo ya njia ili wapate kuteta zaidi, ila kabla maongezi yao hayajaanza, ghafla Zaulo alifika.

"Chiku huyu ni nani?..", aliuliza Zaulo kwa jazba.

"Ahahahaaaaah..Hahahahahah", aliangua kicheko cha dharau Chiku wakati huo akimkumbatia ipasavyo Raham.

"Meneno yangu yanachekesha? Hebu nijibu huyo ni nani!",kwa hasira Zaulo lalizidi kusisitiza.

"Yani unathubutu kabisa kutoka nyumbani unamfuata huyu bwege ? Au kisa katoka mjini! Na kwanini nilikuwa nakuita huitiki?. Unakiburi sikuhizi si ndio", aliongeza kusema huku akiwa amjewa na hasira mithili ya joka lililo kanyagwa. Raham alionekana kupigwa na butwaa, alishindwa kuelewa kitu gani kinachoendelea kati ya Chiku na Zaulo. Kimya kifupi kikachukuwa nafasi, Zaulo akingojea jibu ilihali Raham asilewe chochote juu ya mzozo huo. Lakini punde kimya hicho kikatoweka, Chiku akasema.

"Zaulo wewe mkata mkaa, mkanuka shombo unadhani mimi na kufikiria akili mwangu? Mwaume gani hueleweki kutwa kucha mchafu kama choo cha

soko. Kwenda zako huko,kujitunza unashindwa utaniweza mimi?kwanza sikupendi, pia sikutaki"

Maneno hayo yalimumiza sana Zaulo, kwa sauti iliyojaa jazba akasema "Ukiwa wewe ndio mrembo na awe nani?..", kwisha kusema hayo akaondoka zake kichwa chini mikono nyuma ikiwa moyo wake ukifukuta maumivu juu ya kile alichu ambiwa na Chiku. Raham alitaharuki kusikia maneno ya Zaulo, akianza kwa kushusha pumzi ndefu akamuuliza Chiku "Kwani huyo mrembo wanayemsifu hivi yupoje? Je, ni mzuri sana?.."

"Aah achana naye kwanza mtu mwenye haoni, yaani ni kipofu..", alijibu Chiku kwa moyo wa chuki.

"Doh! Sawa lakini ni japo kipofu ila nitahitaji nimuone. Unajua Mungu akikupa kilema atakupa na mwendo" Raham alijibu kwa sauti ya utashi huku uso wake ukionyesha tabasamu bashasha.

"Raham,unanipenda kweli?.."

"Ndio nakupenda Chiku,lakini upendo wangu kwako usikufanye nisishindwe kumuona huyo binti wanaye msifu kuwa ni mzuri kuliko wewe. Chiku wewe ni mzuri bwana, na ndio maana nataka nithibitishe kama kuna mrembo zaidi yako "

"Anhaa, sawa. Je, endapo ukimkuta kweli mzuri zaidi yangu utachukuwa hatua gani?.."

"Hahahahah.. Ahahahahah", Raham akaangua cheko la madaha, akavuta pumzi ndefu kisha akaishusha halafu akajibu.

Sehemu ya 12.

"Siwezi kuchukua hatua yoyote,kwani nitakuwa na majibu kwamba yupo mzuri zaidi yako. Ila kigezo hicho cha kuzidiwa uzuri,haimanishi ndio nitakuacha wewe, hapana maana naye kutokana na uzuri wake basi atakuwa na mwenza pembeni"

"Nimefurahi sana kusikia maneno hayo Raham, nakupenda sana mpenzi wangu sitaki kuona ukinisaliti"

"Ni kweli Chiku na mimi nakuahidi sitokusaliti"

"Kweli?.."

"Ndio!"

"Sawa. Enhee! Zawadi yangu kutoka mjini ikowapi?.."

"Ipo mbona haraka hivyo? Lakini itabidi nirudi nyumbani kwanza nikaichukue. Hakika natumaini utaikubali"

"Hahahahaaa! Raham, ndio lazima niikubali kama ninavyo kukubali wewe"

"Etieeh! ila Chiku? "

"Bee"

"Unajua siku nyingi sana,kwahiyo leo naomba tukumbushie hata dakika moja tu"

"Hahahaahaah! Ni kweli Raham lakini nyumba sijaaaga ujue!.."

"Nina hisia juu yako, tafadhali nielewe"

Basi hupaswi kunung'unika, mimi ni wako mpenzi. Tusogee kando kidogo ili wapita njia wasituone "

Raham akaachia tabasamu baada kukubaliwa ombi lake na Chiku, upesi upesi wawili hao wakasogea kando ya njia hatua zipatazo sita,baada ya hapo Chiku alitandika kitenge chini kisha wakaanza kufanya tendo husika.

Mchezo huo ulidumu kwa muda mfupi sana,maana siku zote mapenzi ya kichakani yanaraha lakini yanakuwa na hofu mwingi kutoka kwa wafanyaji. Hiyo hali ndio ambayo ilimfanya Raham kumaliza haraka, kisha wakaagana. Chiku alirudi nyumbani kwao,Raham naye vile akarudi nyumbani kwao.

"Kesho usisahau zawadi yangu mpenzi", kwa mbali Chiku akapasa sauti akimsisitiza Raham kuhusu zawadi.

"Ondoa shaka mpenzi", alijibu Rahama huku akiambaa na njia, akipotea kabisa kwenye giza totoro.

Upande wa pili,kijiweni. Walionekana vijana wa kijiji wakiwa wamepumzika wakipiga zogo ambalo lilinakshiwa na chai ya tangawizi iliyokuwa ikichemka kwenye birika iliyopo kwenye jiko la mkaa huku pembeni likionekana deli lililojaa vibumunda. Katika kilinge hicho kila mmoja alileta mada yake na watu walichangia ipasavyo, waligusia siasa kandanda na maisha mengineyo kiujumla. Yote hayo yalikipamba kijiwe kasoro Zaulo ambaye yeye hakuchangia neno lolote, na wala hakuachia tabasamu hatakama ililetwa zogo la kuchekesha. Hali hiyo iliwashangaza marafiki zake maana haikuwa kawaida yake, Zaulo alikuwa mcheshi na muongeaaji sana kiasi kwamba alibatizwa jina akaitwa Radio mbao. Lakini siku hiyo alikuwa tofauti kabisa, alionekana kuwa mpole huku muda wote akijisonya na kushusha pumzi ndefu. Punde mmoja wa vijana alijitokeza na kumsogelea Zaulo kisha akamuuliza kipi kinacho msibu.

"Alichu nifanyia Chiku sio kitu kizuri kabisa. ", alijibu Zaulo kwa sauti ya chini iliyojaa huzuni kubwa ndani yake.

"Chiku? Huyu huyu tunayemjua sisi shemeji yetu au Chiku yupi?..", aliuliza kijana huyo.

Zaulo alijisonya kwa mara nyingine tena kisha akasema "Ndio huyo huyo,y ani kumpa pesa zangu, kumsaidia kulima. Lakini leo hii kwa sababu kamuona yule jamaa kutoka mjini, sasa ananiona mimi sifai. Kibaya zaidi anadiliki kunitusi. Hii ni haki? "

"Doh pole ndugu yetu, lakini ndio hivyo unajua hawa wasichana wa kijiji hiki wanajiona wao ndio wao kiasi kwamba wanatuchukulia sisi marofa. Utashangaa kuona binti wa kijiji hiki anatembea na kijana wa kijiji cha pili, wanamanisha nini? Je, sisi tue tumbili?..",ali

dakia kijana wa pili, ilihali muda huo huo kijana mwingine alisikika akisema "Cha muhumu ni kuangalia jinsi gani ya kumrudisha rafiki yetu kwenye hali yake. Zaulo achana naye huyo huwenda sio fungu lako, roho mbaya kaiga kutoka kwa mama yake au hujui? Kwanza binti mwenyewe anasura kama kiasi mbatata, mwendo wake hauna tofauti na mdudu Ngadu. Wanini huyo? Fanya kazi achana naye mnuka nguo ya ndani.. aahkha. Je,angelikuwa mzuri kama yule kipofu angepona nani hapa kijijini?..", aliongea kwa hasira kijana

huyo. Maneno hayo ya marafiki vijana wenzake aliyaelewa vilivyo, upesi akajifuta machozi yake kisha zogo nyinginezo zikaendelea.

Raham alifika nyumbani akamkuta babu yake ameketi nje kando ya moto wa magogo akichoma mahindi, alimsalimia kisha akaingia ndani ambapo huko alimkuta bibi yake akipika cha kula cha usiku. Hivyo hivyo alimsalimia kisha akapitiliza mpaka chumbani kwake, akafungua begi akatoa zawadi alizotoka nazo mjini kwa niaba ya kuwakabidhi wazee wake. Zawadi hizo zilipokuwa tayari akawaita na kuwakabidhi.

"Laah! Mungu akubariki sana mjukuu wangu, akujazie mahali ulipotoa", alisema kwa furaha mzee Mabula mara tu Raham alipomkabidhi zawadi yake koti na suruali ya kitambaa yenye rangi nyeusi bila kusahau shati jeupe iliyoambatana na tai huku pembeni pamoja na viatu vyeusi.

"Usijali babu, hapa ndio naonyesha kwamba nimekua mkubwa. Maana niliwaambia kabisa mama na baba. Safari hii nguo za bibi na babu nanua mimi, cha msingi nyie ni kunielekeza aina ya nguo zitakazo watosha. Nyie sasa kama mtanipa pesa niwapelekee sawa, lakini suala la nguo ni kazi yangu mimi", alisema Raham. Mzee Mabula na mkewe Bi. Mwanahawa waliangua vicheko ikiwa muda huo huo Raham alitoa gauni nzuri na cheni zilizoambatana na bangili kadhaa za ghalama, hakusahau viatu pia. Zawadi hiyo akamkabidhi bibi yake.

"Haya na wewe mke wangu zawadi yako hii hapa, nafikiri huu ndio muda wa mimi kuibiwa", alitania Raham baada kumkabidhi bibi yake zawadi alizo mletea kutoka mjini. Bi. Mwanahawa alipokea zawadi hiyo huku akiachia tabasamu lisilo kifani, akifurahishwa na utani wa mjukuu wake.

"Mungu akubariki mjukuu wangu, sasa narudi kwenye ubinti", alijibu utani sambamba na kutoa shukrani yake. Utani huo yaliwafanya wote watatu kuangua vicheko.

Zoezi hilo la lilipo malizika, Raham alitoka ndani akaelekea mahali palipo kokwa moto, akaketi akamsubiri babu yake aliyekwenda kuhifadhi nguo arudi ili wapate kupiga zogo mbili tatu wakingonjea chakula cha usiku wale ndipo wakalale. Punde si punde babu yake alikuja huku akiwa na wingi wa tabasamu.

"Laah! Asante sana tena sana mjukuu wangu...", akavuta kigoda na kisha kuongea maneno hayo.

"Ahahahah Hahahah", Raham aliangua kicheko cha madaha. Baada kukatisha maneno hayo akasema "Shaka ondoa kabisa babu, tupo pamoja"

"Enhe! Habari za huko kwenye mizunguko yako?.."

"Huko kwema tu, ukweli kijiji kimebadirika sana. Maendeleo si haba, hongeroni sana. Lakini tukiacha na hilo, kuna swali nataka nikuulize babu yangu.."

"Sawa uliza, swali gani hilo?.."

"Kwahiyo huyo msichana mnaye msifia kuwa ni mrembo, inamaana ni mzuri sana? Kwa sababu huko nilipotoka inaonyesha kweli ni mzuri, sifa zake naweza kusema zimetamalaki vijiji vyote!.."

"Ahahahah hahahahahah!..", mzee Mabula akaangua kicheko kwanza, akageuza muhindi aliopo kwenye figa kando ya moto, akapukuchua punje kadhaa akatupia mdomoni kisha akauresheja jikoni halafu akasema "Raham mjukuu wangu! Mimi siku zote siwezi kusifia kitu kibovu hata siku moja, katika maisha yangu sipendi unafki. Ukweli ndio msingi wa maisha. Endapo msichana anakichwa kama dumu mueleze ukweli kwamba wewe ni mbaya, kichwa chako hakina muelekeo. Vile vile ikitokea akawa na sura mbaya, muweke wazi tu mjukuu wangu, kwani ukisema ukweli utapungukiwa nini? Kwahiyo kawaida yangu huwa sitafuni maneno, ni mzuri kweli kweli."

" Cha Muhimu tuombe uzima, Mungu atufikishe kesho. Utashika kijisenti chako tukamuone", aliongea kusema mzee Mabula.

Tabasamu liloonekana katika paji la uso wa kijana Raham, maneno ya babu yake yalimfanya kuachia tabasamu hilo. Punde likohoa kidogo kisha akasema "Sawa babu, lakini punguza maneno yako bwana. Laiti kama wangukuwa wanakusikia wahusika, basi mpaka muda huu ungekuwa mahututi.", akacheka kidogo halafu akatania "Umesema kichwa kama nini?."

"Kidumu", alisisitiza mzee Mabula sambamba na kuangua vicheko wote wawili. Ilikuwa ni furaha sana baina ya babu na mjukuu. Furaha yao hiyo

ilisikizwa na mahindi ya kuchoma usiku huo angavu ulio ng'arishwa na mwanga wa mbalamwezi.

"Ipo haja ya kufuata nyendo zako babu yangu, yaani endapo kama nitavutiwa huyo binti, nitajitahidi kufanya juu chini awe wangu. Zaidi sitotaka kumchafua ila baada ya kupata ajira yangu nitamuweka ndani awe mke wangu kabisa.", aliongea Raham pindi alipokatisha kicheko chake. Mzee Mabula alitikisa kichwa ishara ya kukubaliana na maneno ya mjukuu wake, alimpongeza pamoja na kusema . "Hilo ndilo neno, tena utanifurahisha sana mjukuu wangu. Wewe ni mtoto wa mjini kwahiyo usiniangushe kama hawa wazawa wa hapa kijijini"

"Lakini sijui itakuwaje kuhusu Chiku? ", kwa mashaka liuliza Raham. Mzee Mabula aliposikia swali hilo alimgeukia akaguna kidogo kisha akasema "Chiku? Raham mjukuu wangu, siku zote wanawake wanavichwa vya kukuu bwana. Kwahiyo wewe ondoa shaka kabisa"

"Unamaana gani kusema hivyo?, kwa mara nyingine Raham alimuuliza babu yake huku akishangazwa na jibu hilo. Mzee Mabula kabla hajamjibu mjukuu wake akacheka kwanza kisha akasema "Geuza mhindi huo bwana nitakujibu kesho swali lako"

Sehemu ya 13.

Muda wa kulala ulipofika, Raham aliingia ndani ya chumba alichu andaliwa. Alipolala alikosa usingizi kabisa. Alitamani pawahi kukucha ili akamuone binti huyo wanaye msifia kuwa ni mrembo kuliko mabinti wote kijijini hapo pia na vijiji jirani, lakini pia alitamani kukuche haraka ili amuulize babu yake alimanisha nini aliposema kwamba wanawake wanavichwa vya kuku.

Neno ambalo alipolifikiria mara mbili mbili alijikuta akiachia tabasamu huku moyoni akijisemea "Kweli babu ninaye, yani kaka kafikiria akawaona wanawake wanavyichwa vya kuku. Mara aseme hamsifu mwanamke mwenye kichwa kama kidumu. Mara oooh demu wangu Chiku hajui kusugua magaga. Dah "

"Hahahahaha", aliachia na cheko la kimoyomoyo, yote hayo ni baada kuyafikiria maneno ya babu yake wakati huo huo akijaribu kutafuta lepe la usingizi ambalo ilionekana kumuwea vigumu kupatikana lakini baadaye kidogo usingizi ulianza kumnyemelea baada kibatali chake kuzimwa na mdudu aliyekuwa akiruka ruka kila pande chumbani. Kitendo hicho kilimkera sana, hakuzoea kulala gizani, lakini hakuwa na budi kukubaliana na hali harisi iliyojitokeza, upesi akajivutia shuka kuanzia miguuni mpaka kichwani. Haikuchukua dakika nyingi usingizi ukampitia.

Palipo kucha, asubuhi iliyoonekana nzuri kabisa ikipambwa na sauti za ndege mwitu angani. Huku baadhi ya ndege wakiruka huku na kule, ilihali wale wanakijiji wanyemifugo yao wakiifungulia kutoka mabandani na kwenye mazizi tayari kwa kwenda machungani, na wale wenye uwezo wa kujitafutia chakula basi waliachwa ili wazujihangaikie kujitafutia riziki. Upande mwingine sauti ya milio ya jembe ilisikika ikigongwa kunyoosha makali, vile vile sauti ya panga zinazonolewa nazo zilisikika vyema kuashiria kuwa tayari kumekucha na nimuda wa kuingia shamba kuwajibika. Mlangoni kwa mzee Mabula kijana Raham ndio alikuwa wa kwanza kuamka, alinawa uso haraka haraka kisha akatulia nje kwenye jua hafifu lilochochoza huku akisoma kitabu cha hadithi alichotoka nacho mjini. Muda mfupi baadaye bibi na babu yake nao walianka, baada ya salamu Bi Mwanahawa aliinjika chai jikoni. Ilipokuwa tayari wakaanza kunywa kwa vitafunio vya mikate.

"Raham,ujue umetukomboza sana", pindi walipokuwa wanaendelea kunywa chai Mwanahawa aliongea.

"Kwanini bibi?..", aliuliza Raham huku akisitisha kunywa chai.

"Mara ya mwisho kunywa chai sikumbuki ilikuwa lini? Na sio kwa kupenda? Hapana tatizo ni babu yako, anasingizia kubanwa na kilimo wakati kila mwisho wa mwezi baba yako anaturushia pesa ya vibarua shambani na nyingine kwa niaba ya matumizi"

"Loh! Ama kweli aliyesema wanawake mnavyichwa vya kuku walaa hakukosea, yani we.....", alidakia mzee Mabula akijibu maneno ya mkewe, lakini kabla mzee Mabula hajamalizia alichotaka kusema. Raham alisema "Enhee hapo hapo, babu niambie unamaana gani kusema hivyo . Kwa sababu hata jana uliliongea hilo neno?". Mzee Mabula alivuta kwanza bunda la chai

kwa mbaali kisha aka "Mjukuu wangu, siku zote mwanamke anaweza kufanya jambo baya ukamuonya lakini cha ajabu siku nyingine akarudia jambo lile lile. Hiyo inamaana akili ya mwanamke haiwezi kutunza kumbukumbu kwa muda mrefu, ndivyo ilivyo kwa kuku. Kuku unaweza kumfukuza kwa kupiga mbawa zake ili asile mtama lakini muda mchache utamuona anarudia kuja kula mtama. Hivyo hata bibi yako hapo alipo kichwa chake sawa na chakuku, kasahau kama ni yeye aliyekuwa akisema kwamba masuala ya kudamkia chai ni dalili ya uvivu wa kuwahi shamba. Ajabu leo hii anaongea upuuzi! Sasa nimueleweje?..". Maneno hayo yalimuudhi sana Bi. Mwanahawa, akiwa na hasira akasimama kisha akasema "Kwahiyo mimi nina kichwa cha kuku?.."

"Ahahahahahah", alicheka mzee Mabula.

"Ndio, unaniuliza majibu? Wewe unakichwa cha kuku, unune usinune potelea mbali", alipokatisha cheko lake alijibu.

"Mzee mzima unaongea ujinga kama mtu aliyekula maharage yaliyo chacha!..", huku akionyesha kughadhibika alisema hivyo

Mzee Mabula alicheka kwanza halafu akajibu "ndio!? Unauliza majibu? We we unakichwa cha kuku unune usinune potelea mbali" Mwanahawa alionyesha kughazibishwa zaidi na maneno hayo, hali iliyompelekea kususa kunywa chai, akanyanyuka akaingia ndani

"Sawa lakini ukweli nishakwambia, hata ukisusa kula sisi tunakula bwana ", mzee Mabula akamsindikiza kwa maneno hayo sambamba na kuangua kicheko cha madaha.

"Mtashindia mikate hiyo hiyo wajinga nyinyi", Bi. Mwanahawa aling'aka.

"Tutaona kama mimi sijui kupika basi tutashindia mikate lakini kama najua, basi mchana tutakula ugali. Sasa olewako nipike mimi halafu nikuone unajisongeza, nitavunja miguu. Kwanza wakati wa kula nitakaa na rungu pembeni ili ujue sina utani juu ya suala hili "

"Lakini ujue babu sio vizuri kumfanyia mwenzio hivyo! Ona sasa kasusa chai", alidakia Raham mara baada kuhitimisha cheko lake.

"Achana naye nimesha mzoea mimi"

"Sawa babu, na pia jibu lako nimelipenda. Ahahahahahaaa eti wanavichwa vya kuku daah jamani?..", aliongezea kusema Raham wakati huo uso wake ukionyesha tabasamu bashasha.

Baada ya kumaliza kunywa chai, mzee Mabula alimtaka mjukuu wake waende nyumbani kwa Bi. Mandawa kwa dhumuni la kumuona Sindelela kama walivyokuwa wamepanga siku ya jana. Raham aliingia ndani akachukuwa kiasi cha fedha kisha safari ikaanza huku akiwa na shauku ya kutaka kumuona mrembo Sindelela . Muda mfupi baadaye walifika, ikawa bahati nzuri kwao kwani Bi. Mandawa alikuwa nyumbani siku hiyo hakwenda shamba, alionekana akiwa ameketi chini ya mti uliopo jirani ya nyumba yake huku akimsuka mabutu mjukuu wake. Raham alipouona Sindelela mgongo ambao ulionekana kuwa wazi huku ukiwa na ngozi nyororo, ghafla mwili wake ulisisimka.

"Babu huyo ndio mrembo mwenyewe? ..", kwa sauti ya chini iliyojaa taharuki ndani yake alimuuliza babu yake.

"Hebu tulia bwana, mbona unaanza kuchanganyikiwa kabla hujamkaribia? Je, ukimkaribia sindoutazimia! ", alijibu mzee Mabula. . Jibu ambalo lilimfanya Raham akae kimya ingawa moyoni akitamani apae ili afike haraka mahala pale alipokaa Sindelela.

Hatimaye walifika,Bi. Mandawa akasitisha zoezi la kumsuka mjukuu wake akasalimiana na wageni waliokuja kumtembelea. Kitendo hicho kilimpelekea Sindelela kugeuka kule alipokuwa ikisikika sauti ya mzee Mabula, hapo ndipo Raham alipopata kuiona sura ya binti huyo kipofu, hakika alipagawa. Lakini wakati yupo katika hali hiyo ya taharuki ya aina yake juu ya uzuri wa Sindelela, ghafla Chiku alionekana akijongea mahali hapo. Mzee Mabula alistuka alipomuona, alikunja uso kwa hasira akamgeukia mjukuu wake kisha akasema "Kumekucha sasa Raham, katapila lako limeamua kukufuata huku", Raham alipoyasikia maneno ya babu yake, upesi akageuka nyuma kule alikokuwa akitokea Chiku, naye alikereka na vilivyo kwa jambo hilo alilo lifanya kwa kumfuata mpaka nyumbani kwa Bi. Mandawa, kwa jazba akajisemea "Huyu binti kiherehere sana, lengo lake kitumbua akitie mchanga, sijui nimkatae?.."

Sehemu ya 14.

Alijiuliza Raham, lakini akaona sio vizuri alimuacha ingawa alighadhibika. Wakati huo tayari Chiku alikuwa amemkaribia na kisha kumbatia, kitendo ambacho kilimkera sana mzee Mabula akatamani laiti angekuwa ni yeye basi angemtemea makohozi usoni. Lakini licha ya hivyo uvumilivu ulimshinda mzee huyo na akaamua kusema "Chiku jaribu kuwa na heshima, unawezaje kufika hapa unatoana watu wazima tupo husalimii unaanza kufanya upuuzi wako? Acha ujinga hata kama ni mapenzi hayapo hivyo mpumbavu mkubwa wewe, hujafunzwa kwenu si ndio?"

"Samahani sana babu, ni kweli nimekukosea samahani sana. Lakini yote ni kwa sababu napagawa sana na uwepo wa Raham..", alijibu Chiku huku akiwa bado amemganda Raham, asionyeshe hata uso wa haibu aidha kuyaogopa maneno ya mzee Mabula.

"Alaah! Kwahiyo uwepo wa Raham unakufanya usiwe na adabu si ndio?", kwa hasira mzee Mabula alimuuliza. Chiku hakujibu, safari hiyo alijitoea kwenye kidali cha Raham, uso wake punde ukaonyesha kutofurahishwa na maneno ya mzee huyo. Ikiwa ndani ya nafsi Raham akajisemea "Kama angelijua hata asinge nifuata huku, Chiku umenichafua sana, ila nitajua tu cha kufanya", akamaliza kwa kushusha pumzi ndefu. Muda mfupi baadaye Bi Mandawa akawaletae jamvi wageni wake. Mzee Mabula na Raham walikaa ikiwa Chiku yeye aliamua kuondoka zake akionekana kutofurahishwa na maneno ya mzee Mabula.

"Mbona unaondoka?..", kwa sauti ya juu Raham alipasa sauti kumuuliza Chiku.

"Ndio naondoka ukinihitaji nikukute kule kule kwa jana muda ule ule ", naye alijibu, maneno hayo ya Chiku yalimstua kidogo mzee Mabula, punde akamgeukia mjukuu wake na kumuangalia kwa jicho la mashaka .

"Mh! Ndio wapi huko mkakutane? ", mashaka yakiwa bado yameutanda moyo wake, alimuuliza. Lakini kabla Raham hajamjibu bibi yake, Bi. Mandawa alidakia "Mabula, hayo mambo ya vijana bwana hutakiwi kuingilia. Yani uhuni uhuni wako bado unao tu??.."

"Ahahahah. Hahaha", akaangua kicheko mzee Mabula mara baada kuyasikia maneno ya Bi, Mandawa wakati huo Raham alikaa kimya, alihisi tayari kuna ugumu wa kuweza kuziteka hisia za Sindelela akihofia maneno yale aliyoyaongea Chiku huwenda yakatia dosari.

"Laah! Chiku kiherehere sana", baada kuwaza kwa sekunde kadhaa, alijisemea maneno hayo sambamba na kushusha pumzi ndefu. Muda huo huo mzee Mabula alisema "Huyu ni mjukuu wangu, mtoto wa Masaulo kijana wangu yule anayeishi Dar es salaam. Kwahiyo muda huu wa likizo kamruhusu mwanaye aje kutusalimu babu na bibi yake huku kijijini"

"Anha, jambo la heri kabisa. Hakika ni kijana mzuri anaonekana", aliunga mkono Bi. Mandawa kwa tabasamu bashasha, nafasi hiyo Raham aliitumia kumuuliza Bi. Mandawa.

"Huyu naye ni nani kwako? ..", Bi. Mandawa aliposikia swali hilo alikaa kimya kwanza akionekana kama katoneshwa kidonda cha maumivu kilichokaribia kupona. Lakini kwa kuwa kijana alihitaji kujua ukweli, hivyo hakuwa na budi kumwambia jinsi alivyo yeye na Sindelela. Hakutaka kumueleza kwa ufupi, zaidi aliongea kwa mapana zaidi ambapo mwisho wa kusmulia aliangusha chozi, sio yeye tu bali hata Raham naye alidondosha chozi lake kuashilia kuwa kaguswa na kisa hicho.

Muda huo huo Sindelela alipapasa chini akiitafuta fimbo yake, alipoipata alinyanyuka kisha akajiongoza kuingia ndani. Na hapo ndipo Raham alipoamini kuwa kweli Sindelela ni kipofu, huruma ilimjaa Raham, machozi tele yakaendelea kumtoka ingawa akawa aliyafuta kwa kitambaa chake alichopendelea kutembea nacho. Punde si punde Bi. Mandawa naye alisimama akazipiga hatua kuingia ndani kumfuata mjukuu wake, huko alimkuta Sindelela akilia kwa uchungu huku akimtaja marehemu mama yake ingawa hakuwahi kumtia machoni hata mara moja.

Kilio cha mrembo kipofu Sindelela kilimumiza vilivyo Bi. Mandawa, na hapo ikabidi afanye jitihada za kumbembeleza huku akidiliki kujuta kwanini aliyasema maneno yale mbele yake.

"Mama yangu, ukowapi mama? Kwanini umeondoka na kuniacha? Hukutaka mwanao umione japo mimi kipofu?..", Sindelela aliongea maneno hayo huku

akiendelea kulia kwa uchungu. Shughuli ilikuwa pevu kwa Bi. Mandawa. Lakini wakati akifanya jitihada hiyo ya kumtuliza mjukuu wake anyamaze kulia. Akakumbuka kuwa nje ameacha wageni, upesi akatoka ndani ambapo aliwakuta wageni wake wamenyanyuka wakitaka kuondoka.

"Haya ndio maisha yangu, na hii ndio mboni yangu. Sina wa kumtwisha mtu mzigo huu, nitaendelea kupambana mpaka mwisho wa maisha yangu. Namkumbuka sana mwanangu Pendo kama vile mwanaye anavyo muhitaji, nafikiri kama angekuwepo basi maswahibu kama haya yangepita mbali nami. Yote kwa yote namshukuru Mungu kwa kila jambo..", kwa sauti ya uchungu Bi. Mandawa aliongea maneno hayo kisha akarudi ndani kumbembeleza mjukuu wake, ila kabla hajafika huko mzee Mabula alimuita Bi Mandawa aligeuka baada kusikia wito.

"Nakuomba uje hapa mara moja", aliongeza kusema.

Kwa unyonge kabisa Bi. Mandawa alitii wito, na mara baada kuwafikia mzee Mabula alimpa pole kwa yote hayo huku akitanguliza neno samahani ilhali wakati huo Raham alizama mfukoni akachomoa kiasi cha fedha na kisha kumkabidhi. Bi Mandawa aliwashukuru sana sana, wakaagana huku wakitakiana kila laheri ingawa walitegemea kukutana kwa mara nyingine.

Mzee Mabula pamoja na mjukuu wake walipokuwa njiani wakirudi nyumbani walipiga zogo hususani kwa kile walicho kutana nacho nyumbani kwa binti kipofu.

"Daah babu kiukweli mkasa ule imeniliza sana, kumbe ipo hivyo"

"Ndio hivyo mjukuu wangu, tena muhusika mkuu waliopelekea kifo cha mama wa binti yule kipofu ni mama Chiku, hiki kibinti kilichokufata huku. Walishirikiana na mama yake ambaye ni bibi Chiku"

"Alaah kumbe? "

"Eeh na tangu hapo ile familia naichukia sana, ndio maana kuna muda lile dishi lako naliona kama mama mtu na sio mtoto"

"Dishi langu? Lipi hio?.."

"Si huyo Chiku!?.."

"Doh! Kwahiyo babu Chiku ni dishi? .."

"Jibu hilo"

"Mmh haya bwana"

Upande wa pili marafiki wa Zaulo walikutana na kundi la mabinti akiwemo Chiku wakitokea kisimani, kichwani wakiwa na mitungi iliyojaa maji.

"Jamani yule si Chiku na marafiki zake?..", mmoja ya wale vijana aliuliza.

"Wako wapi?..", mwingine alidakia huku akiangaza kule na huku. Hatimaye wote wakawa wamewaona.

"Naye yumo, sasa ngoja tukamfanyie ubaya ili ajue kuwa imetuuma sana kumbwaga rafiki yetu eti kisa mjinga kutoka mjini "

"Kweli kabisa", vijana hao wenye ukaribu wa dhati na kijana Zaulo wote waliandamana wakamfuata Chiku na kundi lake. Walipo wakaribia walimuita Chiku. Naye aliposikia sauti za kiume zikilitaja jina lake aligeuka akawaona vijana wa kijiji.

"Leo ndio leo mwanaidhaya mkubwa wewe", kwa jazba kijana mmoja aliongea huku akijiamini.

"Kwa kipi hasa?..", alijibu Chiku.

"Nye ni vibwenga wa kijiji, sijui mtaka nini kwetu sisi", akaongeza kusema. Vicheko kutoka kwa marafiki zake vilisikika, vicheko vya dharau.

"Dhamira yetu ipo pale pale, tuwatukane tuwashushe thamani. Zaidi wakitushinda tuwape vichapo mpaka kila mmoja afike nyumbani kwao anatambaa"

"Chiku unajiona wewe mzuri sana, lakini lazima ujue kuwa wewe huna uzuri wowote wa kumzidi Sindelela. Uso wako mbaya kama kiazzi kitamu"

"Haijalishi, ila hamtoweza kuninasa. Mimi sio wa kuwafikiria nyinyi manao koga juma pili mapaka juma pili. Sitoweza na haitawezekana",

Chiku alijibu mapigo jambo ambalo lilipelekea kuzua mtafaruku wa hali ya juu kundi la Chiku na kundi lile la maswahaba wa Zaulo. Lakini dhahiri mabinti

hao walionekana kuwa juu kuliko vijana wa kiume. Ndipo mmoja wao baada kuona hali ni tete alisema "Sio rahisi kuwashinda hawa ndezi kwa maneno, hatupaswi kushindana nao cha muhimu ni kuwachapa fimbo. Nadhani hii ndio njia pekee ya kurejesha heshima yetu. Hususani kwa sisi vijana wa kijiji hiki. Tena hakikisheni mniachie Chiku nimshushie kipigo mimi mwenyewe.. ", kwisha kumsema maneno hayo, upesi vijana wakavamia msitu kukata bakora.

Sehemu ya 15.

"Lakini jamani mimi simo sitaki kesi zisizo na maana, tukishindwa kwa maneno basi tuachane nao ", alisema kijana mmoja akionyesha woga.

"Unaona sasa? Nilijua tu lazima kuna kimbwengo kitaleta woga. Lakini mjue kabisa hawa wasichana watazidi kutudharau miaka yote"

"Kwahiyo tufanyeje? Wakati tangu awali tulikubaliana kuwacharaza fimbo pindi watakapo tuzingua?.."

"Hakuna kuogopa atakaye vunja makubaliano basi huyo tunamuhesabu kama msaliti hatufai kabisa", wakati vijana hao wakishauriana, lakini kabla vijana hao hawajafanya uamuzi huo, nyuma yao alitokea Zaulo akiwa na baiskeli iliyobeba madumu yenye maji. Alipowaona vijana wenzake wakitaka kuwafanyia fujo Chiku na wenzake, haraka sana aliwakataza . Nao walimuelewa sana ambapo baada kutuliza hasira zao, Zaulo aliwaambia "Sikilizeni marafi zangu, siku zote hasira mwishowe hugeuka kuwa hasara. Kutumia busara ni maarifa tosha hakuna haja ya kuwachapa hawa mabinti ila ipo siku baadhi yao watatukumbuka pindi baadhi yao watakapo zalia manyumbani mwao na kukosa vijana wa kuwaoa. "

Akashusha pumzi ndefu kisha akahoji "Labda niwaulize swali, tangu lini mechi ikaanza tayari timu imefungwa goli moja?..",swali lilikuwa tata sana kwa marafiki zake. Katu hawakumuelewa alichu manisha. Kila mmoja alimtaazama mwinzie hali ambayo ilisababisha kimya kidogo kitawale lakini baada ya kimya hicho kifupi mmoja wao akafungua kinywa chake "Hakuna mechi ya namna hiyo, siku zote mechi inaanza ikiwa bila bila mpaka dakika tisi ndizo zinaamua matokeo. Lakini Zaulo unamaana gani kusema hivyo?..", Zaulo alicheka kwanza kabla hajafafanua kile alichu zungumza, alipohitimisha cheko

lake akasema "Hebu tupeni kwanza fimbo zenu, turudi kijiji waache hao vibatani, ni nani asiyejua familia ya mzee Masumbuko?Tumekuwa tunaambiwa ile familia haifai hata robo, na ndicho tunacho kiona hata kwa Chiku. Chiku sio wa kuniacha mimi kizembe wakati nilimpenda sana kuliko mali zangu " ,

"Ahahahahaha", waliangua vicheko vijana hao, maneno ya Zaulo yaliwavunja mbavu. Upesi wakatupa fimbo zao.

"Huo ndio unaume. Chiku hana maana tena, na maana yangu nitawaambia siku nyingine ili mnielewe kile nilicho maanisha lakini moyo wangu unatamani kuona Chiku akipewa mimba na kuachwa ili adumishe utamaduni kama ilivyo kwa mama yake", aliongeza kusema Zaulo. Wakati hayo yanajili, upande wa pili Chiku na wenzake tayari walikuwa wameingia kijijini.

"Furaha niliyo nayo hata siwezi kuelezea", alisema Chiku.

"Furaha gani tena Chiku? au wa mjini kakuletea zawadi mororo?.." aliuliza moja ya marafiki zake.

"Ndio, ulijuaje? Nakwambia leo nataka nipendeze mpaka wale wakata mkaa watakapo niona waone nongwa. Watakula kwa macho tu ila atakaye faidi ni yule mtanashati kutoka mjini"

"Wachaweee! Lakini Chiku kumbuka huyo unaye msema mkata mkaa ndio alikuwa akikupa hela anakununulia zawadi anamsaidia mama yako kulima. Ajabu leo unamuona hafai, sio vizuri ujue?.."

"Huna lolote wewe la kuniambia, kwani alipokuwa ananipa hivyo vitu nilimuomba? Si yeye mwenyewe alijipendekeza? Kwahiyo ningeacha kupokea?... ", alijibu Chiku kwa hasira, ni wazi maneno ya rafiki yake yalimchukiza.

"Basi samahani Chiku kama nimekuudhi,ila.."

"Ila nini? Achana na mimi bwana. Kaaa kimya ebo", aliongeza kusema Chiku kwa jazba kitendo ambacho kilizaa ukimya mpaka pale kila mmoja aliposhika njia ya kuelekea nyumbani kwao.

Upande mwingine alionekana mzee Mabula akiwa katika harakati za kupika chakula, mzee huyo aliamua kufanya jukumu hilo baada mkewe kugoma kupika siku hiyo. Maneno ya chuki mzee Mabula aliyomwambia mkewe yalimpelekea Bi. Mandawa kususa kupika chakula, mzee Mabula hakuona tabu kabisa kupika mwenyewe kwani naye hakuwa haba katika sekta hiyo. Alishirikiana vyema na mjukuu wake ambapo yeye wakati anasonga ugali, Raham naye alikuwa akiosha vyombo ikiwa Bi. Mwanahawa yeye akiwa kando kabisa akisuka ukili.

Baada ya dakika kadhaa chakula kilikuwa kimeiva "Raham, njoo utenge maji ugali tayari, pia hapo nyuma ya mlango chumbani kwako kuna rungu langu, njoo nalo ", alisema mzee Mabula sambamba na kuubwaga ugali kwenye sahani.

"Ahahahahaha", aliangua kicheko Raham. Alipokatisha cheko lake akasema "Ni kweli umepania kabisa"

"Rungu la ndezi leo litavunja miguu ya mtu", alijibu mzee Mabula, akamgeukia mkewe kisha akaongeza kusema "Ulijua unatukomoa? Unadhani sijiui kupika? Sasa umenoa ujuzi hauzeeki, aliyeogelea siku zote hazami ila kama unajiamini njoo ule uone nitakacho kufanya. Rungu langu limezoea kupiga ndezi ila safari hii litakupiga wewe ", maneno ya mzee Mabula aliyosema yalimpelekea Raham kuendelea kuachia kicheko.

"Hii ni vita mimi sistahili kabisa kutia neno", alipokatisha kicheko chake akasema maneno hivyo wakati huo upande mwingine alionekana Chiku akija mahali hapo hima hima huku akiwa kapendeza pasipokuwa na mfano, mtu wa kwanza kumuona alikuwa Bi. Mwanahawa bibi yake Raham. "Raham kula pole pole mchumba wako huyoo anakuja", alisema Bi. Mandawa, haraka sana Raham akageuka kutazama kule anako tokea Chiku, si yeye tu bali hata mzee Mabula naye aligeuka kule kule. Alitikisa kichwa ishara ya kukataa jambo fulani ikiwa muda huo huo akalisogeza rungu lake jirani zaidi na mkono wa kushoto ilihali Raham naye akionekana kukerwa na ujio huo, pumzi ndefu akashusha kisha akajisemea ndani ya nafsi yake "Naona kafuata zawadi niliyomuahidi, lemekuwa deni sasa, Sikujua kama muda mwingine mabinti wa vijijini ni vihere here kiasiki.."

"Anakujaje mpaka nyumbani? Sasa ngoja leo nimkatae na iwe mwanzo mwisho kati yangu na yeye ", aliongeza kusema Raham huku moyo wake ukiwa umefura hasira, wakati huo mzee Mabula akimuangalia Chiku jicho pembe sambamba na kulihadaa vyema rungu lake.

Sehemu ya 16.

Aliona hakuna namna nyingine kama sio kumkataa Chiku kisha aanze mkakati wa kumfuatilia mrembo kipofu kabla muda wa kurudi Dar haujafika, Chiku alipo mkaribia Raham aliachia tabasamu.. Tabasamu ambalo Raham hakulionyeshea ushirikiano wowote zaidi ya kumtazama kwa jicho la hasira kitendo fambacho kilimshtua sana Chiku lakini hakujali kwa muda huo zaidi alijongea mpaka mahali alipokaa Mwanahawa.

"Shikamoo Bibi, kulikoni mbona umejitenga wakati wenzako wanakula? .."

"Chiku, mimi nimeshiba ila kama ningekuwa na njaa kamwe nisingekubali wale huku mimi nawangalia tu..", alijibu Bi. Mwanahawa.

"Anhaa sawa, lakini lile rungu nalo vipi?..", Bi. Mwanahawa alicheka kwanza kisha akajibu "Mmh sijui bwana, unajua babu yako anavituko sana.. Hebu tuachane na hayo, vipi nyumbani mama hajambo? .."

"Ndio mama mzima anakusalimia"

"Anhaa! Basi na sisi tunamshukuru Mungu, tuwazima wa afya kabisa kama unavyo tuona" alisema Mwanahawa, papo hapo akamgeukia Raham kisha akamwambia "Raham mbona humkaribishi mwenzi? .." Raham kabla hajamjibu bibi yake, mzee Mabula alidakia "Ukiona hivyo basi ujue kikombe chake hakikuhesabiwa. Kwani katoka kwao hajala? .. " Jibu hilo la mzee Mabula lilimshangaza sana Bi. Mwanahawa pamoja na Chiku.

"kwanini huyu mzee ananichukia sana? Yani hataki wala hapendi kuniona?..", alijiuliza Chiku, jibu alikosa akabaki kumsubiri Raham amalize kula ili waondoke nyumbani hapo kwa mzee Mabula waende kando kidogo amkabidhiwe zawadi aliyomuahidi kisha wazungumze mambo mbali mbali kuhusu mapenzi yao, pasipo kujua ya kwamba kijana Raham tayari

ameshabadilisha gea juu kwa juu kuhusu mahusiano naye. Chazo ikiwa ni kijana huyo kuvutiwa na Sindelela mrembo ambaye ni kipofu.

Baada ya kumaliza kula, Raham aliinuka akaingia ndani, huko alikaa kitandani akitafakari ni njia gani ya busara anatakiwa kutumia kumkataa Chiku, aliwaza sana mawazo ambayo yalimchukuwa muda mrefu bila kupata jawabu, na kwa kuwa alijifikiria kwa muda mrefu hatimaye usingizi ulimpitia akawa amelala fo fo akimuacha Chiku nje akiendelea kuongea na bibi yake ingawa mwishowe Chiku alipoona Raham hatoki ndani aliamua kuaga na kisha akaondoka zake huku akionekana amekasirika hasa kwa mambo mawili makuu. Ambayo sababu moja ni kukosa zawadi aliyoahidiwa na Raham, pili Raham kuingia ndani na kushindwa kutoka ilihali anajua kabisa kilichomleta. Suala hilo Chiku lilimuuma sana akachukulia kama Raham kauzara ujo wake, ndipo kimoyo moyo akajisemea "Kama Raham ananipenda basi atanifuata nyumbani, na kama hanipendi basi nitajua tu"

Ilipo timu saa kumi na moja jioni, Raham aliamka akiwa bado hajakata njia ya busara jinsi ya kumuacha Chiku. Mwishowe aliona heri akamueleze babu yake akidhanja huwenda akawa na mawazo chanya yatakayo mpa wepesi zaidi juu ya suala hilo linalo umiza kichwa.

"Naam! Babu anaweza kunisaidia", alitabasamu akiwa kitandani akiliafiki wazo lake, haraka sana alitoka ndani. Alipo fika nje alimkuta bibi yake akichuma mboga ya maboga kando ya nyumba kwa niaba ya chakula cha usiku, akajinyoosha sambamba na kupiga mwayo kisha akamsogelea bibi yake. "Vipi bibi mke mwenzako aliondoka akiwa amenuna?.."

Bi. Mwanahawa alipo sikia swali hilo la mjukuu wake, alisitisha zoezi la kuchuma mboga akamgeukia kisha akamjibu "Ndio, we unaona umefanya vizuri? Umeingia ndani umekaa huko wewe mpaka mwenzio kachoka akaona bora aondoke. Tena kaondoka akiwa amekasirika vibaya, hebu fanya ukamuombe msamaha. Usifuate akili za babu yako ", alijibu Bi. Mwanahawa. Raham alikaa kimya huku akiwa ameinamisha uso wake chini kwa muda dakika kadhaa. Kichwani alikuwa akiwaza jambo, lakini mwishowe aliinua uso wake kisha akamuuliza bibi yake mahali alipoelekea babu yake.

"Hajaniaga ila nafikiri kaenda kukagulia mitego yake", alijibu Bi. Mwanahawa.

"Raham,hivi umeshawahi kula nyama ya ndezi?..", punde sauti ya mzee Mabula ilisikika ikisema hivyo. Raham alipo sikia sauti ya babu yake aligeuka kule ilikotokea, akatabasamu na kisha kusema "Aaaah babu ujue hivi punde tu nilikuwa namuuliza bibi wapi ulipo elekea, kumbe ulikuwa kukagua mitego yako? "

"Ndio bwana, na leo nimewabahatisha sana. Mjini hawa hawapo, si ndio?"

"Ahahaha, watoke wapi? Lakini hawa na panya buku ni mapacha?.."

"Huo ni utani wa ngumi, utanikera. Panya atabaki kuwa Panya, na Ndezi watabaki kuwa Ndezi. Nyama yao tamu haiishi hamu. Njoo huku machinjioni halafu uniambie mkono wa sweta ulioandoka saa ngapi"

"Maana uliuacha nje ukaingia ndani moja kwa moja ukalala. Ahahahahah Hahaha Raham wewe ni mjanja sana hongera kwa hilo", aliongeza kusema mzee Mabula.

"Hahaha ha Hahaha", Raham naye akachekea pia. Alipokatisha cheko lake akasema "Hivi maneno hayo huwa unayotoa wapi? Mara hii Chiku kawa mkono wa sweta? Yaani umetoka kwenye Katapila, Dishi mpaka sasa mkono wa sweta.."

"Ukweli ni huo hata ukinuna shauri yako, si Chiku tu bali familia yote ya mzee Masumbuko mimi naichukia hasa ninapo muona yule binti kipofu, roho inaniuma sana"

"Doh! Lakini yote kwa yote hebu tuachane tupo pamoja, mkono wa sweta nasikia umeondoka ukiwa umekasirika. Nilipo ingia ndani sikuweza kutoka tena"

"Kwani alikuwa amefuata nini?.."

"Mmh! Nilimuahidi zawadi kutoka mjini, bila shaka ndio alikuwa ameifuata"

"Atajua yeye na Mungu wake, asikupe tabu. Leta sufuria na kisu tuwatengeneze Ndezi wetu"

"Lakimi babu kuna jambo nataka unishauri, subiri nakuja kukwambia", alinyanyuka Raham akazipiga hatua kuingia, punde si punde alitoka na sufuria pamoja na kisu akamkabidhi babu yake.

"Ni jambo gani hilo?..", pindi alipoketi mzee Mabula akamuwahi kwa kumuuliza swali hilo.

"Nataka niachane na Chiku", alijibu Raham. Mzee Mabula akageuka kumtazama akaachia tabasamu bashasha kisha akasema "Sema nataka nimuache Chiku na sio niachane. Raham mjukuu wangu katika maisha yako hasa kwenye mahusiano usithubutu kuandika historia ya kuanachana na mwanamke, wewe mwanaume ndio unatakiwa kumuacha mwanamke. Mwanaume haachwi ila anaacha. Sawa sawa?.."

"Sawa babu lakini naomba uniambie nitumie njia gani kumuacha Chiku, sitaki kumuacha kikatili nataka nimuache kistaarabu kabisa", aliongeza kusema Raham. Mzee Mabula akacheka kwanza halafu akasema "Unataka kuachana na mkono wa Sweta? Ni rahisi sana, ni kuukata tu"

"Acha utani bwana babu"

"Mimi sitanii, subiri nikwambie nimemanisha nini kusema hivyo, wewe bado Lena wa mapenzi ingawa umekulia mjini, kalete kiberiti kwanza halafu uje nikupe mbinu.

Sehemu ya 17.

"Ni iwazi unamtaka Sindelela ilihali unajua kabisa unamahusiano na Chiku? Na ndio maana unaumiza kichwa jinsi gani ya kuweza kumuacha Chiku ikiwa ni njia moja wapo ya kuvunja mahusiano naye, jambo ndogo sana hilo mjukuu wangu..", alisisitiza mzee Mabula.

"Sawa babu mimi nakusikiliza nipe mbinu"

"Enhee! Kwanza tambua Chiku katoka hapa akiwa amenuna kwa sababu alikuja kwa lengo la kukutana na wewe ili umpatie zawadi uliyo muahidi. Hivyo basi kwa namna akili za wanawake ninavyo zijua, hapo Chiku atakuwa amekutega kinamna aone kama utakwenda kumuomba msamaha. Endapo kama utakwenda kumuomba msamaha, atajiona wa thamani sana lakini kama hutokwenda kumuomba msamaha atajishuku na kuona humpendi hata kidogo. Kwahiyo wewe kaa kimya usifanye jambo lolote juu yake wala usithubutu kumtamkia kuwa humpendi ataumia sana, zaidi matendo yako

yatamfanya ajue wazi kabisa kuwa humpendi. Hiyo ni ndio busara mjukuu wangu. Pia pindi utakapo kuwa unafanya hayo usisahau kuweka ukaribu na binti yule kipofu ili apate kukuzoea wakati huo mimi nitakuwa na bega kwa bega na bibi yake kumshawishi asiweke kikwazo kwako pindi utakapo jenga mahusiano na mjukuu wake. Ila Raham jambo moja tu tafadhali sitaki ulifanye. .", aliongeza kusema mzee Mabula.

"Jambo gani hilo babu?..", Raham aliuliza.

"Sitaki umrubuni ufanye, usithubutu kuuvunja usichana wake kabla hamjaoana. Nina uhakika kabisa yule binti bado ni bikira, na siku zote bikira kwa mtoto wa kike ni jambo la heri sana kwa sababu ni zawadi kwa mumewe. Kwahiyo pindi utakapo taka kumchezea tambua na wewe ni binadamu unaweza kupata misuko suko akashindwa kumuoa akajikuta unamuacha mtoto watu akiwa ni moja ya mabinti washenzi na wapumbavu ", alijibu mzee Mabula. Maneno hayo ya mwisho yalimfanya Raham kuangua kicheko. Punde alipo katisha cheko lake akahoji swali la kizushi.

"Kwahiyo babu unataka kusema kuwa wale wasichana wasio kuwa na bikira ni wapumbavu?.."

"Sio kwamba nataka kusema, Raham nishasema hivyo. Na kiukweli laiti kama ninge kuwa na uwezo basi ningeamlisha wasichana wasio na bikira wote hakuna kuolewa ", alijibu kwa msisitizo mzee Mabula. Kauli tata ambayo iliweza kumgusa Bi. Mwanahawa. Kwa hasira bibi huyo akasema "Muda wote Mabula nilikuwa nakusikiliza nikijua unaongea vitu vya maana na utamaliza maongezi yako kwa maana nzuri pia, kumbe huna lolote unaongea ujinga tu. Sasa akina nani hao wanaowatoa bikira? Je, ni wanaume au wanawake? Ama hizo bikira zinajitoka? Punguza ujinga wewe mzee wewe, unamfundisha nini sasa huyo mtoto?",mzee Mabula aliposikia maneno hayo alimgeukia Raham, akatabasamu kidogo sambamba na kusema "Raham upele umepata mkunaji. Ngoja nikae kimya tutaongea baadaye. Hebu koleza moto hapo tuwachome hawa ndezi wetu. Muache huyo aendelee kuongea mdomo mali yake bwana ",Raham alifanya hivyo kama alivyo ambiwa na babu yake.

Kijana Zaulo hapo awali suala la kuachana na Chiku alilichukulia kawaida lakini baada ya kutafakari kwa kina zaidi akaona alipoteza nguvu nyingi kwa ajili yake, alifanya kazi kama mtumwa ili apate pesa ya kumpa yeye. Akadiliki

kumnyima mama yake pesa pindi alipomuomba hatakama alikuwa nayo alisema sina ilihali hakuwahi kufanya hivyo hata mara moja kwa Chiku, penzi lake kwa Chiku lilimfanya kuonekana zezeta. Hivyo kitendo hicho cha Kuachwa kilimuuma sana akawaza afanyeje ili amalize machungu yake? Alitamani ampige labda huwenda moyo wake utaridhika lakini akaona huwenda akajisababishia matatizo, alitamani akamshtaki ila akaona hana cha kujieleza kwani vitu alivyokuwa akimuhonga hawakuandikishiana. Zaidi akabaki anashindwa afanye nini, machozi yalimtoka roho ilimuuma sana lakini hakuwa namna zaidi ya kuupiga moyo konde. Akiwa katika hali hiyo alikuja mama yake akiwa amebeba mtungi wenye majiyna kichwani.

"Zaulo mwanangu kulikoni mbona unaonekana mnyonge? Halafu sio kawaida yako mpaka muda huu kuwepo hapa. Au leo hakuna chai ya tangawizi kilingeni kwenu?..", mama Zaulo alimuuliza kijana wake.

"Kuna tatizo?..", akarudia kumuuliza tena huku akiutua chini mtungi wake.

"Mama we acha tu", alijibu Zaulo, wakati huo uso wake ukionyesha kubeba jambo fulani lenye uzito ndani yake, hali hiyo ikawa imezidi kumuweka mama yake katika taharuki na kuhitaji kufahamu ukweli zaidi kutoka kwa kwake.

"Kulikoni mwanangu naomba uniambie baba angu, wewe ndio mwanangu pekee usipo niambia mimi utamwambia nani? Ama ni mambo ambayo sistahili mimi kuyajua?.."

"Hapana mama, awali ya yote napenda kukuomba msamaha kwa mambo ambayo nilikufanyia. Mama nadhani unatambua kuwa kwa kipindi kirefu sana nipo kwenye mahusiano na Chiku. Kiukweli yule binti aliniteka kiasi kwamba mimi nikawa zezeta kwake, kila alichosema sikupinga. Nilifanya kazi kwa bidii sana ili nipate hela ya kumpa, kuna wakati nilikunyima wewe ila yeye nilimpa. Yote hayo kulitunza penzi letu ili asiniache solemba. Lakini leo hii Chiku ananisaliti. Chiku ananikana anadai kwamba hawezi kuishi na mimi mkata mkaa. Hivi kweli kusahau kama nilikuwa nampendezesha kwa hela ya mkaa? Mama hivi kosa langu ?..", aliongea kwa uchungu Zaulo sambamba na kuangua kilio. Mapenzi yaliutesa moyo wake hasa kwa jinsi alivyo jitoa kwa mrembo Chiku.

"Nyamanza mwanangu, mimi nimeshakusamehe. Nilijua ujana ndio unakusumbua, na endapo ukikua basi utajitambua lakini bahati nzuri maswahibu yamekupata kabla hujauvuka ujana wako. Hivyo fanya hayo yamepita ganga yajayo, tulia fanya ibada utampata tu atakaye kufaa, ukweli mwanangu ile familia ulikuwa umefika pabaya, sio watu wazuri wale", mama Zaulo alisema kwa sauti ya chini, akimuondoa shaka kijana wake.

"Sawa mama asante kwa ushauri wako pia na msamaha wako", akiwa na tabasamu hafifu alijibu Zaulo.

"Usijali mwanangu, enhee vipi tanuru lako la mkaa?.."

"Lipo safi tu tena huwenda nikapata magunia mengi sana maana sio mchezo. Na endapo nikifanikiwa kupata kiukweli mama nitakununulia zawadi nzuri sanaa "

"Etiee! Haya mimi nakuombea ufanikishe mwanangu "

"Kweli? Ammh leo nimenasa digidi watatu mama, kwahiyo utapanga mwenyewe jukumu la mboga "

"Anhaa sawa afadhali acha nikanunue na mchele dukani kwa Masaulo, ili siku ya leo iwe njema upande wetu"

"Aah! Nakupenda sana mama yangu"

"Hata na mimi nakupenda mwanangu, ndio maana sipendi kukuona ukiwa mnyonge"

*****'

Siku zilisogea, takribani wiki mbili zilikatika Raham na Chiku pasipo kuonana, Chiku alisusa akisubiri Raham amfuate kumuomba msamaha. Ikiwa ndani ya wiki hizo hizo mbili Raham tayari alikuwa akianza mkakati mzima wa kumchumbia kipofu Sindelela. Mkakati ambao kwa upande wake ulikuwa mgumu sana mpaka kufikia hatua ya kutaka kukata tamaa kwani Sindelela bado alionyesha ugumu kuhusu suala nzima la mahusiano. Mrembo kipofu alimchukulia Raham kuwa ni mtu anaye endeshwa na mihemko ya kimwili, hivyo moyo wake ukawa mgumu mithili ya chuma kuweza kumuamini.

"Babu nafasi napata ya kuongea na yule mrembo kipofu lakini kila nikimwambia suala la mimi na yeye kuwa wapenzi hataki kunielewa kabisa sijui kwanini, yani mapaka nahisi kukata tamaa.", jioni moja Raham alimwambia babu yake. Mzee Mabula alipo sikia maneno hayo ya mjukuu wake alicheka kidogo kisha akajibu "Jambo la kwanza mshukuru Mungu bibi yake yule binti anakuruhusu ukae na mjukuu wake na kuanza kuzungumza naye. Nafasi hiyo hawaipati vijana wa kijiji hiki wala vijiji vingine bali ni wewe tu, kwahiyo mjukuu wangu hupaswi kukata tamaaa mapema, pambana baba. Na siku zote ukaae ukijua kuwa mwanamke imara hajilengeshi", maneno hayo yalimpa moyo kijana Raham, ghafla akajikuta kama kajazwa upepo mara dufu wakati huo huo akaona hakuna haja ya kukata tamaa.

"Ndio maana nakukubali sana babu, we ni kichwa. Najivunia kuwa na babu kama wewe", alimsifu babu yake.

"Kabisa ni jambo la kujivunia mjukuu wangu, kwa sababu nakupatia vile vitu adimu ambavyo ni nadra kuvipata sehemu nyingine"

"Sio siri"

"Jitahda hii yote kwa sababu sitaki uhusiano wako na yule binti mwenye komo kama kifuu cha nazi. Kijana mzuri mtanashati kutoka mjini, lazima uendane na nyendo zako*

"Enhee embu nambie kwanza ulienda kumuomba radhi?..", aliongeza kusema mzee Mabula.

"Nani! Mimi? Aawapi nani aende? Na kama anasubiri nikanyage nyumbani kwao kwa niaba ya kumuomba msamaha hapo amenikosa "

"Aah kweli lakini Raham?.."

"Babu? Mimi siwezi kukudanganya. Kwanza kwa sasa nipo katika mkakati mzito wa kuhakikisha namnasa mrembo kipofu. Kwahiyo siwezi kuchanganya mambo mawili kwa wakati mmoja"

"Naam kabisa hapo umeongea kitu kimoja kuzuri sana"

"Ndio hivyo, tuachane na hayo kwanza. Vipi kesho tutaenda wote kukagua mitego yako?.."

"Hapana naenda peke yangu, wewe itabidi ufuatilie huo mpango usikose kwenda hata siku moja ili yule binti apate kukuzoea zoea bwana "

"Umenena mzee! Ingawa ni mlima mrefu ila nina imani nitafanikiwa tu".

Siku iliyofuata, asubuhi baada ya kifungua kinywa kila mmoja alielekea katika mizunguko yake. Raham alielekea kwa Bi. Mandawa kwa niaba ya kuteta na Sindelela, ilihali upande mzee Mabula alikwenda kukagua mitego yake. Dhumuni kuu la kijana huyo ni kujaribu kwa mara nyingine tena kutupa ndoano yake kumnasa Sindelela mrembo kipofu, binti ambaye alivutia vyema machoni mwa wanawakijiji. Kabla Raham hajafika kwenye mji wa Bi. Mandawa, alishusha pumzi ndefu kwanza wakati huo huo akakumbuka maneno ya babu yake aliyomwambia siku ya jana.

"Nafasi hiyo hawaipati vijana wa kijiji hiki wala vijiji vingine bali ni wewe tu, kwahiyo mjukuu wangu hupaswi kukata tamaaa mapema,pambana baba. Na siku zote ukaae ukijua kwamba mwanamke imara hajilengeshi ",aliachia tabasamu mwanana baada kukumbuka maneno hayo ya babu yake, akatikisa kichwa kisha akaendelea na safari yake huku akiwa na wingi wa matuamaini ya kumtwaa mrembo kipofu.

Sehemu ya 18.

Alipofika nyumbani kwa Bi. Mandawa alikuta ndio katoka shamba, hivyo kwa kuwa Bi. Mandawa alitokea kumpenda kijana huyo, kamwe hakisita kumkaribisha, naye Raham alikaribia ipasavyo. Mara baada kumkaribisha, alipasa sauti kumuita mjukuu wake. Sindelela alipo sikia sauti ya bibi yake aliamka kutoka kitandani, kwenye kona ya chumba chake kuitafuta fimbo yake anayotumia wakati wa kutembea. Alipo ipata alizipiga hatua kutoka ndani wakati huo Raham macho yake yote akiukodolea mlango anao tokea Sindelela.

Alipo muona alishindwa aseme nini, alivutiwa mno na uzuri wa mrembo huyo kipofu, hivyo kimoyo moyo aliomba dua ili itokee siku Sindelela aweze kumuelewa hitaji lake. Hakika Sindelela alivutia kila idara japo alikuwa kipofu lakini upofu wake haukuweza kuficha uzuri aliokuwa nao

"ABee bibi ", aliitikia mara baada kujihakikishia tayari amemkaribia bibi yake.

"Umeshindaje mboni yangu?.."

"Nimeshinda salama wala usihofu..", aliitikia Sindelela, jibu ambalo lilimpa furaha Bi. Mandawa hata pia Raham naye alifurahi pia. Hasa hasa pale Sindelela alipomjibu vile bibi yake huku akitabasamu, tabasamu hilo la Sindelela liliufanya moyo wa kijana Raham kuwa baridi mithili ya mwili ulio mwagiwa chenga za barafu.

Baada ya maongezi mawili matatu kati ya bibi na mjukuu, mwishowe Bi. Mandawa alinyanyuka akaingia ndani ili kuwapa nafasi vijana. Raham alitambua fika maana ya bibi huyo, hivyo hakutaka kuchezea nafasi. Upesi alimsogelea Sindelela na kisha kumgusa shavu sambamba na kumtania "Sindelela mzima? .."

"Ndio mimi mzima, anhaa Raham wewe? ..", huku akiwa na tabasamu lisilo kifani, alijibu Sindelela.

"Ndio mimi, vipi umenijuaje wakati huoni?..", Raham aliongeza kusema wakati huo asiishe hamu kumtazama mrembo huyo kipofu. Naye aliposikia maneno hayo alikaa kimya kidogo akanyonya mdomo akachezea vidole vyake kwa kuvinyoosha navyo vikatoa mlio fulani "taa..taah tah ", hicho kitendo kilimfanya kijana Raham kujitabilia mapema kuwa siku hiyo anaweza kukubaliwa ombi lake la kutaka kuwa mpenzi wake.

Moyoni aliamini kwamba msichana pindi anapofanya kitendo hicho, shughuli inakuwa imekwisha, haruki hapo hata afanyeje. Ujasiri ukamjaa, upesi akazidi kukisogeza kigoda alichokalia karibu zaidi ya Sindelela. Baada kufanya hivyo aliushika mkono huo aliokuwa akiunyoosha vidole, kwa sauti ya chini akarudia kumuuliza "Hivi umejuaje kama mimi Raham ilihali huoni? .."

"Nimejua tu kwa sababu sijawahi kuguswa shavu na mtu, pia nilikusikia sauti yako", alijibu Sindelela kwa sauti nyororo isiyo isha hamu. Sauti hiyo ilizidi kumchanganya Raham, nafasi hiyo ilimfanya azungumze yaliyo moyoni mwake kwa mara ya pili. Hapo Sindelela alionekana kustuka kidogo akamuuliza

"Mimi nikipofu sitambui kinacho endelea kwenye hii dunia, utanipenda kweli au unataka kunilaghai ukate kiu yako kisha uniache soleembe?.." , alihoji Sindelela,safari hiyo aliongea kwa unyonge ulio jaa maumivu ndani yake.

Raham alikaa kimya akiyatafakari maneno ya hayo. Akawaza asemeje ili Sindelela aweze kumuamini? Akakumbuka maneno ya babu yake aliyomwambia kwamba siku zote mwanamke imara hajilengeshi. Maneno hayo yalizidi kumpa ile hali ya kujiamini, punde si punde akavunja ukimya akajibu "Niamini Sindelela nitakupenda daima "

"Nahitaji muda kufikiria Raham, usichoke kuja kuniona maana nafarijika kusikia sauti yako", aliongeza kusema mrembo huyo kipofu mara tu alipopata jibu hilo la Raham. Maneno hayo ya mwisho yalimtia moyo kijana Raham akajipa matumaini kibao ndani ya moyo wake, vile vile alitia nia kutoacha kuhudhulia siku hata moja kwa sababu aliona Sindelela tayari kaeleweka ila bado anamzuga tu.

"Usihofu Sindelela sichoki na sitochoka kuja hapa.", alijibu Raham.

"Unasema kweli?.." , kwa furaha Sindelela aliuliza.

"Ndio, yani heri nishinde njaa kuliko siku ipite bila kukuona"

"Ahahahah.. Ahahaha", maneno hayo yalipelekea wote wawili kuangua vicheko. Baada ya hayo wakaanza kuongea mambo mengine mbali mbali hali ya kuwa muda huo Bi. Mandawa akiwa ndani akiandaa chakula. Mwishowe Raham alimuaga aliaga kwa dhumuni la kurudi nyumbani, ajabu Sindelela alionekana kupoa tofauti na mwanzo alivyokuwa, ile hali ya kuchangamka ilitoweka kabisa.

"Mbbona kama umebadirika ghafla ghafla?.." , kwa mashaka Raham alimuuliza.

"Nimekukosea Raham!.." , naye alihoji kwa sauti ya upole iliyojaa huzuni ndani yake huku mkono akiwa ameweka shavuni. Raham alishusha pumzi baada kusikia swali hilo la mrembo Sindelela. Kimoyomoyo akasema "Naam! Mambo sasa sio mabaya"

"Hapana wala usijali ondoa shaka kabisa, nawahi nyumbani kuna kazi natakiwa kuifanya muda huu", alijibu Raham. Muda huo huo Bi. Mandawa

alitoka ndani na sahani iliyojaa ugali huku bakuli likikandamizwa katikati ya ugali. Bibi huyo alistuka baada kumuona Raham akiwa amesimama. Ni wazi alijua fika kijana huyo anataka kuondoka.

"Mbona unaondoka? Kaa chini ule na mwenzio", alimuasa lakini Raham alikataa katu katu.

"Usipokula na mimi sili..", wakati anapinga jambo hilo, Sindelela alisema. Alishangaa Raham, muda huo huo Bi. Mandawa naye akimtazama usoni pasipo kusema neno lolote. Haibu ikamshika kijana huyo, akajivunga akaamua kula chakula na mrembo kipofu. Kitendo hicho kilimfurahisha sana Sindelela. Baada ya kula chakula Raham alishukuru kisha akaaga, akaondoka zake huku moyoni akiwa na matumaini kibao kuhusu mrembo Sindelela.

Aliporudi nyumbani, siku hiyo alikuwa na furaha sana tofauti na siku kadhaa za nyuma. Kama ilivyo ada babu yake alimuuliza kiliyo jili huko. Naye alianza kwa kucheka kisha akajibu "Babu, kama ni ng'ombe basi nimebakisha mkia tu....", mzee Mabula aliposikia maneno hayo ya mjukuu wake alifurahi sana akamsogele karibu zaidi kisha akamuuliza "Kwahiyo kila kitu kiko sawa?.."

"Kabisa babu"

"Alaah! Safi sana, sasa yule mwenye pua kama begi kama anakungojea ukamuombe msamaha kudadeki atadeki bahari nakwambia"

"Babu Chiku kitu gani? Sasa hivi mimi namfikiria MREMBO KIPOFU "

"Safiiii Raham, kweli wewe ni kidume cha mbegu"

"Ahahaha hahaha.. Mrembo kipofu.. Mrembo kipofu.. Mrembo kipofu.."

Kwa pamoja waliimba, hakika babu na mjukuu walifurahi sana kisha wakagongeana mikono, wakati huo huo kwa mbali alionekana Chiku akiya hapo nyumbani baada kuona kimya kimezidi.

Sehemu ya 19.

Wakati huo mzee Mabula alikuwa ameshatangulia ndani akifuatiwa na Raham. Lakini kabla Raham hajaingia ndani alisikia sauti ya Chiku ikisema "Raham, usiingie ndani naomba japo nusu dakika ili nikwambie yaliyo ndani ya moyo wangu" Raham aliposikia sauti hiuo, alistuka akageuka kule ilipokuwa ikitokea sauti ya Chiku. Alisimama kwenye kizingiti huku akijiuliza Chiku amefuata nini. Kabla hajapata jawabu, akawa tayari amemkaribia, alimsalimu sambamba na kutokwa na machozi. Chozi hilo lilimstua Raham, akamtazama na kumuuliza kipi kinacho mliza.

"Raham, natambua nilifanya kosa sana kukuamini na kukupenda. Nahitaji msamaha wako ili pindi nitakapo kwenda huko kuanza maisha mapya basi niwe na amani, nisamehe sana " Alisema Chiku huku akidondosha machozi. Alipokwisha kusema hayo aliondoka zake huku nyuma akimuacha Raham asijue kamanisha nini kusema maneno hayo.

Aliishia kumsindikiza kwa macho tu lakini yote kwa yote alishusha pumzi kisha akaingia ndani.

"Ulikuwa unaongea nani nje?..", alipofika ndani aliulizwa na babu yake, swali ambalo Raham hakulijibu kwa haraka kwa sababu nafsi yake ilimuuma shauri ya maneno yale aliyoyasema Chiku. Lakini mwishowe akamwambia babu yake maneno yale aliyooongea Chiku. Mzee Mabula alipo yasikia hayo maneno ya Chiku alitabasamu na huku akitikisa kichwa ikiwa kama ishara ya kukubali jambo fulani.

"Kwa maana hiyo anataka kujiua ama?..", aliuliza mzee Mabula.

"Sijui babu, itakuwaje endapo atajiua mtoto wa watu? Zambi zote nitabeba mimi..", alijibu Raham huku akionyesha hofu ndani ya moyo wake. Alijihisi kutetemeka haswa.

"Mjukuu wangu ondoa shaka juu ya suala hilo, wala usiwe na hofu kwani ulimkuta Bikira yule? Ngoja labda nikwambie kitu. Unajua mapenzi ya siku hizi ni kama maparachichi, unapoenda kununua parachichi lazima ubonyeze moja baada ya jingine. Hivyo hivyo mpaka unapata parachichi nzuri utakalo ridhika nalo.."

"Unamaana gani babu"

"Asiyejua maana usimwambie maana..maana hana maana"

"Kwa maana hiyo mimi sina maana?.."

"Sina maana hiyo Raham ila siku ukimnasa yule mrembo kipofu basi nitakwambia maana..." Alisisitiza mzee Mabula.

Kwingineko Chiku alipotoka nyumbani kwa mzee Mabula kusema jambo na Raham, alipofika nyumbani kwao alipitiliza moja kwa moja mpaka ndani akimpita mama na bibi yake nje wikipiga zogo. Suzani alishtuka sana kumuona mwanaye akiwa katika hali hiyo, Chiku alionekana kakasirika huku uso wake nao ukionyesha dalili ya kutaka kulia. Hali hiyo iliwaogopesha, haraka sana Suzani alinyanyuka akazipiga hatua kumfuata chumbani lakini alikuta mlango umefungwa kwa ndani. Alipagawa akapiga piga mlango akimtaka Chiku afungue, ila juhudi zake ziligonga mwamba.

"Chiku, fungua mlango bwana. Kuna kipi kimekukuta mwanangu? Tafadhali fungua mlango", alipasa sauti Suzani huku akiendelea kupiga mlango, hali hiyo ilimfanya mama Maduhu ambaye pia ndio huyo mama Suzani. Naye akashirikiana na mwanaye kumuita Chiku, lakini bado Chiku hakutaka kufungua mlango.

Hapo sasa Suzani aliamua kutimua mbio kuelekea kijiweni ili kuomba msaada kutoka kwa vijana wa kijiji, huko alikuta tayari hao vijana wameshawadia kilingeni walikuwa wikipiga zogo mbili tatu.

"Habari zenu jamani" Mama Chiku aliwasalimia hao vijana huku akihema juu juu. Walipo muitikia, hima Suzani alianza kueleza shida iliyomleta mbio mbio mahali hapo. Vijana hao mara baada kumtazamana kumsikiliza Suzani, ghafla walionyesha kutaka kukataa ombi lake ilihali kimoyo moyo Zaulo alikuwa akjisemea "Itakuwa jambo limezua jambo, Chiku huwenda amejifungia ndani ili ajiue" wakati Zaulo alipokuwa akijisemea hiyo, upande mwingine Suzani aliomba huku akiwapigia magoti huo vijana ili wakamsaidie kuvunja mlango aone kitu gani anakifanya ndani mpaka afikie hatua ya kujifungia. Suzani alitia huruma sana, kitendo ambacho liliwafanya vijana hao kuingiwa na hofu na huruma pia ndani ya mioyo yao. Ndipo kwa pamoja walikubaliana haraka sana wakatimua mbio kwenda kuvunja mlango kasoro Zaulo ambaye yeye hakushirikiana na wenzake. Jambo hilo lilimstua Suzani, akakumbuka kuwa

binti na Zaulo ni chumba wa siku nyingi sasa iweje asiende kushirikiana na wenzake? "Kuna kitu hapa" Alijuliza Suzani mama Chiku wakati huo akimsogelea Zaulo. Alipomkaribia akasema kwa sauti ya upole iliyojaa huzuni kiasi.

"Zaulo mbona huonyeshi kushtushwa na habari hii? Pia sioni ukishirikiana na wenzako kwanini?.." Aliuliza Suzani. Swali hilo lilimtoa machozi Zaulo, akakumbuka yote ya nyuma jinsi Chiku alivyo msaliti akidiliki kusahau namna alivyo mjali na kumthamini, pumzi ndefu alishusha Zaulo kisha akajibu "Basi tu mama inatosha nadhani mwanao hataki hata kuniona na ndio maana sijafuatana na wenzangu. Tafadhali nenda kaangalie kilicho mkuta mwanao"

Suzani aliposikia maneno hayo ya Zaulo roho ilimuuma sana, maswali mengi alijiuliza juu ya maneno hayo lakini hakuona kwamba huo ni muda wa kukaa na kuanza kumdadisi, zaidi aliutumia utu uzima wake kumshawishi Zaulo ili aende naye huko nyumbani kutatua titizo lililotokea badala ya kujaji juu suala lililojificha kati yao. Kwa shingo upande Zaulo alikubali. walipofika nyumbani, mlango ulibomoka kwani ilikuwa shughuli pevu kuuvunja. Walimkuta Chiku ameshamaliza kuandika barua, hivyo alikuwa akijiandaa kujivisha kitanzi ili ajinyonge lakini sauti ya Zaulo iliyosikika ikisema "Chiku kwanini unataka kufanya hivyo?.." ilimfanya Chiku kusitisha zoezi hilo akamtazama Zaulo kwa huzuni kisha akasema huku akilia "Sioni sababu ya kuendelea kuishi Zaulo, barua niliyo andika utaisoma kipi hasa kinacho nifanya nichukuwe uamuzi huu samahani sana sana Zaulo nakutakia maisha mema. Mimi ni mkosefu kwako, naona sistahili kuendelea kuishi, haibu pia roho inanisuta. Kwaheri Zaulo. " kwisha kusema hiyo Chiku alisukuma stuli ikaanguka chini naye akawa amening'inia juu kwenye kitanzi.

Sehemu ya 20.

Lakini kabla roho haijaacha mwili Zaulo alichomoa sime aliyopenda kutembea nayo, akairusha kwenye kamba kwa nguvu. Kamba ikakatika, Kijana huyo akawa amekatisha tumaini la Chiku kutaka kujiua ikiwa wakati huo Suzani na mama yake pamoja na wale vijana walikuwa hawana cha kusema zaidi kila mmoja kuduwa kwa kiaina yake.

"Chiku nakupenda sana nilijua tu ulimbukeni unakusumbua, siku zote ukae ukijua ukipata chungu kipya cha zamani usikivunje, kiukweli niliumia sana nikajutia kukupenda lakini kwa kuwa umejua kosa lako huna sababu ya kujiua.." Alisema Zaulo. Majonzi yalitanda, Chiku alilia kwa uchungu huku akiwa amekumbatiwa na Zaulo. Zaulo aliyafuta machozi ya Chiku kisha akaongeza akasema "Usilie Chiku, nimeshakusamehe"

"Kweli Zaulo?.." Aliuliza Chiku kwa sauti ya majonzi.

"Ndio Chiku niamini" Zaulo alijibu. Chiku aliendelea kulia kwa uchungu, kwisha kukatisha kilio chake alimuomba Zaulo ampeleke kwa mama yake ili apate kumuomba msamaha pia. Lakini Zaulo alikataa kwa madai kuwa mama yake bado hajarudi kutoka shamba ila akamwambia kwamba kesho atapata hiyo nafasi, hivyo kwa muda huo anahitaji kupumzika. Kiukweli Chiku hakuamini kama kweli Zaulo anaweza kuwa na moyo huo, akajikuta akijutia mabaya yote aliyomfanyia.

Usiku ulipo ingia, muda wa chakula Zaulo alimueleza mama yake yote yaliyo tokea nyumbani kwakina Chiku. Na jambo ambalo lilimshangaza mama Zaulo ni pale Zaulo aliposema kuwa kamsamehe Chiku ilihali anategemea kurudisha uhusiano wao kama zamani. Mama Zaulo alishusha pumzi kwa ndefu kisha akasema "Zaulo mwanangu, mimi mama yako sina pingamizi na kile kitu kitakacho amuliwa na serikali ya kichwa chako. Ila mimi nitasimama pindi nitakapooni unapotea, kwahiyo maadam umeridhia mwenyewe basi mimi natoa baraka zangu ziangaze kwenye mahusiano yenu. Siwezi kukukataza istoshe wewe ndio mboni yangu tu ninayo itegemea, je nikikuonya halafu akajiua kama alivyotaka kufanya mwenzako! Unadhani nitabaki mgeni wa nani? We muache kesho aje tu namkaribisha sana" Zaulo alipo sikia maneno hayo ya mama yake alifurahi sana, akiwa na tabasamu pana akasema "Asante sana kwa maneno yako mama, hata mimi nadhani Chiku atakuwa kajifunza kitu. Sasa basi kesho usitoke maana sijui atakuja saa ngapi"

"Usijali mwanangu, ila na wewe kesho asubuhi mapema nenda kakague nyavu zako mtoni ili kama umebahatika kunasa samaki? Wawe kitoweo cha mgeni wako"

"Sawa mama"

"Lakini mama,wewe ni mtu wa tofauti sana" Aliongezea kusema Zaulo

"Kwanini?.."

"Kwa namna siku ile nilivyo lia mbele yako kisa Chiku kanisaliti,halafu leo hii nakwambia narudiana naye halafu hata hukustuka?"

"Hahahahaaa.. Hahahahaaa" Aliangua kicheko mama Zaulo kisha akasema.

"Zaulo mwanangu,waliosema utu uzima dawa abadani hawakukosea. Mahusiano ya mwanamke na mwanaume si yakuayakitisha ilimladi tu, istoshe watu wa pembeni. Jambo hilo linamadhala tena makubwa sana ndani yake.." Alisema mama Zaulo, na punde si punde akaanza kutokwa na machozi kisha akaongeza kusema" Zaulo, nayasema haya kwa uchungu sana kutoka moyoni sababu yamenikuta mama yako " Alishtuka Zaulo baada kuyasikia maneno hayo,alistisha kupeleka tonge mdomoni akakodoa macho kumtazama mama yake.

" Mama unasema?.. " Alihoji Zaulo,huku akishangazwa na chozi lile la mama yake hali ya kuwa akitamani kujua ukweli juu ya maneno hayo. Mama Zaulo ambaye aliitwa Noela,kabla hajasema chochote aliyafuta kwanza machozi yake kisha akasema "Ni zamani sana kipindi nipo binti nilipata mchumba, ambaye ni marehemu baba yako aliitwa Lebeki....." Mama Zaulo akasimulia.

Ilikuwa ni asubuhi iliyotulia,kijiji kilionyesha ukungu kwa mbali huku jua la vitamini D nalo likianza kuchomoza. Noela alisikia sauti nje, sauti ambazo alizisikia zikizozana na kutupiana maneno makali. Alikuwa ni mzee Makambo baba yake Noela ambaye asubuhi hiyo alipandishiana moli na mzee mwenzake aliyefahamika kwa jina Bukulu.

"Sitaki binti yako nimuone na kijana wangu,nilisha muonya kijana wangu nimeona ni heri nije kumpasha na mwanao ili nitakapo chukuwa uamuzi mbaya dhidi yao nisipate lawama" Alisema mzee Bukulu kwa sauti ya juu kabisa. Mzee Makambo akaonyesha kutofurahishwa na ukali huo aliokuja nao mzee mwenzake,ndipo kwa sauti ya juu kabisa akajibu "Huu ni mji wa watu, heshima na ustarabu lazima ifuate mkondo. Na sio unakuja unaongea ongea tu. Haya hao vijana wakati wanapanga yao wewe ulikuwepo? Mbona Bukulu

unakuwa na desturi za zamani? Dunia ya sasa sio ya kuchaguliwa mchumba, kuna madhara makubwa mno, jaribu kubadilila bwana "

" Usinifundishe maisha mzee Makambo, wewe kwangu ni mtoto sana. Umekua tunakuona. Hivyo basi sitaki unichanganye, nimesema sitaki unichanganye "Alisisitiza mzee Bukulu kisha akaondoka zake kwa kutembea hatua za haraka haraka bila hata kugeuka nyuma.

"Wazee wengine bwana? Sijui wakoje! Badala ya kuzeeka na busara wao wanazeeka na ujinga. Ama kweli sio kila mzee anabusara kumbe kuna wajinga nao wamezeeka" Alijiseema mzee Makambo kisha akashusha pumzi ndefu na kurejea ndani. Aliposimama sebuleni alipasa sauti kumuita binti yake.

"Noela.. Noela.." Noela akiwa chumbani alishtuka kusikia baba yake akimuita, woga ukamjaa lakini hakuwa na budi kuitika.

"Abee baba"

"Umesikia mambo hayo? Umesikia? Sasa ole wako nikuone na Lameki, utanijua vizuri" Alisema mzee Makambo. Noela alikaa kimya, ukweli alimpenda sana Lameki vile vile Lameki naye alimpenda vilivyo Noela. Choji lilimtoka Noela, aliona anampoteza mwanaume wa ndoto yake. Lakini wakati Noela alipokuwa akibubujikwa na machozi, ghafla aliingia mama yake chumbani. Noela alipendwa vilivyo na mama yake, kamwe hakupenda kumuona binti yake akitokwa machozi. Hivyo alimsogelea kitandani akaketi kisha akamwambia "Noela, nyamanza acha kulia. Haya ni mapito tu kwa maana hiyo yatapita, na Lameki atasalia kuwa mwanaume wako.." Noela aliposikia maneno hayo ya mama yake, aliyafuta kwanza machozi, akamgeukia na kusema "Mama, hivi kipi tulicho kosea mimi na Lameki? Ama kuna tofauti gani kati ya nyinyi na wazazi wa Lameki? Mbona mnatutenganisha wakati tunapendana?.."

"Sio kuwatenganisha mwanangu, kama unavyojua hapa kijijini kuna baadhi ya koo zinachaguliwa mwanamke ama mwanaume kwahiyo yanayo tokea kati yako na Lameki ndio haya haya"

"Kwahiyo mama unataka kuniambia nyie hamtaki Lameki anaoe?.." Aliuliza Noela.

"Lahasha! Bali ni mzee Bukulu hataki mtoto wake akuoe" Alijibu mama Noela. Majibu hayo yalizidi kumtoa machozi Noela, alilia bila kukoma. Punde wakati Noela akitokwa na machozi ilisikika sauti ya Mzee Makambo baba yake Noela. Mzee huyo alisema "Huu sio muda wa kulialia hovyo, hakuna msiba hapa. Kumekucha twendeni shamba" Mama Noela aliposikia sauti ya mume wake alijinyanyua kutoka kwenye kitanda cha binti yake kisha akazipiga hatua za pole pole kutoka chumbani humo huku nyuma akimuacha Noela akiwa amejinamia.

"Noela anafanya nini chumbani?.." Mzee Makambo alimuuliza mkewe kwa sauti kali.

"Yupo chumbani kwake"

"Anategemea shamba twende saa ngapi?.." Alirudia tena kuuliza mzee Makambo.

Mama Noela alishusha pumzi kwanza kisha akajibu "Nimempa kazi ya kupika ili baadaye atulettee chakula shamba"

"Sawa, akichelewa atanjua mimi ni nani?.."

"Baba Noela, sio vema kumtisha mtoto! Hivi nafikiri unamuweka katika mazingira gani sasa. Je, akuogope au akuheshimu?.." Alisema mama Noela kwa sauti ya upole iliyojaa huzuni, akionyesha kuumizwa na maneno yale aliyokuwa akiyasema mumewe.

Makambo hakuongeza neno lolote, zaidi alitoka ndani akachukua jembe na panga alipokuwa ameviegesha kwenye ukuta wa nyumba kisha akazipiga hatua za haraka haraka kuelekea shambani. Mama Noela naye safari hiyo alirudi chumbani kumwambia mwanaye apike chakula ili baadaye awalettee shamba.

"Saa saba kasoro leta chakula, tafadhali usichelewe maana baba yako ameshavurugwa" Alisema mama Noela akimuasa binti yake.

Jioni ilipowadia, alioneakana Noela akiwa nyumbani kwao akitwanga mpunga kwenye kinu. Lakini punde si punde alisikia mtoto mdogo Akimuita, sauti hiyo aliisikia ikitokea nyuma yake. Noela alistisha zoezi hilo, hima akageuka nyuma, akamuona mtoto wa jirani yao.

"Shkamoo dada Noela.." Alisema mtoto huyo. Noela akaachia tabasamu pana kisha akajibu "Malakhabaa, ujambo?.."

"Sijambo, dada Noela. Lameki anakuita" Aliongezea kusema mtoto huyo, ghafla Noela akashtuka akajikuta akiwa na shauku ya kutaka kuonana naye.

"Yuko wapi?.."

"Kulee kwenye kwenye ule mti mkubwa"

"Sawa twende.." Alisema Noela, na mara moja wakazipiga hatua kumfuata Lameki. Walipofika, Lemeki aliingiza mkono mfukoni akachomoa not ya shilingi mia tano akampa yule mtoto aliyemtuma kwenda kumuita Noela.

"Asante kaka.." Alisema mtoto huyo, Lameki akitabasamu alisema "Usijali mdogo wangu, wewe ni mjanja sana.. Hivi unaitwa nani?.."

"Naitwa Gulo"

"Anhaa! Safi Gulo" Alipokwisha kusema hivyo Lameki alimgeukia Noela.

"Habari yako mke wangu mtarajiwa.."

"Salama, mzima wewe?.."

"Mimi mzima, siku nyingi sijakuona Noela wangu"

"Nipo tu.." Alijibu Noela kwa sauti iliyojaa haibu ndani yake, uso aliinamisha chini akionyesha haya kusimama na mchumba wake. Jambo hilo lilizua ukimya fulani. Lakini ukimya huo ulivunjwa baada Lameki kumkabidhi Noela mfuko wenye mazaga ndani. Kwisha kumkabidhi akasema "Sina hatia ya kukwambia kilichomo ndani ya mfuko huu, ila utaona mwenyewe.." Noela alicheka kidogo akapokea mzigo huo akashukuru. Baada ya hayo Lameki alidai anataka kuondoka kwenda kuagua mitego yake. Lakini kabla hajaanza safari, Noela alisema.

"Lameki, unanipenda?.."

"Hilo sio swali Noela, bali ni jibu. Na kwanini umeniuliza hivyo?.." Alihoji Lameki. Noela alikaa kimya huku akinyoosha vidole vyake. Mwisho alijibu

"Basi tu Lameki, nilihitaji kujua. Lakini mbali na hilo naomba kesho kutwa tuonane nina mengi ya kuzungumza na wewe"

"Sawa hakuna shida, ila unanitisha ujue" Alisema Lameki, Noela alimuondoa hofu kisha Lameki akaondoka zake.

Siku waliyokubaliana kukutana ilipo wadia, hatimaye walikutana. Noela alikuwa amevaa mavazi mapya na viatu vipya huku shingoni akiwa amevaa mkufu ulioonyesha kung'aa vyema shingoni kwake.

"Umependeza sana Noela" Alisema Lameki. Maneno hayo yalimfanya Noela kuachia tabasamu pana lililofuatia na neno shukrani. Baada ya hayo, waliingia kwenye hoja ya msingi iliyowafanya kukutana mahali pale pale walipokutana mara ya kwanza.

"Lameki, siku ile nilikuuliza vile nikiwa na maana" Alisikika akisema Noela. Lameki alikaa sawa kisha akahoji "Enhe maana gani? Embu niambie"

"Nasikia wazazi wako hawataki unioe?.."

"Doh ni kweli Noela, na kibaya zaidi wamenitafutia mwanamke mwingine. Ila hili wewe lisikupe tabu, nitajua cha kufanya" Alisema Lameki kwa sauti ya chini kabisa iliyojaa huba ndani yake.

Ghafla Noela alidondosha machozi, aliona sasa ni wakati wa kumpoteza mwanaume wa ndoto zake. Kwa sauti iliyoambatana na kilio alisema "Kwanini yanatokea haya Lameki wangu? Na vipi Kuhusu kiumbe chako kilichomo tumboni mwangu?.."

"Khaa Noela unamimba?.. Lameki alijiuliza huku akionyesha kushangazwa na hayo maneno ya Noela aliyokuwa akiyaongea kwa kilio. Taarifa ya kuwa Noela ni mjamzito ilimfanya kuachia tabasamu maradufu ambapo alimsogelea karibu akamkumbatia kisha akasema " Nyamanza Noela, nadhani huu ndio muafaka wazee wangu kunielewa mtoto wao. Kupitia ujauzito wako huu nitawashawishi waache fikra mbov za kuniingilia kati maamuzi yangu"

"Unaimani watakubali?.." Alihoji Noela safari hiyo akiwa tayari ameyafuta machozi yake.

"Ndio, wasipokubali nitajua cha kufanya" Alisisitiza Lameki. Baada ya hayo waliongea mambo mengine mbali mbali huku wakidumisha utani wa hapa na pale, ilahali ubishani fulani juu ya mtoto atakayezaliwa ukafuatia. Kila mmoja akitaja jina atakalo mpaka mtoto, huyu akitaja hili mwingine anataja lile. Hivyo hivyo walifanya baada kuhamia kwenye jinsia tofauti atakaye zaliwa nayo mtoto huyo.

Lakini ghafla maongezi hayo yaliingia dosari baada mzee Makambo kufika mahala hapo. Wawili hao walishuka, mzee Makambo aliwatazama kwa jicho la hasira kisha akasema "Noela, nadhani wewe mtoto unataka kunisababishia matatizo sio bure. Kwanini hutaki kunielewa? Unataka mpaka nikuvunje miguu yako ndio unielewe?.."

"Hapana baba.. Ni..ni..ni Nisamehe" Alijibu Noela huku akitetemeka, wakati huo kijana Lameki alikuwa amekaa kimya asiseme neno lolote. Lakini punde mzee huyo alimgeukia Lameki. Akisema "Na wewe kijana,hujui kama baba yako hataki ujenge uhusiano na binti yangu?.."

"Na..na.. ndio najua mzee wangu lakini.."

"Lakini nini potea hapa mshenzi mkubwa" Lameki haraka sana alitimua mbio. Akabaki Noela na baba yake ambapo nao walidumu kwa muda mchache,mzee Makambo akionekana kumfokea binti yake.

Siku kadhaa mbele hali ya Noela ilianza kubadilika,alibagua vyakula na kulala mara kwa mara. Hali hiyo ilimshtua mama yake, pole pole akaanza kumchunguza binti yake hatua kwa hatua ili ajihakikishie kama Noela ni mjamzito. Hatimaye alitambua hilo ni baada kumuona siku moja akitapika.

"Noela unamimba?.." Mama huyo alimuuliza Binti yake wakati huo wakiwa faragha. Noela alikubali kwa kutikisa kichwa.

"Khaaaaah! Mungu wangu. Mimba ya nani hiyo?.."

"Lameki.. 'Alijibu Noela huku akionyesha hofu dhofu lihali moyoni mwake. Mama Noela alizidi kupagawa kwa hamaki kubwa akarudia kuhoji." Haya utwambia nini baba yako?.. "

Sehemu ya 21.

Mama huyo alimuuliza Binti yake wakati huo wakiwa faragha. Noela alikubali kwa kutikisa kichwa.

"Khaaaa! Mungu wangu. Mimba ya nani hiyo?.."

"Lameki.. 'Alijibu Noela huku akionyesha hofu dhofu lihali moyoni mwake.

Mama Noela alizidi kupagawa kwa hamaki kubwa akarudia kuhoji." Haya utamwambia nini baba yako?.. " Hapo Noela alikaa kimya, alikosa jibu la kumrudishia mama yake.

Mimba ni mfano wa kichuguu, kila siku kinazidi kukua. Ndivyo ilivyokuwa kwa Noela, kwani ilifikia hatua baba yake akahisi kuwa binti yake ni mjamzito. Ilibidi mzee Makambo akapate uhakika kwanza kwa mkewe, japo mkewe alitaka kukwepesha jambo hilo lakini mwishowe alikubali kwamba ni kweli Noela ni mjamzito, na ujauzito huo ni wa kijana wa mzee Bukulu.

"Kheeh? Hivi huyu mtoto huyu ananitafutia nini lakini? Mke wangu kwanini hujakaa na binti yako akamuonya upuuzi huu alioufanya? Ona sasa mambo haya, yani badala hili liishe linazuka jambo lingine. Sasa nasema hivi binti yako kuanzia sasa sitaki kumuona humu ndani.. "Alisema mzee Makambo kwa sauti kali iliyosheheni hasira kuu ndani yake, alichukizwa sana na ubebaji wa mimba wa Noela. Na kitu ambacho kilizidi kumvuruga ni baada kuambiwa ujauzito huo ni wa mtoto wa mzee Bukulu, mzee ambaye tayari alishachimba mkwara kuhusu uhusiano wa kijana wake na Noela binti wa mzee Makambo. Maneno hayo makali aliyoyazungumza mzee Makambo, abadani mama Noela hakutaka kukubaliana nayo. Alimsihi mumewe apunguze jazba kwani huo sio wakati wa kulaumiana bali ni muda wa kukaa na kuanza kuyajenga kiutu uzima.

"Unataka nifanye nini mimi?." Aliuliza mzee Makambo.

"Sio vizuri kuongea maneno hayo.."

"Nasema hivi kama utaki mwanao aondoke ndani ya nyumba hii, basi utaondoka wewe. Nakwambia utaondoka wewe Ebo!?.." Alisisitiza mzee Makambo kwa sauti ya juu. Muda huo ilikuwa usiku wa saa nne. Wazee hao

walikuwa wakiongea kwa kujiamini kabisa wakidhania kuwa binti yao tayari kasinzia. Kumbe lahasha, Noela yote aliyasikia akiwa chumbani kwake.

Aliumia sana, machozi yalimtoka huku akililia rohoni. Na punde si punde akajisemea "Siwezi kuvunja ndoa ya wazazi wangu, ni heri niondoke ili mama abaki. Kuliko aondoke mama mimi nibaki. Ni maisha yapi nitayo ishi hapa nyumbani hali ya kuwa tajari baba ameshaonyesha nia ya kutonihitaji?..Ooh Mungu wangu" Kwisha kujisemea maneno hayo ndani ya nafsi yake akainuka kutoka kitandani. Akatandika kitenge chake juu kwenye kutanda, akachukua nguo zake akaziweka kwenye kitenge hicho alichotandika kisha akakifunga mfano wa kifurushi. Machozi bado yaliendelea kumtoka , aliusogeza mzigo wake pembezoni kidogo ya uvungu wa kitanda, akarudia kulala huku moyoni akiwa na nia kuwa alfajiri atoroke nyumbani hapo.

Jogoo wa kwanza alipowika, aliamka. Akazipiga hatua kwa kunyata kutoka chumbani kwake huku akiwa na furushi la nguo kichwani. Pole pole alifungua mlango, na hatimaye akafanikiwa kutoroka.

Alitimua mbio kwenye giza totoro ambalo lilionekana kupambwa na ukungu wa hapa na pale bila kusahau umande uliokuwa kwenye kijani kibichi. Hakuogopa wala hakujali kitu chochote ambacho angelikutana nacho njiani Alfajiri hiyo, zaidi aliendelea kutimua mbio. Kabla hajakiacha kijiji chao, alisimama kwanza.

"Mtoto huyu lazima ataitwa Imakurata..."

"Mmh na kama alizaliwa wa kiume..?.."

"Huyo ataitwa Zaulo.." Maongezi hayo ambayo Noela aliwahi kuongea na

Lameki yalijirudia kichwani mwake. Hapo akakumbuka kuwa anatoroka bila hata kumtaarifu mchumba wake hali ya kuwa walishawekeana nadhiri kwamba watakuja kuoana.

Baada kukumbuka maongezi hayo, alikata kauli. Akaona sio vyema kuondoka bila kumtaarifu Lameki, hivyo alirudia nyuma. Akaelekea moja kwa moja nyumbani kwakina Lameki. Lakini alipofika alistuka, akashangazwa na kile alichokiona kwenye mti mkubwa kiasi aliokuwa kando ya nyumba ya mzee Bukulu. Mapigo ya moyo yalimuenda mbio huku akijongea pole pole kwenye

mti ule. "Mungu wangu Lameki wangu jamani!.." Alisema sambamba na kuangua kilio cha siri, ni baada kumkuta Lameki akiwa amening'inia na kitanzi kwenye tawi la mti ule. Ghafla alijihisi kupiga mayowe lakini alijitahidi kufumba mdomo wake wakati huo ikitazama huku na kule. Chini ya miguu ya Lameki iliyokuwa ikining'inia ilionekana karatasi. Karatasi ambayo Noela alioona kwa mbali kutokana na kile kiza totoro. Haraka sana akaichukuwa karatasi hiyo kisha akatimua mbio kuendelea na safari yake huku nyuma akiwa na sintofahau kuhusu Lameki ambaye amejichukulia maamuzi ya kujiua.

Mpaka jua linachomoza, alikuwa ameshafika mbali sana. Ambapo mwishowe aliketi chini akapumzika. Muda huo wa kumpumzika aliamuwa kuutumia kuikunjua karatasi ile ili ajue ni kipi kilichoandikwa humo.

Baba na mama, nimeamuwa kuchukuwa uamuzi huu ili nitangulie mapema, kwa sababu hata kama nisingefanya hivi ila bado ningekufa kwa kupata tabu sana kutembelea vituo vya afya kuchukua vidonge vya kuongeza siku za kuishi kwa muathirika. Mwanamke aliyekuwa wa ndoto zangu ni Noela, lakini wazazi wangu hamkutaka kuelewa kile niwaambiacho na mwisho wa siku mmenichagulia mwanamke ambaye ni muasirika wa ugonjwa wa Ukimwi. Istoshe mnatumia mpaka mabavu kunilazimisha kumuoa mwanamke huyo hali ya kuwa moyo wangu haukupendezwa naye. Yangu ni hayo tu, msalimieni Noela wangu mwambieni nasikitika kukiacha kiumbe changu kitakacho zaliwa. Tutakuna Paradiso.. "Iliieleza barua. Noela aliangua kilio baada kusoma kilicho andikwa ndani ya barua hiyo. Ghafla alijihisi kukosa nguvu, na punde si punde akapoteza fahamu.

"Nilizinduka na kujikuta nyumbani kwa mwenyekiti wa hiki kijiji, ambapo aliamuwa kujitolea kunilea kama mwanaye mpaka pale nilipojifungua mtoto ambaye ndio wewe Zaulo. Mwishowe nikaamuwa kujitegemea kwa kulima vibarua, hatimaye nikanunua mashamba nikajenga nyumba na maisha yanaendelea " Alisema mama Zaulo kwa sauti ya upole kabisa huku kitambaa tayari kikiwa kimelowa machozi. Hakika ulikuwa ni mkasa wa kusisimua aliomsimulia kijana wake. Mkasa huo ulimtoa machozi Zaulo. Chakula kikawa

hakiliki tena, nyumba ikawa imetanda majonzi ya aina yake. Kwa sauti ya huzuni Zaulo alimuuliza mama yake "Mama. Je, babu na bibi bado wapo?.."

"Hapana wote walishafariki kwa nyakati tofauti..." Alijibu mama Zaulo, jibu ambalo kwa mara nyingine lilimfanya kijana huyo kukaa kimya ilihali machozi yakimtoka. Mama Zaulo alifanya jitihada za kumbembeleza kijana wake japo ilikuwa kazi ngumu lakini mwisho Zaulo alinyamanza, na hapo alinawa mikono na kisha akaelekea chumbani kulala.

Asubuhi palipokucha alikwenda kukagua nyavu zake mtoni, Mungu si Athumani alibahatika kupata samaki wengi. Furaha iliyoje kwa Zaulo, aliamini kuwa Chiku atafurahi na pia kupata tumaini jipya pindi atakapo kuta chakula kizuri. Muda ulipo wadia, ilikuwa manamo saa tano asubuhi Chiku alimuaga mama yake kwamba anakwenda nyumbani kwakina Zaulo.

"Mbona unakwenda bila na chochote mkononi?.." Alihoji akimuuliza binti yake.

"Mama niende nani sasa?.." Alihoji pia Chiku.

"Subiri " Alisema Suzani, kisha akainuka akaingia ndani akachukuwa kitenge kipya alichu wahi kununua siku kadhaa nyuma. Kitenge hicho kikiwa na upya wake alimkabidhi binti yake. "Utakapofika omba msamaha kisha mkabidhi mama Zaulo hiki kitenge, pia nakusihi mwanangu tulia na huyo huyo Zaulo. Mimi nitakaa na mama yake ili tujadili tapange lini tuwafungishe ndoa sawa mwanangu? ?.."

"Sawa mama." Aliitikia Chiku huku akitabasamu. Punde safari akaanza safari yake. Alipofika alikaribishwa vizuri na kwa furaha, ndani ya masaa machache kila kitu kikaenda sawia kabisa. Zaulo na Chiku wakarudiana, haibu kijiweni kwa kijana Zaulo. Kila mmoja alikuwa akisema lake, wapo waliomsifu kwa kuwa na moyo wa aina yake pia wapo wengine waliomuona mjinga. Lakini yote kwa yote Zaulo hakujali, ilihali kwa upande wa Chiku asilimia kubwa walimcheka sana na kumbeza huku wengine wakithubutu kumwambia kipi hasa kilichomfanya aachane na kijana wa mjini kisha amrudie mkata mkaa wake! Lakini yote hayo Chiku naye pia hakuyajali maneno yao.

Siku zilisonga mapenzi ya Zaulo na Chiku yakizidi kushika kasi, wakati huo upande wa pili kijana Raham naye alizidi kula sahani moja Sindelela. Ikafikia

hatua usingizi akawa hapati kwa jinsi Sindelela alivyokuwa mgumu kumkabalia. Na hatimaye ikabaki wiki moja arudi mjini kuendelea na masomo, hapo sasa Raham akawa haelewi afanyeje akajifikiria arudi mjini bila kupata jibu la Sindelela? Akaona ni kitu ambacho hakiwezekani. Hivyo aliendelea kuhudhulia nyumbani kwa Bi. Mandawa huku akitiwa moyo na babu.

Hatimaye zikabaki siku mbili tu. Siku hiyo ya kwanza kati hizo mbili Raham alikwenda akiwa na nia ya kumuaga Sindelela pia kudai jibu lake, ilihali siku hiyo hiyo Sindelela alikuwa amepanga kumkabalia Raham baada kuona ni mtu asiyekata tamaa vile vile huwenda akawa na mapenzi ya kweli kwani ndani yake. Kwani laiti kama angekuwa mchezeaji basi angelikuwa ameshakata tamaa. Lakini Raham hakuwa hivyo, kitendo ambacho kilimfanya Sindelela kuridhika naye.

"Raham japo sioni ila ni kama nimeona kitu ndani ya moyo wako. Siku zote za hivi karibuni nilikuwa nakupima imani tu, na nimeona kweli imani unayo kiukweli nimekubali ombi lako sitegemei kuumizwa kwenye ulimwengu huu wa mapenzi" Alisema Sindelela akimwambia kijana Raham pindi walipokuwa wakiongea mambo mawili matatu. Ni jibu ambalo Raham hakutegemea kulipata kutoka kwa Sindelela mrembo kipofu, hakika alifurahi sana huku moyoni akiamini mvumilivu hula mbivu, na mwanamke imara hajilengeshi. Na hata aliporudi nyumbani alimwambia babu yake yote yaliyotokea huko kwa Bi. Mandawa. Mzee Mabula naye alifurahi sana akaruka juu na kushuka chini kisha akamgeukia Raham na kumwambia

"Mchezo umekwisha mjukuu wangu, kesho safari unarudi shule kasome huku ukijua kwa babu nimeacha mrembo"

"Sawa babu nimekuelewa lakini shughuli sio mchezo.."

"Usijali kiungo mchezeshaji shughuli yangu imekwisha. Na nasikia yule mchumba wako wa zamani karudiana na mwanaume wake"

"Nani tena? Mkono wa sweta au? .." Alihoji Raham huku akiwa na mwingi wa furaha.

"Ahahahah hahahhaa" Mzee Mabula aliangua kicheko, alipokatisha kicheko chake akasema "Huyo huyo. Mmh! Lakini wewe mnafiki sana, kipindi kile

nilikuwa nikimtukana unaona nakosea sasahivi na wewe unamtu kana, haya bwana Raham au niseme Katapila?.." Raham akacheka kwa sauti kuu kisha akajibu "Ujue alinitisha sikuele aliponiambia, naomba msamaha wako sijui nini nanii? Mimi nikajua kajiua kumbe kayarudia natapishi yake? Aah kweli wanawake wanavyichwa vya kuku"

"Basi tuachane na hayo, bibi yako akikusikia mimi simo shauli yako" Alitania mzee Mabula.

"Kweli, lakini tambua leo nitalala usingizi mzuri" Alisisitiza Raham.

Kesho yake asubuhi, Raham alikwenda kumuaga Sindelela kwani siku husika ya kurudi Dar es Salaam kuendelea na masomo umewadia. Hakika ilikuwa ni majonzi kwa Sindelela kwani alikuwa tayari amemzoea , Sindelela alilia sana, na hapo Raham alimkumbatia akambembebeza kwa maneno ya faraja. Na mwishowe akaamuwa kumwambia nyimbo nzuri ya mapenzi kwa sauti ya upole huku kichwa cha Sindelela kikiwa kwenye kifua chake. Kitendo hicho kilizidi kumfanya Sindelela kuendelea kubwaga machozi pindi alipokuwa akiisikia sauti hiyo ya kijana mtanashati Raham.

"Nitarudi mpenzi wangu wala usijali babu na bibi wako hapa watakuwa pamoja na wewe pia napenda nikuahidi kuwa ipo siku utaiona Dunia hii na vitu vyake. Ngoja nikasome lakini pia ukae ukijua Nakupendaaa nitazidi kukupenda Sindelela wangu" Mara baada kumaliza kumuambia Sindelela nyimbo hiyo ya mapenzi, alimpa ahadi hiyo. Lakini mara ghafla..

Sehemu ya 22.

Ghafla akanyanyuka akarejea nyumbani, alipofika alichukuwa begi lake, akisindikizwa bibi na babu yake kuelekea stendi. Walipofika stendi, haikuchukua muda mrefu ikatokea gari ambapo Raham akawaaga babu na bibi yake kisha akapanda gari akaondoka zake huku roho ikimuuma, kwani kilio kile cha Sindelela kiliumiza vilivyo moyo wake, ingawaje hakuwa na budi kukubaliana na yote kwa maana muda wa kurudi shule tayari ulikuwa umewadia.

Ndani ya jiji la Dar es salaam Raham alifika salama kabisa, wazazi wake walifurahi sana kumuona kijana wao amerejea baada ya kukaa naye mbali kwa kipindi kirefu.

"Yani mwanangu roho ilikuwa juu juu, nikawa nawaza mbona huyu mtoto hafiki? Lakini Mungu alivyokuwa mkubwa na waajabu hatimaye umefika salama. Vipi huko kijijini umewaacha wazima?.. " Alisema mama yake Raham, ni mara baada kumuona kijana wake.

"Ndio mama wote wazima wanawasalimia tu" Alijibu Raham.

"Haya sisi wazima pia karibu" Kabla Raham hajaongeza kusema neno lingine, baba yake akadakia akasema.

"Mzee Mabula, daah! baba yangu yule anamaneno sio mchezo, sipati picha ulipokuwa huko"

"Ahahaha Hahaha", Raham akacheka baada kusikia maneno ya baba yake. Alijua fika vituko alivyo navyo mzee Mabula. Alipokatisha cheko lake akasema

"Mimi yule namuita kiungo mchezeshaji, maana maneno yake sio mchezo"

"Nakumbuka mwaka fulani hivi, kipindi hicho nilikuwa mdogo sana. Nilienda naye kwenye sherehe, sasa wakati wachakula ulipofika tukawekewa sania moja watu watano. Katika wale watu watano akawepo jamaa moja alikuwa na matonge makubwa makubwa, jamaa akapiga tonge la kwanza akapiga lapili akapiga latatu, wakati huo mzee wangu anamuangalia tu. Jamaa alipotaka kupiga la nne mzee akamshika mkono akamwambia hebu kula pole pole hatujaja kumuangalia washenga " Vicheko vikasikika. Vicheko ambavyo vilidumu kwa muda mfupi tu. Baada ya vicheko hivyo mama Raham alimtaka kijana wake akaoge ili kuondoa uchovu ndipo ale chakula.

Raham akakubaliana na matakwa ya mama yake, akanyanyuka kutoka kwenye kochi lakini kabla hajaingia chumbani kwake kuchukuwa taalo, alihoji juu ya mfanyakazi wao mpya huku akitaka kujua wapi alipo mfanya kazi wa zamani.

"Tabia yake chafu ya kulewa hovyoy, ndio iliyo muondoa hapa" Raham alijibiwa na baba yake.

"Lakini Madiba nilikuwa namkubali sana ila kwa kuwa alikuwa tayari ameanza kuwa mlevi hakuna namna. Enhee na huyu mpya anaitwa nani? Maana ukimwalia akili zake kama haziko sawa" Aliongeza kuhoji Raham.

"Huyu wa sasa anaitwa Mika, ni kweli akili yake haipo sawa ila yupo makini sana na kazi yake yani nikipiga honi tu anafungua geti" Upande wa pili mama Raham alishusha pumzi akakaa sawa huku akionekana kana kwamba anataka kusema jambo. Kweli punde si punde akasema "Lakini huyu mbaba japo punguwani lakini anakumbumbu sana. Juzi nilikaa naye tukaongea mambo mengi . Akaniambia kwamba mkewe alijinyonga! Lakini alifariki akiwa ameacha mtoto mdogo ila mtoto huyo ni kipofu. Kwa kweli tuliongea mengi lakini yote kwa yote msimchukulie kwamba ni kichaa. Mtambue kuwa sio kila kichaa ni basi ni punguani, kuna watu wanajifanya vichaa kwa faida ya jambo fulani ilimladi malengo yao yatimie" Raham na baba yake walisikitika sana kusikia historia fupi ya huyo mfanyakazi wao mpya ambaye yupo kwenye kitengo cha kufungua na kufungua geti.

Baada ya siku mbili tatu, Raham aliweza kuwaeleza wazazi wake juu ya kile alichokijijini. Ni jambo ambalo liliwastua wazazi wake, huku wakidiliki kuingiwa hofu juu ya masomo yake.

"Mapenzi na shule ni vitu viwili tofauti, pia siku zote mshika mawili, moja humponyoka. Raham utasoma kweli? Sio nipoteze pesa zangu wakati hunampango wa kusoma zaidi ya kuwaza mahusiano.." Aliongea mama yake Raham, maneno alikuwa akijaribu kumuasa kijana wake baada kuwaambia kuwa kijijini kwa babu yake ameacha mchumba ingawa hakuweza kuwaeleza mapungufu aliyonayo mchumba wake huyo. Majadiliano hayo yalisemwa usiku wapata saa mbili, baada ya chakula.

"Nadhani umenielewa Raham, mimi nataka usome. Na sio kufikiria wanawake, kila siku wanawake wazuri wanazaliwa kwahiyo tulia soma kwanza hayo mengine yatafuata..." Akasisitiza mzee huyo. Ikiwa muda huo Raham alikuwa kimya akimsikiliza baba yake ingawaje moyo hakuwa tayari kumuacha Sindelela mrembo kipofu.

" Mimi sijaona ubaya wa Raham, tena namsifu kwa ujasiri wake wa kuvunja ukimya na kutueleza wazazi wake. Mume wangu, tambua huyu ni kijana sasa mtu mzima . Nadhani anajua anachokifanya, lingine la kuongezea, mwanetu amaeona aoe kijiji walikozaliwa wazazi wake. Unafikiri hapa Dar es salaam hajaona wasichana wazuri hapa mjini? Kawaona tena sana wamejaa tele ila kapendezwa na asiri ya nyumbani kwao. Muache mtoto bwana ajimwage mimi namuaminia sana hawezi kutuangusha kwenye masomo yake " Raham aliposikia maneno hayo ya mama yake alijikuta akiachia tabasamu pana huku kimoyomoyo akisema " Hapa tayari mizizi wa vitina umekatwa. Lazima Sindelela awe mke wangu"

" Mmh! Haya? Ila akiharibika nitajua wewe ndio chanzo "Aliongeza kusema baba Raham. Raham akacheka kidogo kisha akajibu" Ili nionyeshe nia kuwa sitoyumba kwenye masomo yangu, basi sitotaka kuongea kwa maneno ila nitathibitisha kwa vitendo "

"Nakuamini mwanangu" Akaungwa mkono na mama yake kupitia maneno aliyo yasema.

Siku zilisonga kijana Raham alisoma kwa bidii akiamini kuwa atakapo soma na kupata kazi nzuri kamwe hatopata shida kumtunza mrembo wake kipofu, lakini pia vile vile alitaka kuwaonyesha wazazi wake kuwa kuna muda mwingine unaweza kushika mawili na yote ukayadhibiti pasipo hata moja kukuponyoka. Hatimaye juhudi zake zikazaa matunda kwani alipohitimu masomo yake ya chuo kikuuu alifanikiwa kupata ajira nzuri kwenye moja ya kampuni Nchini. Ajira ambayo ilimwingizia kipato cha kutosha. Hapo sasa ndipo alipoamua kupanga mikakati ya kurudi kijijini kukamilisha utaratibu mzima wa kumuoa Sindelela, lakini akaona ni bora aseme kwanza na wazazi wake. Ambapo nao hawakuweza kumuwekea pingamizi sababu hajawaangusha kwa vyovyote vile, ingawa walithubutu kuingiwa na hofu mioyoni mwao baada kusikia tetesi kuwa mwanamke huyo anayetaka kumuoa Raham ni kipofu.

Miaka miwili sasa, ndani ya miaka hiyo vijana mbali mbali walikuwa wakimfuata Bi. Mandawa kumtaka Sindelela ila bibi huyo alikataa katu katu akiwaambia kuwa Sindelela tayari anamchumba.

Siku moja Chiku alikwenda kumtembelea Bi. Mandawa baada kuambiwa kuwa anaundugu na familia hiyo, ila ujio wa Chiku haukuwa wa heri kwani alithubutu kumpakazia sifa mbaya Raham kwa Bi. Mandawa nia na madhumuni kutaka kuharibu mpango wa Raham kumuoa Sindelela. Kigezo kikubwa ambacho Chiku alisimamia ni Raham kupotea pale kijijini kwa muda wa miaka miwili na miezi. Chiku kwisha kutia sumu hiyo aliondoka zake huku akimuacha Bi. Mandawa katika sintofahamu kubwa ingawa jambo lililompa tumaini ni sikuile Raham anaondoka ambapo alidai anakwenda shule kusoma. Jambo lingine pia ambalo kwa namna moja ama nyingine lilimkatisha tamaa Bi. Mandawa ni pale Chiku alipomwambia kuwa vijana wa mjini hawana maana bali wanaendeshwa na mihemko ya miili yao.

"Bibi lazima ujue kuwa huko aliko Raham atakuwa na mwanamke mwingine hawezi kukaa bure" Maneno hayo ya Chiku yalijirudia kichwani kwa Bi. Mandawa, jambo ambalo lilimfanya azidi kupagawa, lakini ugumu ukaja kwamba atakaye muoa Sindelela mbali na Raham ataweza kumtunza ipasavyo? Aliwaza na kuwazua, na wakati anawaza hayo, mara ghafla akaja mzee Mabula akamwambia kuwa amepokea barua ikimtaarifu kwamba Raham anakuja kumaliza taratibu zote kisha akaishi na Sindelela mjini. Taarifa njema kwa Bi. Mandawa, kamwe hakuyaamini masikio yake juu ya kile alichokuwa akikisikia kutoka kwa mzee Mabula babu yake Raham.

Hakika Alifurahi sana, pia hata alipomwambia na mjukuu wake naye alifurahi pia. Kwa mara nyingine Raham akafika kijijini, taratibu zote za kuoa zilifanyika. Shangwe nderemo na vigelele mpaka kwa Chifu. Chifu aliwabariki vijana hao akawatakia kila laheri katika maisha yao. Chiku hakuamini kama kweli Raham kafanikiwa kuondoka na Sindelela, licha ya kujaribu kutaka kuvunja uhusiano wao. Aliumia sana moyoni akajikuta akijilaumu kwanini alimvulia nguo tozi huyo wa mjini. Lakini yote kwa yote majuto yakabaki kuwa mjukuu kwake.

Raham alipofika Dar es salaam na Sindelela wazazi wake walipagawisha na uzuri wa Sindelela, baba yake akamsogelea na kisha kumuuliza "Hivi ulisema huyo ndio kipofu?.."

"Ndio baba" Alijibu Raham kwa tabasamu.

"Loh kweli Mungu anaumba mwanangu" Aliongezea kusema baba Raham wakati huo yule mlinzi wa geti naye Mika alionekana akiwa ameshika kichwa huku moyoni akijisemea "Nimetembe ila sijaona binti mzuri kama huyu!? Doh jamaa kajua kuchagua. Sijui na mimi mwanangu kakua ama lah!? " Akavuta pumzi ndefu baada kujisemea hayo huku akirejea katika kitengo chake, haki ya kuwa Raham na wazazi wake pamoja na mkewe wakiingia ndani. Nadhiri kuu ikawekwa juu ya Sindelela, ni kumfanya awe na furaha wake wote, kamwe asijutie kuolewa na Raham.

Baada ya miezi sita mbele, Raham alikopa pesa Bank akaanzisha mradi wa kuuza na kununua magari. Biashara ambayo ilimwingizia kipato kwa wingi. Akawa na pesa za kutosha. Jioni moja akamwambia mkewe jambo "Kesho nataka nikufanyie kitu ambacho hutokuja kukisahau maishani mwako "

"Kitu gani mpenzi?.." Alihoji Sindelela.

"Tusubiri kesho wala usiwe na pupa" Alijibu Raham.

Kesho yake ilipofika Raham alimwambia mkewe ajiandae kuna sehemu wataelekea.

Shughuli nzima ya kumvalisha Sindelela aliifanya mama yake Raham ambapo walipo maliza walikwenda Airport, safari ya kuelekea Nchini India kutibiwa macho ikiwa imeiva. Wala Raham hakujali gharama, zaidi ya kujali upendo wa dhati anao upata kutoka kwa Sindelela.

Baada ya matibabu ya kitaalamu zaidi, hatimaye Sindelela akapata kuona, jambo ambalo Raham aliahidi kulitekeleza pindi atakapo maliza masomo yake. Walipo rudi Tanzania ilikuwa ni shangwe na nderemo kwa familia wakati huo Sindelela akishindwa ampe nini mumewe ikiwa kama shukrani kwake, kwani hakuwahi kufikiria kama atitokea siku ataiona Dunia licha ya kwamba hapo awali bibi yake aliwahi kumtia moyo kwa nyakati tofauti tofauti kwamba ipo siku ataona atakapo fikisha umri wa kadhaa.

Baada ya miezi miwili kupita tangu watoke India, Raham alimchukuwa mlinzi wao wa geti pia na mkewe ambaye wakaelekea kijijini kwenda kuwasalimu babu na bibi yake bila kumsahau Bi. Mandawa huku wakiwa kivingine kabisa.

Siku hiyo Bi. Mandawa alikuwa nyumbani kwa mzee Mabula wakiongea mambo mbali mbali, lakini punde maongezi yao yalistishwa na ujio wa Raham na mkewe bila kumsahau Mika. Bi. Mandawa ndiye aliyekuwa wa kwanza kuwaona vijana hao ambapo alinyanyuka na kisha kuwakimbilia kwenda kuwapokea

"Sindelela mjukuu wangu, mboni yangu umerudi?.." Kwa sauti ya simanzi Bi. Mandawa aliongea sambamba na kumkumbatia mjukuu wake.

"Ndio bibi nimerudi, nafurahi kukona pia" Sindelela alijibu huku akitiririsha machozi ya furaha. Maneno hayo yakamstua yake, akiwa na sintofahamu akasema "Sindelela umesema?.."

"Nafurahi kukuona bibi yangu"

"Kweli mjukuu wangu unaona? .."

"Ndio.." Alijibu Sindelela huku tabasamu lisikauke usoni mwake, lakini bado Bi. Mandawa hakuyaamini maneno ya mjukuu wake ndipo alipomgusa bega Mika kisha akarudia kuhoji "Kama kweli unaona, huyu ni nani?.."

"Huyo ni mlinzi wetu anaitwa Mika"

"Mika? Huyu si baba yako?.." Kwa mshangao alisema Bi. Mandawa, jambo ambalo lilizua wimbi la ukimya Raham akimshangaa Mika asiamini kama kweli ndio baba yake mkwe.

"Samahani sana Bi. Mandawa, pia Samahani sana Sindelela vile vile Samahani sana Raham. Mimi jina langu kabisa naitwa Maduhu ila niliamua kubadilisha jina baada kutoroka gerezeni kabla ya miaka niliyopangiwa kufungwa haijaisha. Ilinibidi nibadilishe jina na kujiita Mika ili nipate amani ya kuishi uraiani" Akayafuta machozi yake Maduhu kisha akaendelea kusema "Sindelela, mimi ni baba yako, nilitaka nikuue baada kuona umezaliwa na upofu nikiamini hutokuwa na faida kwangu. Najuta sana najuta mwanangu Naomba unisamehe " Safari hiyo Maduhu akashuka chini kumpigia magoti binti yake wakati huo akilia kwa uchungu. Vilio majonzi vikatanda mahali hapo ikiwa wimbi la wanakijiji walikuwa wakimiminika kuja kushudia kama kweli Sindelela anaona kwani ni ajabu sana kuwahi kutokea ulimwenguni.

Sindelela akamsamehe baba yake ila baada kutoa msamaha huo, msamaha huo ukawa fimbo kuu kwa Maduhu kwani alijikuta akirudi katika hali ile ile ya uwenda wa zimu wakati huo jeshi la police lililinga kijijini hapo wakamkamata na kishs kuondoka naye ikiwa huku nyuma wakiacha majonzi na vilio. Mwisho wa yote Suzani naye aliomba radhi kwa Bi. Mandawa pia kwa Sindelela aliona yote aliyofanya zamani hayakuwa mambo mazuri, kwani laiti kama wasingekuwa na imani potofu ya kuyaingilia mapenzi ya Maduhu na marehemu Pendo, basi leo hii Sindelela angelikuwa na wazazi wote wawili.

Hayo yalipopita, walikwenda kulitembelea kaburi la Pendo.

"Sindelela, na hili ndilo kaburi la mama yako" Baada kufika katika kaburi la Pendo, Bi. Mandawa akamonyesha mjukuu wake kaburi la mama yake. Kwa mara nyingine tena wawili hao walilia sana, si yeye tu hata Raham naye alijikuta akidondisha chozi kwa uchungu. Hayo yalipofika kikomo, Raham akamshawishi Bi. Mandawa wakaishi wote mjini, jambo ambalo Bi. Mandawa alikubaliana nalo kwani alimpenda sana mjukuu wake, na alitamani muda wote amuone.

Hatimaye safari ya kurudi mjini ikawaidia, walipokuwa stendi mzee Mabula akasema "Safari njema mjukuu wangu, pia nasikia wiki ijayo yule mwenye pua kama Radio anafunga ndoa na mumewe..." Alitania mzee Mabula, maneno ambayo yaliwachekesha vilivyo Raham na Sindelela karibu wote walikuwa mahali hapo

"Sawa ila kesho kutwa nanyie mje mjini muanze maisha mpya pia msherehekee ndoa yangu" Alisema Raham, kwani melengo yake yalikuwa ni kufunga ndoa kabisa na Sindelela

"Kuhusu hilo? Wala hakuna shaka mjukuu wangu" Mabula alijibu.

Naam! maisha yakawa raha mstarehe kwa wawili hao, Raham na Sindelela. huku kijijini nako Zaulo na Chiku nao pia walizidi kufurahia maisha yao wakiwa kijijini ikiwa upande wa Sindelela akichagua aina ya gari ya kutembelea. Wapenzi hao walifunga ndoa, Mungu akawabariki familia bora.

MWISHO